

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR THIRTEENTH SITTING ON FRIDAY, THE 8th MARCH, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' RESOLUTION

2. ***Resolutions**

VANLALTHANTLINGI
Commissioner & Secretary

* Please see Bulletin Part – II No. 41 dated the 29th February, 2024 for Private Members' Resolutions to be moved.

HON. SPEAKER : *Tlangte chu Jerusalem vela a awm angin, Lalpa chu a mite velah a awm thin, tun atanga kumkhua in.*

-Sam 125:2

QUESTIONS & ANSWERS:

Zawhna & Chhanna-ah kan kal nghal ang a. Zawttu tur kan sawm hmain; vawiin kan member zahawm tak takte - Pu Lalchhuanthanga, Pu Lalrintluanga Sailo leh Pu F. Rodingliana te, ‘taksa lam harsatna avangin kan zingah an awm thei lo a ni’ tih kan inhriattir a. Tin, Pu PC Vanlalruata hi eng emaw rokhawlhna avangin kan zingah a awm lo bawka ni.

Starred Question 201-na zawt turin Thorang bialtu member zahawm tak Pu R. Rohmingliana i lo sawm ang.

Starred Question No. 201 - *Swadesh Darshan hnuai, Thenzawl-a hmalakna chungchang.*

HON. SPEAKER : Pu Speaker, ka lawm e. Tourism Minister zahawm tak chhan atan, *Starred Question No. 201* -

- a) Swadesh Darshan-I hnuai Thenzawl Golf Course, Wellness Spa Centre leh Auditorium te hi engtika hawn nge a nih?
- b) Tunah hian tunge enkawl? tih a ni e.

HON. SPEAKER : Chhang turin Tourism Department changtu, Minister Pi Lalrinpuii ilo sawm ang.

PI LALRINPUII, HON. HON. MINISTER: Pu Speaker, ka lawm e. i phalnain Pu Speaker, thuhma tlem han neih lawk ka duh a. Vawiinah hian Budget Session-a discussion te kan nei a. ‘Minister din a rem ve lo,’ an tih zel avangin, thuhma han neih vena hun ka nei vak lo a. Vawiinah hian ka bial mipuite, englai pawha min lo support-a min lo thlir rengtu leh min lo tawngtaisak tute hnenah, Pu Speaker, nangmah kal tlangin lawmthu ka sawi a, min lo support zel tur pawhin ka sawm bawka ni.

Tin, Pu Speaker, vawiin hi, Mara Kut ropui tak mai - *Lyuva Khutla* a ni a. Vawiinah hian kan Mara unaute chuan an hmang hut hut a. Hlim taka an hman theihna turin duhsakna sang ber ka hlan a. Kan memberpui Dr. K. Beichhua pawh hi, Kut a nih avangin a rawn inchei mawi hle a ni.

Tin, Pu Speaker, vawiin hi *International Women’s Day* a ni a. Vawiinah hian he lai House chhunga hmeichhiate zawng zawng leh Mizoram chhung leh pawna ka hmeichhепui zawng zawngte, *International Women’s Day Chibai* ka buk a, an tan duhsakna sang ber ka hlan a ni.

Tichuan, Pu Speaker, Member zahawm tak Pu Rohmingliana zawhna-chhanna chu -

1. Swadesh Darshan-I hnuaia Thenzawl Golf Course, Wellness Spa Centre leh Thenzawl Auditorium te hawn hun chu hetiang hi a ni: –
 - i) Thenzawl Golf Course - Ni 4th August, 2020;
 - ii) Wellness Centre; Thenzawl - Ni 5th January, 2022;
 - iii) Thenzawl Auditorium - Ni 31st January, 2023.
2. Swadesh Darshan-I hnuaia Thenzawl Golf Course, Wellness Spa Centre leh Thenzawl Auditorium enkawltute chu: –
 - i) Thenzawl Golf Course - Mizoram Tourism Development Authority (MTDA);
 - ii) Wellness Centre - Mizoram Tourism Development Authority (MTDA);
 - iii) Thenzawl Auditorium - Tourism Department.

Ka lawm e.

HON. SPEAKER : *Zawhbelhna* - Zawhna neitu, Thorang Bialtu Pu R. Rohmingliana.

PU R. ROHMINGLIANA: Pu Speaker, ka zawhbelhna chu -

- i) Grant-in-Aid (GIA) system-ah Mizoram Tourism Development Authority hi hlankai tawh a ni em?
- ii) Tun financial year-ah GIA salary tur dah a ni em?

HON. SPEAKER : *Zawhbelhna* - Lt. Col. Clement Lalhmingthanga, Champhai South Bialtu.

LT. COL. CLEMENT LALHMINGTHANGA: Pu Speaker, kan Tourism Department changtu Minister zahawm tak chhan tura zawhbelhna chu – “Thenzawl Golf Course hi tourist attraction tana asset pawimawhte zinga pakhat a niin ka hria a. Tunah hian Mizo zingah pawh hian players te kan nei ve nual tawh a. Anni hote leh Indian Golf Union te nena thawk hoa develop tumna leh, tourism attraction atana develop tura ruahmanna a awm em?” a ni e.

HON. SPEAKER : Chhang turin, a changtu Minister Pi Lalrinpuii ilo sawm ang.

PI LALRINPUII, HON. MINISTER: Pu Speaker, ka lawm e.

‘GIA system-ah Mizoram Tourism Authority hi dah a ni em?’ tih zawhna kha, chiang taka hriatna ka nei lo a; ziakin kan la inhriattir ang a. ‘GIA salary dah a ni em?’ tih kha chu, nizan budget-ah pawh khan kan sawi tawh a; dah a ni lo a ni.

Tichuan, Pu Clement-a zawhbelhna – ‘Thenzawl Golf Course players te ‘Indian Golf Union nena thawh ho tumna a awm em?’ tih hi, tunah mai chuan chutiang thawh ho tumna a awm lo a. Amaherawhchu, han sawi zau deuh i la - Kan Golf Course hi enkawl a hautak em em mai a, *Sumthuni-nu* a ni ringawt mai a. A in sustain lo a; tin, a harsa em em mai a. Heng te pawh hi, ‘outsource dan te ngaihtuah ila’ tiin kan sawi tawh a. Kan Chief Minister leh Council of Ministers-te nena ngaihtuah tura la chhawp chhuah tum a ni. Ka lawm e.

HON. SPEAKER : A lawmawm e. Zawhnate hi ballot a ni a. Zawhna hi member te’n eng emaw zah an nei a, chu chu ballot-a thlanchhuah a ni thin a. Tun tumah pawh hian Thorang Bialtu, Member Pu R. Rohmingliana zawhna tho a ni a. Hei hi, ballot-a fair taka pawh a ni.

Starred Question No. 202 - SASCI hnuaiia Unity Mall din chungchang.

PU R. ROHMINGLIANA: Pu Speaker, ka zawh hmain - Nizan windup-ah khan ka zawhna hi tlema zawng tarlan a ni tawh a; amaherawhchu, a hma daiha zawhna hi pek a ni a. Chuvang chuan, a zawhbelhna hi a pawimawh zawk ka ring.

Pu Speaker, Tourism changtu Minister zahawm tak chhan atan, Starred Question No. 202 chu -

“SASCI-VIII 2023-2024 hnuaiia Aizawl-ah Unity Mall dinna tur lakh ₹12700/- Finance Ministry in a allocate tawh leh, Ministry of Commerce & Industry ina DPR a approve tawh niin ka hria a. Hei hi Finance Ministry-in a sum hi a release tawh em?” tih a ni e.

HON. SPEAKER : Chhang turin, Tourism Department changtu, Minister Pi Lalrinpuii ilo sawm ang.

PI LALRINPUII, HON. MINISTER: Pu Speaker, ka chhanna chu –

“Unity Mall DPR hi approve a la ni lo a, Finance Ministry-in sum a la release lo bawk a ni” tih a ni e. Ka lawm e.

HON. SPEAKER : *Zawhbelhna - Zawhna neitu, Pu R. Rohmingliana.*

PU R. ROHMINGLIANA: Pu Speaker, ka zawhbelhna chu - DPR hi Aizawl Muanna Veng-a dah tura siam niin ka hria a. Hei hi a dik em? Hei hi a lo chhuah hunah khawi hmuna sak tum nge a nih, tih ngaihtuahna hman a ni tawh em? Hman a nih, chuan khawi hmunah nge sak tum a nih?

HON. SPEAKER : Chhang turin a changtu Minister ilo sawm ang.

PI LALRINPUII, HON. MINISTER: Pu Speaker, Pu R. Rohmingliana zawhbelhna kha – ‘Aizawl Muanna Veng-ah dah tum’ tih tih kha, sorkar hmasaah khan a thuphungin, (official-a engmah awm lovin) ‘Muanna kudam hi Unity Mall atan sak ni se’ tih Pu Speaker, rawtna a lo awm a. Tichuan, ‘Muanna kudam hi FCI kudam-ah sawn ni se’ tih ang deuh khan.

Tichuan, charge ka han lak ve hnu khan, official te’n min hrilhna angin kan han bawhzui a, FCI lamin, ‘kan insawn dawn lo reng reng; engmah official-a inhrilhna pawh a awm lo; tin, insawn thei pawh kan ni lo’ an tih tak avangin, khan supply Minister, Pu B. Chhanzova te nen pawh kan han meeting a; thil ni thei a nih tak loh avangin, kawng dang kha kan dap a. Tunah hian, a hmun chu kan hual deuh tawh a, Pu Speaker, House zahawm tak ah hian la sawi chhuah rem chiah lo a; confirm a nih hunah, duh leh a ruktein min zawttu kha ka lo hrilh dawn nia. Ka lawm e.

HON. SPEAKER : Aw le, lawmawm e. Kan House Leader i lo sawm ang.

PU LALDUHOMA, HON. CHIEF MINISTER: Pu Speaker, a hmun hi chu khawilai pawh lo ni sela, hemi a sum hi financial year tawp hmaa min rawn release sak turin ka ngen a, ‘kan lo ngaihtuah ang e’ an ti a. Zanin lamah te emaw, naktuk lamah emaw te chuan thuchiang kan hre tawh mai thei; min pe dawn nge, dawn lo chiah chu ka sawi thei lova. Finance Ministry chuan a ngai pawimawh viau e.

HON. SPEAKER : A lawmawm e.

Starred Question No. 203 - Tourism Deptt. hnuuia work tender chungchang.

PU R. ROHMINGLIANA: Pu Speaker, ka lawm e. Tourism Minister zahawm tak chhan atan, Starred Question No. 203 –

“Sorkar hmasa (December 2018 - December, 2023) chhung khan Tourism Department hnuuia restricted tender leh open tender engzat nge chhuah a niha, engzat man te nge?” tih a ni e.

HON. SPEAKER : Chhang turin, Tourism Department changtu Minister, Pi Lalrinpuii ilo sawm ang.

PI LALRINPUII, HON. MINISTER: Pu Speaker, ka lawm e. Pu R. Rohmingliana zawhna-chhanna chu:

“Restricted tender - 1 leh Open tender - 13 a ni a; Restricted tender - lakh ₹560.00 leh Open tender - lakh ₹6513.16 a ni e” tih a ni e. Pu Speaker, ka lawm e.

HON. SPEAKER : *Zawhbelhna – Zawhna neitu, Pu R. Rohmingliana, Thorang Bialtu.*

PU R. ROHMINGLIANA: Pu Speaker, ka zawhbelhna chu –
 i) Heng hna hrang hrangte hi engchen nge thawh a nih tawh? Physical Achievement engnge?
 II) Chite Veng-a Convention Centre sak meka Executing Agency hi tute nge? Engchen nge a hna hi thawh a nih tawh?

HON. SPEAKER : *Zawhbelhna - Pu K. Laldawngliana, Tuirial Bialtu.*

PU K. LALDAWNGLIANA: Pu Speaker, ka lawm e. Tourism Department changtu Minister chhan atan ka zawhbelhna chu - Khamrang - *Eco-Tourism Village* base-a hnathawh kal mek hi engnge a thlen chin? A hun taka zawh tura hmalak chhunzawm a ni em? Ka lawm e.

HON. SPEAKER : Kan Minister chhang turin ilo sawm ang.

PI LALRINPUII, HON. MINISTER: Pu Speaker, tuna kan member pahnihte - Pu R. Rohmingliana leh Pu K. Laldawngliana zawhna han sawi deuh fak turin chiang deuhin ka hre fak lova, kan official-te an awm tho a, he hun kan hman zawh hian ziakin ka lo pe mai dawn nia; min lo ngaidam se. Ka lawm e.

HON. SPEAKER : A tha e.

Starred Question No. 204 - Kan thalai leh Entrepreneur-te tana eizawwna siamsak chungchang.

Zawhna Neitu - Pu H. Ginzalala, Champhai North Bialtu.

PU H. GINZALALA : Pu Speaker, Hon. Minister - Labour Employment, Skill Development & Entrepreneurship Department changtu min chhan atan, ka zawhna chu –

“Labour, Employment, Skill Development & Entrepreneurship Department-in thalai leh entrepreneur te tan kumin chhung hian eizawwna (employment) engzat nge siam chhuah sak a tum?” tih hi a ni e.

HON. SPEAKER : Chhang turin Labour Employment, Skill Development & Entrepreneurship Department changtu Minister, Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, Champhai North Bialtu, Pu H. Ginzalala zawhna chhanna chu -

“LESDE Department hnuaiiah hian project/scheme hrang hrang kalpui mek a ni a, heng atang hian thalaite eizawna thahnem tak siam chhuah tum a ni” tih a ni e.

HON. SPEAKER : *Zawhbelhna* - Zawhna neitu, Pu H. Ginzalala.

PU H. GINZALALA : Pu Speaker, ka lawm e. ITI Zote, Champhai-ah khian kan nei ve a, tunah hian refugee-in an luah reng mai hi a nih dan tur dik tak a ni lova; department lamah pawh DO Letter te ka ziaik tawh a. Pu Speaker, hei hi khawngaihin, department changtu te hian min enfel sakin, refugee-te hi hmun dangah min dahsak sela. ITI hi han cheithata, thalaite tana eizawna emaw, incubation center emaw tih theihna tur min ngaihtuah sak hi ka duh dan a ni a. Chuvangin, ka zawhna chu –

- i) ITI Champhai hi sorkarin engtia kalpui zel nge a tum?
- ii) Champhai-ah hian incubation center din turin hma min lakpui theih dan a awm ang em? Pu Speaker ka lawm e.

HON. SPEAKER : *Zawhbelhna* - Pu W. Chhuanawma, Tuichang Bialtu.

PU W. CHHUANAWMA : Pu Speaker, ka lawm e.

Ka zawhbelhna chu - State dang leh ram dangah te hian jail tang emaw, home-a awm te emaw ho tan hian skill development an kalpui thin a; hetiang te hi a tih theih ve em?

Khawzawl lam han inpuan ta lawk ila - Khawzawl-ah home pahnih, kohhran leh mimal tlawmngaite'n an din a awm a. An tawt thei em em a, pakhat zawk phei hi chu (Minister zahawm tak hian lo hre bawk se ka duh a) hmeichhia leh mipa awm tlan changte a awm a, a fel lo khawp mai a, Chuvangin, hmeichhe awmna tur bik emaw hi a sak belhna tur min ngaihtuhsak sak thei lawm ni? Ka lawm e.

HON. SPEAKER : *Zawhbelhna* - Pu C. Ngunlianchnunga, Lawngtlai 'W' Bialtu.

PU C. NGUNLIANCHUNGA : Pu Speaker, ka lawm e. Labour & Employment Skill Development Entrepreneurship Department ka zawhbelhna chu –
“Lawngtlaia-ah Employment Officer thar Sorkar hian min dahsak ve thei ang em?” tih a ni e.

HON. SPEAKER : *Zawhbelhna* - Pu V. Malsawmtluanga, Lunglei North Bialtu.

PU V. MALSAWMTLUANGA : Pu Speaker, High Powered Committee Vice Chairman ka nihna anga minister ka zawhbelhna chu –

“Skill development hi chhim lamah hian a lian tham deuha kalpui dan a awm em?” tih a ni e. Ka lawm e.

HON. SPEAKER : Chhang turin Labour Employment, Skill Development & Entrepreneurship Department changtu, Minister Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, zawhbellhna kha a awm nual mai a.

Pu H. Ginzalala, a zawhna neitu zawhna kan chhanna chu - Champhaia ITI khi a building a chu a ding uai tawh a, amaherawh chu sak mek zinga mi kha a la ni a. Champhai, Serchhip, Mamit leh Kolasib-te hi tun dinhmunah chuan sak mek zinga mi a la ni a, he building-ah hian tunah hian ‘raltlan’ kan tih mai, mi thahnem tak an awm a. A building-a raltlan dah luh dawn hian department te hi rawn an ni lova. Han inawwna hman pawh a awm lo a ni maithei a, hmanhmawh thlak thil a ni lova. Chuvang chuan, a lakchhuah hun tur a pawh hi, a dah luttu lamin min rawn lo a; ‘eng tikah nge an lak chhuah dawn’ tih pawh hi kan la hre mai lo a. Amaherawhchu, an awmna tur tha zawk te chu awm se, chhuahsan tawh se chu kan duh khawp mai.

Pu Speaker, Incubation Centre chungchang kha - Champhai mai ni lo, hmun dangah te pawh hian Incubation Centre tha hi din belh zel tumna a awm a, ruahmanna kan neih zinga mi a ni a. Tunah chuan Chiang Takin kan sawi a rem chiah lo a, hun remchang dang (tun kan Assembly, budget session lai mek) ah pawh hian kan PSU liante, Central sawrkar hnuai mite nen pawha thawhhona thuthlung ziah hman tum kan ni a, kan Chief Minister te nen pawh kan in rawn tawh a. Amaherawhchu, a lo kal tura kha mi-pawimawh tak mai a ni a, Prime Minister office lam atanga khulaiah eng emaw ah stand-by tura tih a nih avangin, a lo kal remchang lo a; khang te kha ziah hman ila chuan, thu lawmawm tak mai hi kan han puang hman tur a ni a. Min lo nghak hret se, amah kan MLA chang lo, midangte tan pawha thu lawmawm tur hi kan nei thuai dawn niin a lang.

Pu Speaker, Pu W. Chhuanawma, Tuichang Bialtu ka chhanna chu - Jail tangte leh Home-a awmte tan hian, tunah hianin thu lawmawm tak mai kan dawna chu – PMKVY 4.0 hnuai hian Mizoram hian engamah pawisa dawn kha kan nei lo a ni. Chuvang chuan, tun hnai, January thla ah khulaiah Ministry - Skill Development & Entrepreneurship lam te kan zu dawr a, Secretary nen kan zuk meeting-a. Chutah chuan, Mizoram tan a hranpaa special package-te kan zu dil a ni. Amaherawhchu, ani chuan, a tawngkam takah chuanin, ‘I team te lo kal se, Mizoram bik hi kan lo sawipui ang e’ a lo ti a. A chhan chu, kan dinhmun te an han en a, ‘Mizoram hi skill development-ah hian hmuh tur invan hle mai’ a ti a, an chhinchiah na hrang hrang kha min rawn pe a. ‘Chuvang chuan, i team te nen lo chhuk thla ula, ka ngaihtuah ho dawn nia’ a ti a.

Tichuan, February thla khan Secretary leh Director te nen kan zuk kal leh a. Department lama ka thawhpuite an thawk rim hle mai a, project tha tak tak an siam a. Chutah chuan, Pu Speaker, 'Mizoram State Special Project' kan ti a, a hrilhfhahna ah chuan, '*Bana Kaih*' kan ti kher a ni; a ziaakah pawh, 'Bana Kaih' tiin kan zu thlen a ni. Thil lawmawm tak mai chu, hetah hian hna, mi 10,220 training theihna tur sum leh pai min pe a, an sanction tawh nghe nghe a. Chu chu a sum zawng chuan crore ₹31 chuang a ni a, cheng nuai 3000/- chuang hi *Bana kaih policy* hnuaiia thalaite eizawna buaipuina atan, LESDE hian tun hnaiah kan hmu thar nghe nghe a ni.

Tichuan, hemi hnuaiiah hian (Tuichang Bialtu zawhna) jail tang te, Home-a awm te, correction centre-a inmate ho te tana skill an zir ve theihna tur hi, mi 1000 tan training target kan nei a, chutah chuan Khawzawl pawh chu an tel thei ngei turah ngai ta ila. Tin, hmun danga mite pawh tih tel theih kan tum dawn a ni.

Tichuan, Lawngtlai West Bialtu, Pu C. Ngunlianchunga zawhna – employment office-a employment officer chungchang kha, Pu Speaker, District Employment Exchange Office hi Aizawl, Champhai, Lunglei, Lawngtlai leh Siaha ah te kan nei a, duhthusamin kan la thum chak thei lo a. Sawrkar sum indaih lohna te a ni a, tun dinhmunah chuan kan pe ngei ang tih assurance kan pe ngam lo a. Amaherawhchu, sawrkar sum chu han indaih deuh se chuan, tih theih chu a chakawm khawp mai.

Pu V. Malsawmtluanga Lunglei North Bialtu ina HPC Vice-Chairman a nihna anga a zawhna kha a zahawm khawp mai a. Skill Development, chhimlamah a lian thama kalpui theih dan kha, nichina kan sawi tak hnuaiiah khan Pu Speaker, tih theih kan tum ang a. Hei, tun hnaiah India, Japan International Conclave kha Shillong-ah ka zuk chhim ve a, 13th February khan, chutah chuan Mizoram-a hna thawh duh mi-thahnem tak an awm a ni. Mizoram sawrkar nena thawh ho duh, a bikin Japanese ho, an company hrang hrang te, Mizoram atangin *entirnan*: Nurse tee maw, construction worker emaw te thawn chhuak ila, tih te. Tin, hei, kan LESDE Minister hmasa awm a, kan opposition leader Pu Speaker, a hnuaiiah hian tha takin hma an lo la tawh a; nurse tun hnaia kan thawn chhuahte kha, a hun laia hmalakna a ni a. Kan hun laiin kan thawn chhuak a ni mai a; a chungah pawh lawmthu kan han sawi a. Kha kha kan chhunzawm zel dawn a, a ai lian zawka chhunzawm tumin ruahmanna a awm mek a. Japanese company lian pathum te tun thla, Budget Session kan neih mek lai hian Mizoram ah an lo zin tawh a, kan indawr tawh a. Niminah pawh khan, Pu Speaker, kan han bo deuh vang vang chhana pawh kha, tlai dar 4:00 ah khan an lo thleng a, kan han inkawm zawk a. Chutah te pawh chuan Lunglei lam bik tan te pawh hian kan sawipui a ni. Pu Speaker, a hlawhtling thei a nih chuan, (Pu V. Malsawmtluanga zawhna kha) a area ang zawngin Chhim lamah te pawh Skill Centre lian zawk dina, an ni ho leh midangte nen pawha thawh ho theih kha chu kan duhthusam a ni. Chu chu ka chhan theih dan ni mai se. Ka lawm e.

HON. SPEAKER : Dr Lorrain Lalpekliaana Chinzah kha rokhawlhna vangin kan zingah a awm lo bawk a ni. *Starred Question No. 205-na* zawt turin Siaha bialtu member zahawm tak Dr. K. Beichhua ilo sawm ang.

Starred Question No. 205 - Govt. Siaha College tana Commerce Stream.

DR. K. BEICHHUA : Pu Speaker, ka lawm e. Vawiin hi Mara fate'n Kut ropui bera kan neih *Lyuva Khutla* kan hmang mek a, Siaha khawpui ah chuan ropui taka hman mek a ni. Chutah chuan MTP, MCHP, YMA, MHIP, YLA, LWA leh kan unau Gorkhali te pawh cultural dance te nen ropui taka hman a ni thin a. Hei hian hnam-inpumkhatna, inlungualna leh inhmangaihna nasa takin a siam thin a ni. Chumi chu nangamah kaltlangin, he kut chibai, Zoram-mipuute ka buk a. Tin, nangmah kaltlangin, Maraland mipuute *Samaw* tha ber ka hlan bawk e.

Higher & Technical Department changtu Minister chhana tan ka zawhna, Starred Question No. 205 -

“Govt. Siaha College, Siaha Commerce Stream 2009 - 2010-a hawn phalna pek tawh kha a taka a function theih nan, post create phalna nei tura hmalakna a awm em? A awm chuan, engnge a thlen tawh?” tih a ni e.

HON. SPEAKER : Awle, Higher & Technical Education Department changtu Minister Dr. Vanlalhlana chhang turin ilo sawm ang.

DR. VANLALTHLANA, HON. MINISTER: Pu Speaker ka lawm e. Dr. K Beichhua, he House zahawm taka kan member-pui Siaha Bialtu zawhna ka chhanna chu –

“Post create phalna nei tura hmalakna hi a awm a. DP&AR atangin Govt. Siaha College tan hian Commerce Department-ah post 2 create phalna hmuh tawh a ni a. Finance Department lamah Model Code of Conduct avangin phalna hi hmuh a la ni lo” tih a ni e.

HON. SPEAKER : *Zawhbelhna - Zawhna* neitu, Dr. K. Beichhua.

DR. K. BEICHHUA : Pu Speaker a lawmawm khawp mai. Kan Minister zahawm tak chungah lawmthu ka sawi a.

Ni e, Siaha hi kan hria a, Aizawl atangin a hla a, engkim mai, damloh ni khua leh education ah pawh hmun danga kal zel ngai a ni a. Tichuan, Science, Commerce leh Geography bik hi kan mamawh em em mai a ni. Tunah chuan school feeder pawh kan nei nual tawh a. Chuvang chuan, sawrkar thar hian beiseina lian tak kan nei a. Hma min laksak theih chuan, kan harsatna tam tak sutkian a ni dawn a ni. Ka zawhbelhna chu –

- 1) Kan Higher & Technical changtu Minister hian kan college hi min rawn tlawh thei ang em?
- 2) Heng stream pathum kan rawn sawite chungchang hi kan Minister hian hma min laksak thei ang em?
- 3) Tun dinhmunah hian Siaha Govt. College-ah hian student 487 an awm a, classroom a tawt tawh khawp mai a; class te an inneih chhawk thin a ni a, a harsa khawp mai a. Chuvangin, Siaha college building hi sak tumna a awm em? Pu Speaker, ka lawm e.

HON. SPEAKER : *Zawhbelhna* - Pu Lalramliana Papua, Lunglei South Bialtu.

PU LALRAMLIANA PAPUIA: Pu Speaker, Lunglei Hrangchalkawn-a Mizoram Polytechnic hi, a changtu Minister hian a hmunah pawh min hmuhsak tawh a, February ni 7 khan. Hrangchalkawn Polytechnic hi tunah hian a rawihral tep a ni; ngaihsak a hlawh lo hle mai a, hun kal tawhah khan. Tunah hian helai Polytechnic an mamawh hrang hrang - zirna chungchang te, building te leh khawl thil an mamawh hrang hrangte engkim min hmuhpui tawhin ka hria a. Ka zawhbelhna chu –
 “Tun sorkar thar hian hemi tichangtlung tur hian ruahmanna siam a nei em? Engtin nge tichangtlung turin min kalpui dawn? Eng ruahmannate nge a neih?” tih a ni e.

HON. SPEAKER : *Zawhbelhna* - Pu C. Ngunlianchnunga, Lawngtlai ‘W’ Bialtu.

PU C. NGUNLIANCHUNGA: Pu Speaker, Higher & Technical Education Minister zahawm tak ka zawhbelhna chu –

Kum 2019-a Mizoram Public Service Commission-in a lak RUSA hnuaiia Asst. Professor-te kha MNF Ministry kal ta leh Congress Ministry a awm lai khan, Central Sorkar-leh State Sorkar te intiamkamna siamin, “RUSA scheme hi a tawp chuan, hengho hi regular employee-ah lak zui an ni ang” an ti a. Hei hi Cabinet Memorandum leh Council of Ministers meeting pawhin a approve tawh, Ni 29 January, 2019-ah MPSC-in advertisement te chhuahin, *UGC Regularization, 2018*-in a phut ang thlapa kalpui a ni a. Chu chu 31st Oct, 2021-ah khan a tawp ta a. Hei, kan Minister zahawm tak pawh hian, i veilama a thut lai pawh khan a lo dinpui ve tawh thin a. Vawiinniah amah ngei maiin Higher a han chang hi, helaia Asst. Professor ho an thla a muang hle mai a. “Min zawhsak teh hei hi; min dah nghet thei dawn em tun sorkar hian. Amah ngei kan tana ding thin kha a ni si a” tih kha a ni a.

Tichuan, ka zawhna chu - “Tun sorkar hian khang ho kha dah ngheh tumna a nei em?” tih a ni a.

A pahnihnaah chu - Lawngtlai-ah Polytechnic building sak a ni a; sorkar hmasa, hmasa leh tawhah khan; tunah chuan ramhnaiah a chang deuh ti ti reng mai a. Hetah hian Polytechnic puitling tak a nih loh pawhin, eng emaw han training theihna *entirnan*: electrician leh eng emaw te tih theih dan a awm ang em? He sorkar hian khitianga building cheng tam tak senga sak tawh dah tawl mai hi a hman tangkai dan min neihsak thei ang em? Ka lawm e.

HON. SPEAKER : *Zawhbelhna* - T. Lalhlimpua, Lunglei 'W' Bialtu.

PU T. LALHLIMPUA : Pu Speaker, ka lawm e. Ka ban a thui teh reng nen, min hmu dawn lo emaw ka ti a; ka lawm hle mai. Higher & Technical Minister chhan ka zawhbelh chu -

Nichina Lunglei 'S' Bialtu sawi ang khan, February Ni 7 khan Lunglei-a Engineering College leh Polytechnic-te kan en a, Minister ho hian. Chutah chuan, Lunglei in kan lo thlir ve reng chu - *Lunglei Engineering College* a ni. Ka zAwhbelhna chu -

i) A hova kan en khan - a building quality te, luah tlakin a hmu em? Luah chi a ni em?

ii) Tin, he College hi full-fledged function tura sorkar hmasain hmalakna tur duan sa a nei em? Chutiang chu lo duang lo ta se, hlawhtling turin engtia hmalak tur nge? Engtin nge hmalak a tum dan?

A hovin kan en a, ngaihndan leh tum dan eng emaw chen a nei theiin ka ring a. Vawiinah hian he House zahawm tak hmaah hian min chhansak se ka duh avangin, khangte kha ka zawt a ni e. Ka lawm e.

HON. SPEAKER : Zawhna te, zawhbelhna te, a zawttu tiamin chhim lam khan an chang vek mai a; an contract tawp mai a. Kan Minister hi a chhan theih ang ang te chhang turin kan sawm ang a. Kan sawi fo angin, zawhbelhna te hi tlachawp a nih deuh avangin, a zawnga za kan chhang thei lo a nih pawhin kan inhrethiam dawn nia. Chhang turin i lo sawm ang.

DR. VANLALTHLANA, HON. MINISTER: Pu Speaker, ka lawm e. Dr. K. Beichhua, zawhna neitu zawhbelhna - Siaha College-ah Science, Commerce leh Geography te hawn chungchang kha; NEP - New Education Policy, 2030 ah hian, 'multi-disciplinary institutes' an ti a, stream hran awm tawh lem lovin college zawng zawng hi kalpui tur tih a nih avangin, a hrana hetiang lo hawn thar emaw, khatianga kalpui kha a buaithlak tawh a. Siaha College pawh 2008-a pek tawh a ni a, Commerce hi. Kei pawh Commerce zirtirtu tho ka ni a, kan ngaihven tlang thin a. Amaherawhchu, tunhnaiah zirtirtu pahnih an nei a, pakhat chu post awmsa pawh pheia siam belh tura tih a ni.

NEP a awm takah hian thil a tibuai ta vek mai a, hetiang stream hawn thar emaw kha ngaihchan hret a ngai a. A state level hian, NEP chungchangah hian committee a awm a, chumi ina a ngaihtuah tel a ngai baw k a ni. 'Kan hawng ang' tih kha a sawi ngawt theih tawh loh. Stream hran a thara hawn tawp ang chi kha a remchang tawh lo a ni, tih kha ka han sawi duh a. Tichuan, Siaha College chu kumin chhung hian rawn tlawh ka tum dawn nia. Ka rawn lang ang a, kan tlawh dun dawn nia. (Pu Nguna'n, 'sial lo talh sela' a'n ti a nih chu).

Tin, 'Siaha College building a tha taw k tawh lo' tih kha - College tam tak hi a then chu siam that a nih rualin, thenkhat erawh chu siam that ngai, buaipui ngai a tam khawp mai a. Building sak that tumna ang zawng chuan budget-ah a hran chuan kan dah lem lo a. Amaherawhchu, zirtirtu kan nihna angin, hei hi chu ka ngaipawimawh khawp mai a, kan department lam atangin kan dil ang a. PMJVK-ah khan college lam tihthatna tur sum kha kan dah teuh mai a, a thenah chuan crore 30 te a ni a. Chu chu, 'engchin nge a tlang dawn' tih a hriat loh a, kan dah nual a, chutah pawh chuan kan dah tel niin ka hria a; a result ka la hriat loh avangin ka la sawi thei lo a. 'A tum chu kan tum a ni' tih kha ka han sawi duh a ni e.

Pu Lalramliana, Lunglei South Bialtu rawn zawhna - Mizoram Polytechnic Lunglei chungchanga 'ruahmanna a awm em' tih kha, lakh 36 an rawn dil kha tunah hian Finance-ah kan theh chho mek niin ka hria a; bungrua an mamawh khawp mai. Sawlai hmun saw ka va tlawh a, rilru a na a ni, a hmun han kal khan. Sawi ang khan zirtirtu kan ni a, 2002 te, 2005 te, 2007 vel thlenga World Bank project hnuaia an thil lei - practical an tihna khawlte phei chu an hmang ngun a, a chhe duh viau mai a; khangte kha an lo la hmang a. Practical thenkhat phei chu tihngaihna awm lo khawpin a awm a ni. Chumiah chuan, tunah hian kan dil mek a, kan ngaihven mek a ni.

Tin, CSR hi tunah hian Polytechnic tan hian kan dil mek a, engchen nge a kal dawn ka hre lo thung a. Ruahmanna kan siam a, bank kan be tan chauh a; kan hmuh dawn leh dawn loh chu ka hre lo a. Chutiang chuan sawlai hmun saw dawm kan kan tum a ni.

Pu C. Ngunlian chunga kan member senior leh Lawngtlai West Bialtu zawhna kha, kei pawhin helai hmun ah pawh ka lo dinpui tawh thin a ni a. MPSC hian sawrkara a nghet lo tur hi chu a la khat khawp mai a. Chutiang chuan, RUSA hnuaia zirtirtute a lo la a, sorkar hnuaia contract-a thawkte RUSA lamah te an insawn a, dah ngheh hleih theih loh in tunah an awm a ni a. Hei hi ngaihtuah ngai tak a ni a, Finance leh DPR lam te nena kan ngaihtuah ho tawh a ni a. Tin, a hma pawha kan lo aupui tawh a ni a. A minister ang pawhin, 'hei hi chu nawr tlang chu ka tum khawp mai' tih kha kan sawi duh a. Hemi chung changah hian CM pawh kan va hmu tawh a, kan CM pawhin a hria a, a ngaipawimawh khawp a ni.

Tin, Lawngtlai Politechnic tih changtlunna tur kha tun budget-ah pawh khan a awm nual a; a tam lem lo na a. Budget kallai kha kan ti chho zel a ni a; a then ah nuai 100 te, a then ah nuai 300 te dah a ni a, chutiang chuan hma lak tum a ni a. Engzat nge kan pek belh dawna, engzatin nge hma kan lak dawn tih erawh chu ka sawi thei lo a ni. **(Pu C. Ngunlianchunga:** Khatiang polytechnic pui puia kha chu, sorkar sum indaih ohna te a nasa a, kan hriatpui a. A polytechnic pui pui min hawn sak thei lo a nih pawhin, skill training tur ang tal khan tih dan kawng a awm thei ang em? Kha kha ka'n ngen nawn leh hram a ni e.)

Pu Speaker, hemi polytechnic han siam that lehna tur sum eng emaw zat kha kum 2013 khan a rawn kal a, crore 20 chuang dah a ni. Kha thil kha LESDE Department hnuai niawm tak a ni a; a chhan chu, Ministry of Skill Development & Entrepreneurship in an rawn tih a ni a. Chumi a nih a vang chuan, LESDE changtu minister nen pawh kan sawi tawh a, convergence deuha kan kal a ngaih ka ring a. Chutiangah chuan remchang deuh a awm chuan, hma kan rawn la ang e.

Pu T. Lalhlipua, Lunglei West Bialtu rawn sawi - 'engineering college chungchang ah engtin nge hma lak a nih' tawh tih kha, hei pawh hi PMJVK hnuai ah crore 14 chuang, a kalkawng te, electric te, tui te leh a dang te tih changtlunna atan kan dil mek a, kan hmuh leh hmuh loh tur erawh ka chiang lova. A hmun saw buaipui belha enkawl thata, a taka hman theih dan tur ngaihtuah a ngai a, hma lak mek a ni a. Kan han kal khan, motor te tan chuan a thlen theih loh a ni, tih kha a lang a, hna a la tam khawp mai. Ka lawm e.

HON. SPEAKER : A lawm awm e. Lawngtlai Bialtu zahawm tak kha - kan LESDE Minister te nen inkawm a ngai a nih kha.

Hei hi Pu Lalchhuanthanga zawhna a ni a. House kan hriattir tak ang khan, amah hi taksa harsatna avangin kan zingah a awm lova. A aia zawt tur in Pu VL Zaithanzama, Aizawl West-III Bialtu hnenah a hlan a. Tunah zawhna zawt turin Pu V.L. Zaithanzama i lo sawm ang.

Starred Question No. 206 - *Aizawl ITI chungchang.*

PU VL. ZAITHANZAMA: Pu Speaker, ka lawm e. LESDE changtu Minister chhana tana Pu Lalchhuanthanga zawhna, Starred Question No. 206 chu –
“Industrial Training Institute (ITI) Aizawl hi a building leh zirna hi tihchangtlun tumna a awm em? Tum nise, engtikah nge hma lak theih a nih ang?” tih a ni e.

HON. SPEAKER : Chhang turin, LESDE changtu Minister, Pu Lalnghinglova Hmar ilo sawm ang.

PU LAL NGHINGLOVA HMAR, HON. MINISTER: Pu Speaker, ka lawm e. Starred Question No. 206 chhanna chu –

“Industrial Training Institute (ITI Aizawl) a building leh zirna hi a theih ang ang a tih changtlun reng a ni a, tih changtlun zel tum a ni” tih a ni e.

Hei hi a chhanna tawi ziaka ka’n han dah chu a ni mai a. Tunah hian NIOA exam centre te din a ni a, a tul angin vocational training tum a nih bakah, TATA leh HONDA te nen pawh thuthlung kan ziaak fel tawh bawka. A building tihchangtlunna tur te pawh hi ruahmanna a awm a. Hei hi 1964 a din kha a ni a, a upa tawh hle mai a. Tunah khuan zirlai 420 an awm a, hmarchhaka vocational training-na hmun tha a ni a, a zahpui awm lo hle a ni. Amaherawh chu, a lo upa tawh deuh a, tihchangtlun zelna tur ruahmanna te pawh a lo awm a.

Pu Speaker han sawi takah chuan, (a la hma lutuk ang tih chu kan hlau deuh a) kan sorkar hian hma min lakpui a, tunah hian a figure te pawh hi a chiangin kan sawilo ang a, cheng vaibelchhe 20 chuangin a building leh a hmun hma te tih changtlunna tur ruahmanna a awm mek a, ministry approval nghah mek a ni a. A bialtu, Member Pu Lalchhuanthanga hian a vei hle mai a, kan pahnih pawhin kan zu tlawh tawh a, a veng leh a hmunhma te. Tih changtlun ngei kan tum e.

HON. SPEAKER : *Zawhbelhna* - Zawhna neitu, Pu VL. Zaithanzama.

PU VL. ZAITHANZAMA: Pu Speaker, ka lawm e. Kan zawhbelhna chu –

Industrial Training Institute (ITI) hmun hi Aizawl vela hmun rem ber pawl a ni a. A hmun hma mai ni lo, a vel te khu Aizawl khawpui cheina atana siam rem theih niin a lang a. Hei hi, tun aia nasaa chei tumna a awm em?

HON. SPEAKER : *Zawhbelhna* - Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e. Ka zawhbelhna chu –

Kan Minister ram pawn a hnathawhna te kha a sawi a, Japan te pawh kha, kan ngaithla a. Tunhnaiah, a bik takin hmeichhe awmnem zawk te’n buaina an tawka nasa em em a. Chutiang a nih a vang chuan, heng ang a hma han lak leh hi, kan risk a sang deuh em? Nge ni, a sahimna lam te pawh hi tha tak an nei turah ka ngai a. Hmeichhia te tana sahimna lam kha an kalpui dawn em?

HON. SPEAKER : *Zawhbelhna* - Tuichawng Bialtu, Pu RM Chakma ilo sawm ang.

PU RASIK MOHAN CHAKMA: Pu Speaker, LESDE changtu Minister zahawm tak chhan atan, ka zawhbelhna chu –

Kamalanagar (Chawngte) ah hian ITI building 2015 khan MSDP scheme-a sak a ni a, a building bakah staff-quarter te pawh. Tunah hian a enkawltu tumah an awm leh si lova; Sorkar sum tam tak sengin an sa a. Khang te kha department-in a hriatpui em? Hriatpui ta se, hawn theih dan a awm em?

Tin, kum 2008 hma deuh khan central sorkar policy - district tinin Polytechnic pakhat leh minimum ITI pahnih dinna tur policy a a awm a, Lawngtlai a polytechnic pawh kha khami plicy hnuai sak kha a ni a; chutiingin Chawngte ITI te pawh. Khami MSDP policy kha Mizoram-ah hian kan la kalpui em?

HON. SPEAKER : *Zawhbelhna* - Pu Jeje Lalpekhlua, South Tuipui Bialtu.

PU JEJE LALPEKHLUA: Pu Speaker, ka lawm e. Ka zawhbelhna chu –

Hnahthial district ah hian skills development lam hi tun aia chaka kalpui theih dan a awm em?

Tin, Pu W. Chhuanawma khan Home a ngaih pawimawh thute a lo sawi tawh a. Hnahthial District-ah hian Home pakhat kan nei ve a, hei hi ‘Jehova Jire Home’ tih a ni a. He home a awmte hi an thiam thil leh an theihna zawng te haichhuah kawngah hma min laksak turin a changtu Minister ka ngen nghal bawh a ni e. Ka lawm e.

HON. SPEAKER : Chhang turin, LESDE changtu, Minister Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, ITI Veng leh ITI hmunhma te tihchangtlunna chungchang hi a bialtu Pu Lalchhuanthanga hian a vei hle mai a. Nichina ka sawi ang khan, kan zu fang chiam tawh a. Nichina zawhna awm ang khan, Aizawl khawpui chhungah chuan khu aia hmun rem khu a tam tawh kher lo ang a. Chutih rual chuan, a building te a lo tlabal tawh a, a lo upa tawh hle mai a. Sawi ang khan, a hmunpui tihchangtlunna tur cheng vaibelchhe 20 chuang tunah hian Ministry Approval dil mek a ni a, min phal sak ngei pawh kan ring a. Tun term chung hian ITI Veng-ah khuan ITI building changtlung leh tha tak hi din ngei kan tum a. Chumi tur chuan hmalak mek a ni a, chu chu kan Chief Minister hriatpuiinaa hma lak mek a ni.

Tin, (department dang deuh) Sports & Youth Services hnuai hian swimming pool, aquatic center tha deuh mai an nei a, khumi tihchangtlunna tur pawh tunah hian kalpui

mek a ni. Chu chu, a zawttu hian ITI bakah a area khu a vei avangin ka han sawi tel baw k a ni e.

Aizawl South-III Bialtu Pi Baryl Vanneihsang i zawhna – ram pawna hnathawh chungchang kha. Pu Speaker, Mizoram atangin ram pawnah hna kan thaw k nasa hle mai a, Gulf countries-ah te, khawchhakah te. Thil lawmawm tak a ni a, chhungkaw tam tak eizaw nna a ni a. Mi tam takin kan hmuh phak loh tur ramte kan hmu a, sum pawh kan la lut a. Amaherawhchu, a pawimawh ta chu - A tir chhuaktute hian eng angin nge an in tirh chhuah, tih te; helaiah hian thil fel zan lo te a awm fo thin avangin mi tam takin harsatna an tawh te kan hre tlang awm e. Hei hi tihreh theih a tha khawp mai.

Tunah hian, Home Department-ah pawh kan zia k tawh a, “LESDE hian kan lo kut-ken ang a, kan lo regulate mai dawn em ni” tiin, tunah hian dilna te kan han theh lut me k a ni. Chumi kaihnawihah chuan, tun hnaiah khan Taiwan Ambassador lo kal kha kan Chief Minister inah kan kawm a; chutah chuan Chief Minister-in a request pawh, “thalaite hnathawhna hi tun aiin sorkar level atangin emawa hriatpuitu - authorized people ni thei se tih hi kan duh dan a ni” tiin a sawi a, chu chu keini pawhin kan sawi chhunzawm dan a ni a. “Taiwan-ah pawh hnathawktu turte rawn tir rawh u, Taiwan tawng *Mandarin* kan zirtir ang a, hnathawh tur tam tak a awm e” a ti a. Amaherawhchu, chumi hmaa keini lamin kan phut chu, ‘dan ang thlapin, anmahni hnathawktu tur pawh an him tur a ni; kan thalaite an zin chhuah hian an himna ngaih pawimawh ni rawh se’ kan ti a. Chu tho chu Japan Ambassador, Suzuki pawh kan sawipui tawh a, ani hi Mizoram-a lo zin duh me k a ni baw k a.

Nichina kan sawi ang khan Japan hi India hmarchhakah hian investment an lo ti lian hle mai a, 3 billion US dollar an invest me k a ni. Chutah chuan Mizoram-ah pawh eng emaw kawng hrang hranga inzawm an duh a, Mizo thalaite Japan-a tirh chhoh hi an duh me k a, a dawr pawh kan indawr chho zel a. Nichina sawi ang khan, henga thalaite kan han tirh hian, sorkar hriatpuina emaw, sorkar hnuai amite hriatpuina emaw a nih loh chuan, private agency te pawh hi kan hnuai inziaklut an nih loh chuan, thil fel lo a awmin a buai dan hi kan hre tawh a. Pi Baryl Vanneihsang i sawi ang khan, hmeichhe awm nem zawkte an lo ni baw k nen; hei hi dan anga kal pui hi kan duh hle a ni. Mizoram Youth Commission te pawhin hetiang lam hi an buaipui chho me k baw k a, an Chairman pawhin chak takin hma a la me k baw k a ni.

Tuichawng bialtu Pu RM Chakma zawhna – ‘Kamalanagar ITI building chungchang department-in a hriatpui em tih’ kha, kan chhan theih danah chuan, LESDE suma sak a ni lova. A satu hi Lawngtlai DC lam a ni a, sak a nih tur thu hi LESDE lam hi hrilh hriat kan ni hauh lo mai a. Engpawhnise, saw lam zin remchanah kan en ang a, ‘engtia kalpui zel tur nge’ tih te pawh kan la sawiho ang a. Tun dinhmunah chuan, kan department sak leh enkawl a nih loh avangin, helai hi ka sawi chiang thei mai lova. Pu Speaker, ‘min lo hrethiam se’ tiin, a hriatthiamna pawh ka’n dil nghal a ni.

South Tuipui bialtu Pu Jeje Lalpekhlua zawhna – ‘skill development hi Hnahthial lamahte a lian zawka kalpui theih a ni em’ tih kha, Pu Speaker, nichina sorkar laipui atanga ‘special package’ kan dawn zingah khan eng emaw zat chu telh theih turah beisei ila. ‘Bana kaih policy’ kan tih hnuaiah khan hna sing khat chuang zir theihna tur a awm dawn a, area-wise-a tawngpawng sem ngawt theih a ni lova, training center mumal tak te neih ve ngai a ni a. Amaherawhchu, Hnahthial District thalaite pawhin an chhawr theih turin theihpatawpa tih kan lo tum dawn a nia.

A dawt lehah chuan, Jehova Jire Home chhunga mite tan’ tih pawh kha, tuna mi ang bawh khan ka’n han chhang ang a; department lama kan thawhpuite’n ngun deuhin lo ngaihtuah se, inmate ho tana skill training, correction center tihna tur sangkhat kan hmuh zingah khan a tel theih dan a awm a nih chuan, lo bawhzui se. Sawlaih training center pawmpui theih te an awm a nih chuan, chu mite hnuaiah chuan dahin, a tih theih dan lo buaipui se a tha khawp ang. Pu Speaker, hma kan lo la zui dawn a nia. Pu Speaker, ka lawm e.

PU RASIK MOHAN CHAKMA: Pu Speaker, Cental Sorkar-in kum 2007 bawr velah khan programme pakhat a launch a. Chi-bil district tinah khan polytechnic pakhat tal leh ITI pahnih tal run tur, infrastructure sakna chu central sorkar a intum vek a, administrative erawh state sorkar mawhphurhna a ni a. Kha programme kha Mizoram-ah kan la kalpui em?

PU LALNGHINGLOVA HMAR, HON. MINISTER: Pu Speaker, ‘Chawngte ITI hi Lawngtlai DC hian LESDE ah a la pe lo a ni’ tih kha tuna chhanna ka dawn chu a ni a. Tin, 2015 a mi kha a ni tawh a, 2015 hunlaia sorkar te khan an lo la bawhzui lova, chumi hnua mite pawhin an la bawhzui lo leh a, keini hi thla 3 kan han ni mek a. Tun dinhmunah chuan Pu Speaker, tuna kan chhanna bak kha chhanna dang kan la nei rih lo tlat mai a. A zawhna thenkhat a chhanna ka hriat loh kha department lamah kan lo inzawt chhuak ang a, chhan theih dan kan lo zawng ang a; official-a lehkha te a awma kan chhang thei a nih chuan, wawiinah Session kan ban hmam lehkha kan rawn theh lut dawn nia. Pu Speaker, ka lawm e.

HON. SPEAKER : A lawmawm e. *Zawhna & Chhanna* hun atan minute hnih vel a la awm a. Aw le, kan House Leader-in sawitur a nei a, ilo sawm ang.

PU LALDUHOMA, HON. CHIEF MINISTER: Pu Speaker, a zawhna kha ka chhan belh duh lawk a.

Kha scheme kha sorkar hmasa te khan an lo kalpui a. Amaherawh chu hna zawh loh a la tam em em a ni. Sorkar hmasa lama PAC Chairman kan nih ve lai te khan a hmunah kan tlawh chhuak deuh vek a. Department hotute kan kamkhat a, contractor te kan hau a, kan ti nasa khawp mai. Mahse, sorkar atanga will-power a awm loh chuan, thil tih a

sawt lo khawp mai a, PAC atanga recommendation kan siam hian hna a thawk thui lo a ni. *Entirnan*: Zote ami khi eng emaw chen an lo sa zo tawh a; a kawngkhar an lo ru a, a wire fitting zawng zawng an lo pawtchhe leh vek tawh a. Chutih laiin a bulah sak mek a awm bawk a, a approach road a chhe leh tawh bawk a. Tlangsam ah sak zawh tawh, enga tan maha hman loh a ruak ringawt bawk a, a uihawm em em a ni. Chhiahtlang ah a hmunah kan kal a, kei pheichuan vawihnih ka tlawh a ni; hun an pawt sei zel a, an zo thei lova. Chutiang chu anih nuaih avangin kan ITI te, kan polytechnic lampang te, kan entrepreneur ho tana kan mamawh ngawih ngawih institution te hna hi a chak lova a buai a ni. Chu chu tunah hian kan endik leh ang a, contractor ho hi kan terminate mai dawn nge, engtin nge kan tih dawn, kha enzui a ngai a ni.

HON. SPEAKER : Aw le, a lawm awm e. Kan *Zawhna & Chhanna* hun a tawp ta a, business dangah kan kal ang a.

PRIVATE MEMBER’S RESOLUTION:

Kan dan bung 27(1) angin, *Private Members Business* kan tih ni a ni a, vawiin Ni 8.3.2024 ami tur hi Ni 29.2.2024 (Ningani) chawhnu dar khat khan Joint Secretary room-ah ballot niin, chuta tang chuan resolution 10 (sawm) thlanchhuah a ni a. A indawt dan chu Bulletin Part-II No 41 of 29.2.2024-ah kan inhriattir tawh kha. Kan Bulletin-ah khan a hmasa berah Pu Lalchhuanthanga resolution ballot chhuah a ni a. Amaherawh chu, kan ngaihthlak tak ang khan, Pu Lalchhuanthanga hi damlohna avangin session a rawn tel thei lo tlat mai a. Chuvangin, kan dan 127-na bung hnihna angin kan kal ang a.

Pu Jeje Lalpekhlua resolution - “*Ni 100 chhunga tih hlawhtlin tur sorkarin a lo duan lawk, tih hlawhtlin a ni chho zel hi a lawmawm kan ti hle*” tih a ni a. Resolution neitu, Member zahawm tak Pu Jeje Lalpekhlua tunah move turin ilo sawm ang u.

PU JEJE LALPEKHLUA: Pu Speaker, I remtihain, he House zahawm taka *Private Members Resolution* pulut theia min dahtu Pathian leh South Tuipui bial mipuite chungah lawmthu ka sawi a.

Pu Speaker, ka private members resolution lo putlulh - “*Ni 100 chhunga tih hlawhtlin tur sorkarin a lo duan lawk, tih hlawhtlin a ni chho zel hi a lawmawm kan ti hle*” tih hi he House zahawm takah hian ka rawn move a. Pu Speaker, hemi chungchang hi i remtihain han sawi zau ve ka duh a.

Kan Chief Minister (kan House Leader) zahawm takin Ni 100 chhunga sorkar tih tura ngaihpawimawh hmasak tur point 12 a puante kha a ropui hle mai a. Mizoram-ah pheichuan mipui te’n kan la hmuh leh hriat ngai loh tak niin a lang a, mipuite pawhin an ngaihven nghal hle tih kan hre theuh awm a. Tin he ‘*100 days programme*’ hi chak taka thawh a nih theihna tur leh a hlawhtlin ngeina turin State sorkara *General Monitoring*

Committee on Chief Minister 100 days Programme chu Commissioner & Secretary to Chief Minister chairman-na hnuaiah din a ni zui a. Hei hian kan Chief Minister-in ni 100 chhunga tih hmasak tur a sawi hi, a tih mai mai loh zia a lantirin ka hria a. India ram leh khawvel zau zawk kan thlir chuan, hei hi thil hi thil thar a ni lo tih kan hmu thei ang a. Kerala Chief Minister Pinarayi Vijayan pawhin February, 2023 khan Kerala sorkarin ni 100 chhunga an tih tur - *100 days programme* a lo puang a, media-ah pawh kan hmu chuai chuai a nih kha. Tin New Zealand Prime Minister Christopher Mark Luxon chuan, an sorkarin ni 100 chhunga an tih tur, 100 days action plan - *Government to do list* tia a sawi bawh chu a lo puang tawh bawh a. Khawvela ram ropui bera kan ngaih USA President Franklin Delano Roosevelt khan June, 25 1933 daih tawh khan ‘First 100 days’ tih thu hi radio-a thu a sawinaah a lo lam chhuak tawh bawh a ni.

Pu Speaker, kan Chief Minister-in a sorkar thar a laklulh ni a, Mizoram sorkarin ni 100 chhunga a tih tur, hmachhawp a duan kha a ropuiin, chona sang tak siam ngam sorkar kan nei hi mipuite tan a thlamuan thlak hlein ka hria a. Kan Chief Minister-in a kaih hruai sorkarin ni 100 chhunga tih a tum a sawite a tuk lawk atanga sorkarin a umzui nghal a, tih hlawhtlin a ni chho zel te hi a ropui ka ti hle a. Kan sum dinhmun a that loh avangin, Financial Year, 2024-2025 chu “*Year of Consolidation* (insawh ngheh kum) atan hman a ni ang” a tih ang ngeiin, kan Chief Minister-in ni 27.2.2024 khan Annual Financial Statement - 2024-2025 a pharh a. Budget Speech-ah Chief Minister-in kum 2024-2025 hi *sorkar sum remchem leh insawh nghehna kum*-ah a puang a. Minister leh MLA ten kan hriat angin, hamthatna tam tak an dawn thin chu a then tih tawpa, a then tih hniam a ni nghal te hi a ropui hlein ka hria. Minister te car thar leisak nghal thawm hriat tur a awm tawh loh bakah, kum 2024-2025 chhunga sum puk tur public debt hi ₹697.69 crore zetin tih hniam a ni bawh a ni.

Tin, lo neitute thlai thar – sawhthing, aieng, hmarcha leh hmunphiah te minimum rate-in a leina tur sum dah a nih tur thu a lo sawi pawh hi, *Agriculture Market Assurance Fund* siam a ni a. He fund atan hian kum 2023-2024 revised estimate-ah crore ₹10 ruahman nghal a ni bawh a. A tum ang ngeia budget-ah ‘D-A-H’ a ni ta hi, a lawmawm ka ti takzet a ni. ‘Minister tin te’n an department an enkawl dan tur road map ziakin kan pe vek’ a tih hi, a dikna kan hmu chho zel a. Tun Budget Session ah pawh hian Minister tin te budget pharh-ah *ZPM policy-oriented budget* a ni deuh vek mai te, ram mipui nawlpuiin an hriatthiam theih nan budget pharh a ni te hi a hlu ka ti takzet a ni. Kan Chief Minister-in sorkarin ni 100 chhunga tih tur hmachhawp a siam a sawi zingah sorkar-hna lak tur chu politics inrawlh theih lohna constitutional body MPSC kuta daha, MSSSB tih tawp a sawi te a takin kan hmu chho nghal zel te hi a ropui ka ti a.

Tin, SEDP Board 15 lai mai sorkarin thiah nghal a nih tur thu min tiam hnu lawka, sorkarin thiahna order a tichhuak nghal mai te; Resource Mobilization Department thiaha, a hautak lo zawk committee anga kalpui min tiam hnu lawkah a taka CM thutiam kan hmu nghal mai te hi a ropui hle a ni. Mizoram hmelma lian ber pakhat, kan

hmasawna tamtak ti thuanawptu ni bawk - *eirukna* do tura CBI koh luh a nih tur thu CM in a lo puan lawk, Mizoram Vigilance Department notification 28 December, 2023 hmanga CBI te hnena Mizoram chhunga corruption case hrang hrang chhui thei tura general consent pek anni tih kan han hmu nghal zat mai te kha, a ropui hlein ka hria a. Tin, ‘Lok Ayukta chu zir chian a nih hnuah a theih ang anga thuam chak tum a ni ang’ tih CM in a sawi lawk a, hun reilote hnu ah Lok Ayukta Amendment Bill pass nghal a ni te hi a ropui hle a. Tin, Mizoram-a Project endik tur din a nih tur thu a lo sawi pawh amah CM kaihhraina hnuaiah

(Panel of Chairman, Pu Rasik Mohan Chakma'n Chair a la.)

Amah, CM kaihhraina hnuaiah Mizoram State Project Monitoring Committee, Ni 22 Jan, 2024-a din a niha, mipui aiawh leh party hrang hrang aiawh memberte dah anni khan *mipui-sawrkar* min hmuh tirin ka hria a. Sorkar-hnathawkte tan hun hman dik leh time management tha zawk an neih theih nan *Biometric Attendance* office hrang hrangah hman tan tura sawrkarin hma a lak tur thu kan CM-in a puan hnu ah, Aizawl Smart City Limited fund hmanga January Ni 19, 2024 ah tender chhuah nghal a ni te, March Ni 15, 2024 ah Mizoram Secretariat-a hman tan theih tumin sorkarin hma la mek te hi thil chhinchhiah tlak tak leh lawmawm tak niin ka hria a. Tin, District hrang hrangah pawh hman chhoh zel a ni dawn tih kan hotute'n an sawi te, thenkhat phei chuan an hmang tan tawh tih kan hmu te hi a lawmawm hlein ka hria a. Kan CM-in tihtak zetin ruihhlo do a tum thu a sawi zawh hnu lawkah kan Excise Minister chak takin a bawhzui chho nghal char char mai han hmuh te hi, a ngaithlatu leh a hmutu nih hi a nuam hlein ka hria a. Hemi chungchanga chak zawka hma lak a nih theih nan Kohhran hrang hranga Thalai Pawl hruaitute, Central YMA te, ruihhlo-dona kawnga thawhhona tha nei tura sawihona mumal tak buatsaih a ni chho nghal te leh, kan budget-ah ruihhlo dona tura sum dah a ni te hi a lawmawm hle.

Tin, Aizawl khawpuia ruihhlo-tite an inlar nasatna hmunah Sorkarin ngawrh leh zuala duty a dah te hi a thlamuanthlakin, ‘sawrkar hi a thutiamah a ding zel a ni’ tih kan hmu a ni. Tin, ‘Boundary Committee din nghal a ni ang’ tih angin, Home Minister Pu K. Sapdanga kaihhraina hnuaiah din fel a ni tawh a, member-ah pawh mipui aiawh, a kim thei ang ber tur dah anni te hi a hlu takzet a. He *Boundary Committee* hi January Ni 24, 2024 khan a tum khatna atan an thukhawm tawh bawk a ni.

‘Pu Speaker’ kan ti dawn che nge; Aw, ‘Pu Chairman’ zawk; kha kha min lo hrethiam lawk la. Pu Chairman, i remtihain, ka Private Member Resolution lo put luh - “*Ni 100 chhunga tih hlawhtlin tur sawrkarin a lo duan lawk, tih hlawhtlin a ni chho zel hi lawmawm kan ti hle*” tih hi, he House zahawmtakah hian sawiho atan ka rawn move e. Ka lawm e.

HON. CHAIRMAN : Aw le, hei Private Member Resolution put luh kha, sawifiahna leh sawihona kan nei ang a. Kan tih dan angin member tinte minute 5 theuh kan ti thin a ni lawm ni kha?

PU LALMUANPUIA PUNTE: Pu Chairman, ding chung meuhin rawt ka'n duh chu - Minute 10 kan tih pawh khan kan leng lo ziah a, a bik takin kan senior member ho hi. Keini, first-timer ho hi chu, bell han hmeh hi chuan kan phu deuh zuk vek a, a hlui ho hi in danglam miah lo a, in sawilui par par zel a; chuvang chuan, kan tlai tlangpui zel mai a. Hei, vawikhat kan experience pakhat kan sawi lawk ang a – UN-Indegenious Session ah kan zuk kal khan, Bodo MP pakhat hian a a sawilui a ni. Anni chuan bell an hmang lova, hammer an rawn ti ta a. A vuak hnu pawh khan a sawi lui zel a; Chairperson thinur khan, *'Stop, I said, Stop. Stop means stop; this is not Indian Parliament. I don't want to see your face again in this floor,'* a ti mai a ni. Chuvang chuan, Indian Parliament System ah hian huntiam bituk bak hi an sawilui nasa lutuk thin a, heihi chu insum deuhhlekk thin ang u.

HON. CHAIRMAN : He House hian thiltih dan pangai kan neih ve kha, khami ang khan kal tum ila. Minute 5 kan ti ang nge, minute 10?

PU LALDUHOMA, HON. CHIEF MINISTER: Pu Chairman, Private Resolution hi chu dar 4-a zawh ngai a ni a, minute 10 kan inpek chuan a theihloh sa a ni. Minute 10 kan inpek chuan, ni hnih ah pawh kan zo thei lo a nih kha; chu chu a ni a. Chuvang chuan, minute 5 kha chu a tawk viau ang.

HON. CHAIRMAN : Minute 5 ti mai ang aw. Aw le, Hachek Bialtu, Pu Robert Romawia sawi turin ka sawm e.

PU ROBERT ROMAWIA ROYTE: Pu Chairman, ka lawm e. Hei, vawiin hi Tourism Minister zahawmtakin a sawi tawh ang khan *Lyuva Khutla* ni a ni a; vawiinah hian kan zinga kan Mara Members zahawm tak tak te, he House-a kan member-pui zahawm tak takte, Mara-mipuite leh Zoram dung leh vanga mipuite *Lyuva Khutla, Kut Chibai* ka buk duh a. Tin, *International Women's Day* a ni a. Hmeichhiate, a bik takin kan House Member hmeichhe zahawm tak tak pathumte leh Zoram-hmeichhiate chibai ka buk bawk a ni.

Tin, hei vawiinah minute a tam lova, pelh loh pawh kan tum ang a. Pu Chairman, pakhatnaa kan sawi duh chu - Ni 100 chhunga tihhlawhtlin tur point 12 thlan chhuah hi a mawi khawp mai a; mi tihdan te pawh a ni tih kan Mover khan a rawn sawi tawh a. Mahse, *'tihhlawhtlin awl lai lai an thlang ve deuh em aw'* tih ka rilruah a awm a. ZPM an manifesto te nen han en khan, *'manifesto kal pel lutuk si lo, ni 100 chhung hian kan tihlawhtling ang a, a lawmna te kan siam dawn nia'* tih rilru pu deuha ni 100 chhunga tih hlawhtlin tur hi thlang chhuak an ang mang e aw, tih kha rilru ah a awm a. Engpawh

ni se, chuti chung chung chuan tihlawhtlinloh tam tak hi a awm lawi a ni. Hei, minimum rate tuk leh procurement chungchang, hemi thlai chi 4 te kha point hmasa berah ka sawi duh a, Pu Chairman.

Hei, hunbi nei a ni a, hmunphiah hun a ni a; a liam mek a ni. Hetih lai hian chhungkaw tam takin an lo nghahfak ve, chhungkaw tam tak tan an ei bel a ni. Hemi hi kan lei lova, Zoram dung leh vanga hmunphiah chingtute tap leh manganga an awma leiba tam tak neia kan siam chung hian, he point chungah hian he House zahawm tak hian lawmthu kan sawi thei dawn em ni? Ka ngaihdan chuan, hmunphiah hi kan lei a, a nih loh paw'n price support kan lo zawrh chhin ang kha kan pe a nih chuan, lawmthu sawina motion hi move ngam tur ni ah pawh han ngai ta ila; a danga kan han tih hmaih thelhte kha chu thu dang ni ta se la. Chu vang chuan, he House-ah hian House Leader leh a changtu Minister-ten, 'hun tlem a la awm a lawm, kan sum neih sa hian hmunphiah hi kan lei ngei ang' tih emaw, 'price support kan pe ngei ang' tih te min tiam se la, a taka an tih dawn bawk chuan, han support ve pawh (he point bikah phei chuan) a phu em em a, support pawh ka chak em em a. Chuvangin, 'hmunphiah kan lei lo' tih hian a tawp ngawt lo ila; chhungkaw tam tak future kan tichhia a ni tih kha ka han sawi duh a.

First Session-a kan Governor Speech-ah khan - hmunphiah te, aieng te, sawhthing leh hmarcha te lei chungchang leh, budget-a dah chungchang a sawina-ah khan, khami procurement, a leia kha, *'in this financial year itself'* a ti a ni. Chumi awmzia chu, tun financial year hi thla chanve aia tam a la awm a, 'hemi chhung hian i lei ngei teh ang u' tihna a ni. Chuti a nih chuan, kei pawhin he resolution hi ka support thei tih hi ka sawi duh a.

Tin, pahnihna ah chuan, Boundary Committee hi sorkar hmasa lamah Dy. Chief Minister chairman-na hnuaiah din a ni a, tunah a thara din a ni leh a. Engpawh nise, base programme a ni a, kha kha chu an din a, a lawmawm a. A hmasaa din composition kha a fel tha khawp mai a, kha nen khan linkage feltak awm lova, a thar a engkim ngaihtuah a nih dawn chuan a fuh lo thei ang a, rorel tawhte a lo awm a. Kan sorkar hmasa boundary committee ah khan party tinte leh NGO pawimawh zawng zawngte an telna, boundary chungchangah chuan hmala an nih ang khan, he boundary committee thar hian kha nen khan linkage fel tak awm lova a thar din hi a fuh chiah lo deuh ka ti a; mahse, sorkarin an tih chuan, kan sawi phak a awm lova. A boundary committee-a member-te kha siamtha mai sela; 'thil thar ti ang deuha lan tumna a ni em, he boundary committee thar kan din hi' tih te he House-ah pawh hian sawirik a ni deuh a; mahse, sorkar file leh a chhunga thil awm turte kha chu a pangngai reng turah ngai ila. Kha kha thil thar, lawmthu han sawina tur tehchiam tlingah ka ngai lova.

Tin, MSSSB tihtawp chungchang hi, he House ah pawh kan sawi tawh a. Resolution pawh keini chuan kan rawn siam tawh a, mahse a tam zawkin min vote thla a, 'hei hi lawmthu sawina chi a ni lo' tih vaviinah hian kan sawi duh a. Hemi a awm loha vanga

harsatna tawh mekte, lungngaia awm, examination fee lo pe tawh tam tak an awm lai hi chuan, lawmthu sawi hi kan hmanhmawh lutuk deuh em aw. MSSSB ban a vanga thil tha pakhat tal sawi tur kan nei tawh em? Chu tih hma hma a, mahni leh mahni lawmthu han inhriha, mahni thiltih chungah lawm thusawi hi a la hma deuh em; *kan la ip hret thei lawm ni*, tih hi rilru ah a awm a.

Tin, ‘SEDP Board tihtawp’ tih hi, lawmthu han sawi chiama, Assembly House meuha Resolution point-a han dah tham niin ka hre lova. A chhan chu, SEDP Board kha co-terminus a ni a, sorkar tawp ruala tawp vek; hlawh pawh la tawh lo; an room te pawh kalh nghal vek; Sorkar order hmanga kalh vek tawh kha a ni a. He point hi, thil thar ti ang deuha lanna, media play-na chi khat a ni em aw, tih kha rilru ah a awm a ni.

Pu Chairman, ka hun ka pel hret a, vawiinah hian point dang pawh hi ka sawichak khawp mai a, mahse minutes 5 chhunga sawi zawh chi a ni lova. A tawpa ka’n sawi duh chu, vawiinah hian rilru zau tak puin ruling lam te pawh hian modified deuh hret kan duh ang chi - ‘he point hi chu tel lo se’ kan han tih ang chi kha min ngaihtuahpui se; ‘kalphung thara kalpui kan ni’ kan ti bawk a. Khang hmunphiah lei loh chungchang te, MSSSB chungchang te pawh kha kan lawmthu sawina tur point ah khan tel lo sela; a result hi lawmthu sawina tur kha a ni zawk a, a thiah kha a la ni ringawt lova; a tel lo tur dangte pawh a la awm mai thei e. Ruling lama tang pawhin tel lo tur chi kan nei mai thei;, khatianga siamrem loa point 12-a lawmthu han sawi tawp mai hi chu, support chi niin ka hre lova; ‘a hma lutuk a ni’ tih hi ka sawi duh a ni e. Ka lawm e.

HON. CHAIRMAN : Nichin khan Aizawl South-III Bialtu, Pi Baryl Vanneihsangin ban a pharin ka hria; sawi turin ka sawm e.

PI BARYL VANNEIHSANGI: Pu Chairman, nangmah kaltlangin kan Speaker hnenah lawmthu resolution ka sawi hma hian, han sawi lawk ka duh a.

Hei hun hmasa lama kan ngaihthlak tawh ang khan, vawin hi khawvel pum huapa Hmeichhia te Ni - ‘*Internation Womens’ Day*’ a ni a, hemi denchhen hian kan Speaker chungah lawmthu sawi ngaiin ka hria a. He ram rorelna In sang berah hian mipa leh hmeichhia te inkarah inthliarhranna te, inthleibikna te a awm loh zia lan tirna’n niminah kan inhriatlawk tir ang leh a remtihna anga *Chair* min luah tir ve avangin, Mizo Hmeichhiate zawng zawng aiawhin lawmthu ka sawi a. Speaker rorel thiam tak leh, midangte chawisan duhna nei kan nei hi kan chhuangin, kan thla a muang tak zet tih Pu Chairman, nangmah kaltlangin ka’n sawi lawk a ni e.

Kan Resolution-a kan hmuh ang khan, “*Ni 100 chhunga tihhlawhtlin tur sorkarin a lo duanlawk tih hlawhtling chhoh a ni zel hi a lawmawm kan ti hle*” tih a ni a. ‘Ni 100 chhung’ tih a ni a, ni 100 chhung kan la complete lova, kan hria a; a ni tiamah, a ram tiamah tunah hian kan kal a, ke kan pen ho zel a ni a; a hlawhtlinna kan hmu chho zel

a, kan hmu zel ang tih kan ring tak zet zet a. Chutih rualin, kan kalkawngah hian phunna tur te, sawisel tur te hi a awm kan ring; kan famkim lova. Nimahsela, harsa chung chung leh chak lo chung chung a sorkarin kan ram mipuite tana thatna tur zawka hma a lakna ah hetiang a tha thlah lova theihtawp a chhuah zela hi a chhuanawmin, a lawmawm hlein ka hria a. Chu lai pawh chu a pawimawh ber lai niin ka hria a; mipuite pawhin min lo hriatpui sela. Kan chaklohna ah te pawh kan tha tichak turin theihtawp min lo chhuahpui se, tiin kan sawm a ni.

Pu Chairman, he programme a tang hian ni 100 kan han ti a, nikhat hlutzia leh hman tangkai a hlutzia te, hman tangkai loh palhin awmzia a neih thuk zia, a negative zawnga nghawng a neih theihzia te pawh min hriatchhuah tir niin ka hria a. Ni 100 hlutna leh a tangkaina kan ramin a fiah leh zuala kan hre tur te pawh hi Pu Chairman, a lawmawm ka ti tak zet zet a. Ni 100 programme kan hmuh ang khan, hmasawn kan tum a, theihpatawpin tih tak zeta hmalak kan tum a ni. Chumi a tan chuan a to bul, a bulthut - a foundation hi a ngheh a ngai a ni tih kan hria a. Hmasawna tana 'a-hnuk' tia, he House ah pawh ka lo sawi tawh ang khan, sum leh pai chungchang kan sawi lo thei lova. Kan sum leh pai dinhmun kan hria a, hemi a vang hian insawhngheha, 'A year of consolidation' puan a ngai a ni tih kan hria a. Sorkar lama tang chuan ngaihtuah te pawh a zahthlak deuh em aw, tih te pawh a awm thei awm e. Amaherawhchu, huaisen takin kan nihna pawm ngama heng kan puang ngam te hi a lawmawm hlein ka hria a. Kan insawhnghehna hian kan ram tan rah tha a chhuah ang tih hi kan ring a, mipuite pawhin rinna nghat chungin, nghakhlal takin an lo thlir a ni. Hemi a vang pawh hian mipuite'n min hriatthiamna ah lawmthu ka sawi bawka a ni.

Leiba-tihhniamna pawh a mover in a rawn sawi tawh a, Pu Chairman, ka sawinawn tawh lo mai ang a. Eng pawh nise, hemi kan leiba tihhniam leh kan insawhngheh bakah hian, kan ram hmelma lian tak mai - *eirukna, hlemhletna* a kan fihlim theihna tur a tan he Ni 100 programme-ah hian a rawn inziak a ni a. Helai ah hian Pu Chairman, kan sawi duha chu, sorkarin a CBI consent a pek te hi lawmawm ka ti hle a. Kan sulhnu a mam tawka lo tih kan hria a, chhui ngai te rawn chhuiin, hmalak ngai te rawn la sela.

Tin, chumai bakah Lok Ayukta te kan han thuam chak a, anni pawh hmanni lawkah an Amendment Bill te pawh kan sawi tawh a; tiang khan, theihpatawp leh tihtak zetin sorkarin hma a la a ni, tih hi a langin ka hria a. Eirukna, hlemhletna laka kan ram a fihlim theihna a turin sorkarin hma a han la a, a ngaihpawimawh zinga a tel hi a lawmawm ka ti hle a ni.

Pu Chairman, a tawpna lamah chuan, hei, '*kan ram hmelma*' kan tih hian, sum leh pai chauh hi kan ngaihtuah thin a, chumi aia min runtun chu, *ruihhlo* a ni a; ruihhlo-dona kawngah sorkarin tih takzetin hma a la a, Kohhran hrang hrangte, pawl hrang hrangte, Central YMA te thlengin an phur a, 'kan CM te nen pawh hian thu hoin, programme te an duang ho a ni' tih te kan lo hria a, kan thla a muang tak zet a. Tin, ruihhlo do mai hi

a tawk lova, ruihhlo ngaite vei thlen phak hi a tul em em a, an tana tha tur leh anmahni pawh chhanchhuak tura sorkarin hma a lak ngei pawh hi ka beisei tak zet zet a ni.

Tichuan, mimal tak thil te pawh ka'n sawi ve lawk ang a, Pathian leh, Nu leh Pa te leh mahni inthununna te pawh a ni ang chu, sawi uar lutuk lo turah ngai ila. Chumi avang chuan, vawiin thleng hian zuk leh hmuam, ruihtheih thil lakah kan taksa te kan la vawng ve a. Chumi anih avang chuan, nun nawm zia leh malsawmna kawngka a nih zia te pawh hi ka hre ve niin ka hria a. Heng vang te pawh hian ka thalaipuite pawh hi theih tawpa mimal taka ruihhlo dona kawngah leh, sim duhna thinlung an nei a nih chuan, '*puih ka inhuam a ni*' tih lai pawh kha Pu Chairman, ka'n tarlang ni rawh se.

Awle, eng pawh nisela, a tawpna tak takah chuan, hei, *Mipui-Aw* portal te February ni 16 khan kan CM-in a lo tlangzarh tawh a. He sorkar hi mipuite tana ding a ni a, tin, mipuite'n an siam leh an thlanchhuah a ni a. Chuvang chuan, he sorkar hi in tan a awm reng a; khawngaihtakin in manganna te, in harsatna te, in lawmna te, in hlimna te min rawn hriat tirin min share ve ula kan duh takzet zet a, nangmahni pui turin, ram mipuite pui tur leh tihmasawn turin, an tha tichak turin kan awm reng a ni, tih kha min lo hriat sak se. Mipui thlantlin leh mipui sorkar a nih angin, 'he sorkar hian mipuite a ngaipawimawh em em a ni' tih kha ka tawpna ni mai rawh se. Pu Chairman, ka lawm e.

HON. CHAIRMAN : Awle, Pu Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Chairman, ka lawm e. Hei kan sorkarin huaisen takin, ni 100 chhunga tih tur hmachhawp te a nei a, chutah chuan hlawhtling takin vawiinni thlengin a kalpui chho zel a. Vawiin hi (ka sawi sual loh chuan) a ni 88-na chauh a ni a, ni 100 a la ni lova; a achievement hi tunah a tha lo zawnga comment peka, a tih lohte sawina hun a la ni lovin ka hria a; ni 100 a la tling lova. Chuti chung pawh chuan achievements tam tak a nei chho tawh a, tha taka a kal chhohpui hi a chhuanawm ka ti a. A tantirhnaa sum dinhmun that loh avanga *Year of consolidation* te puanga, chumi avanga chuan 2024-2025 budget chhunga kan public debt pawh crore 697.69-a a tlahniam nghal ringawt mai pawh hi achievement ropui lutuk a niin ka hria a.

Tin, chumi tihlawhtlinna atana a hmalak chi hrang hrang – 'State Marketing Board rang takin din a ni ang' a tih angin February ni 14, 2024 khan, *Agriculture Marketing Assurance Fund Management Board* din a lo ni a. Tin, budget preparation chungchangah pawh, 'Minister tin te an department enkawl dan tur road map pek a ni ang a, chumi road map hmang chuan mumal takin hma an la ang' a tih pawh hi, sorkar flagship programme 'hand holding policy - *Bana kaih* policy hmangin hetah hian ruahmanna a siam a, chuta tan chuan 2024-2025-a tana ruahmannaah pawh crore 200 ruahman nghal a ni bawh a. Hengte hi rang taka hmalak nghal leh hlawhtling taka a

kalpui mek a ni a. Tin, he policy pawh hi a mah lawnga hman ni lovin Central leh State sorkar hnuaia thawh mek leh scheme lo la awm thei tur hrang hrangte nena theih ang anga inthlunzawma, mipui vantlang te thleng phak tur, hlawkna zawk leh henga hnathawh dan tur kawng dap zel tum a ni bawk a ni. Hemi kawngah hian hlawhtling takin hma a la chho zel a, Mizoram Policy Coordinating Committee pawh kan Chief Minister Chairmanship hnuaiah din a ni a. Tin, ‘Resource Mobilization Committee din a ni ang’ tih a nih angin, Mizoram Resource Mobilization Committee chu kan Chief Minister zahawm tak chairmanship hnuaiah Ni 14th December, 2023 khan din nghal a ni bawk a ni. Tichuan, sorkar hnathawk aikal late chungchang department hrang hrangin an thehlut a; tin, chuta DP & AR in zirchianna a neih result pawh chu tunah hian nghah mek a ni a, hengte pawh hi rang taka hmalak mek a ni bawk a ni.

Tin, Anti-corruption measures chungchangah khan Mizoram Lok Ayukta zirchian a nih hnu ah ‘a theih ang anga thuam chak tum a ni ang’ a tih angin, Lok Ayukta Amendment Bill chu tun session ah ngei pawh hian passed a lo ni tawh a, chuta tan chuan Governor assent la nghah mek a ni a. Tin, chumi bawhzui turin CBI hnenah general consent pek a ni bawk a. Heng hmalakna chi hrang hrangte hi tunah hian pakhatmah delay a awm lova, bawhzui nghal zel a ni.

Tin, Mizoram State Project Monitoring Committee kan Chief Minister zahawm tak chairmanship hnuaiah 22nd January, 2024 khan din a ni nghal bawk a. Tin, punctuality, sap-thufingin, “*time is money*” a tih ang khan, kan sum kan ren bakah kan hun pawh dik taka hman a nih theihna turin, *Bio-metric attendance system* pawh introduce nghal a ni a. Chuvangin, kan hun pawh hi dik taka kan hmana, hnathawhna hmun a hun taka thlena hi he policy hian ngaipawimawhin, hmalak nghal a ni bawk a ni.

Tichuan, Pu Chairman, hun dik taka hman ka’n tum ang a, punctuality kan sawi bawk a. Kan sorkarin ni 100 chhunga tih tur a lo chhawp tawh hlawhtling taka a lo kalpui hi a chhuanawmin, a zahawm em em a avangin, he House zahawm tak hian lungrual taka he resolution hi pass-a, adopt turin ka’n appeal nghal a ni e. ka lawm e.

HON. CHAIRMAN : West Tuipui Bialtu, Pi Prova Chakma ilo sawm ang.

PI PROVA CHAKMA : Pu Chairman, ka lawm e. Vawiinniah hian hei resolution move tuin a sawi tawh a; 100 days programme chungchangah ah khan tlem han sawi ve duh ka neih a.

‘100 days programme’ tiha ka rilrua lo lang chu agriculture hnuaia *hmunphiah* hi a ni a. Sorkar hmasain hmunphiah mahal an cancel hnuaiah khan kan mipuite, a bikin keimahni biala mite’n an hlawkpui em em thin a, tunah erawh hi chuan hralhna tur nei lo khawpin a an awm a. Tukin pawh khan minrawn phone a, hralhna nei lova an awm avangin an khawngaihthlak em em a ni. Tuna MLA-a ka thut ve theihna chhan pawh he

hmunphiah vang hi a ni tih hi ka sawi duh a; chuvang chuan hmunphiah hi ka ngaipawimawh a. Hei, 100 days programme ah hian khan, ‘hmunphiah, tun financial year chhungin kan lei ang’ tih kha a ni a, mahse, lei a ni ta si lo kha a rilrunatthlak ka ti a. Chuvang chuan, hmunphiah lo hi chu eng vak mah hi sawi tur ka nei lova, thil dang hi ka ngaihtuah thei lo a ni.

Kan biala mite hi kut-hnathawktu, miharsa tak tak awmkhawm anni a, tunah phei chuan hmunphiah ringawt hi an buaipui a. Ruah a sur a, ‘engtin nge kan dah ang’ tiin an mangang a, a dahna tur pawh kan nei lova; Silpaulin tal pawh tunah hian ka pe thei lawk lova. Khatiang kha kan dinhmun a ni a. Chuvang chuan, he resolution hi engtin nge kei hian a pawmpui theih ang, tih te rilruah chuan a awm a. Pawmpui ila, kan bial mipuite’n min dem ka hlau bawk si nen.

Thil pakhat leh chu, Pu Chairman, 100 days programme-ah khan ‘years of consolidation’ kha puan a ni a. Amaherawhchu, Adviser to CM tur mi-panga lai kha ruat anni leh si a. Tiang hi chuan engtinge inrenchem hi kan kalpui theih ang, tih kha ka rilruah a awm a nih chu; min haw lo ula, Adviser to CM-te khan; mahse, sawi chhuah a ngai si a. Senso kha a hautak viau dawn a, thla khatah nuai 15 chuang te kha a lo ni a. Chuvang chuan, inrenchem tih laia ka rilruah awm chu - khatiang senso hautak nen khan engtin nge kan inrenchem teh lul ang, tih kha a ni. Thildang - old age pension te, punctuality maintain te kha a tha ka ti a. Kei pawh hi ka hnathawhna hmunah chuan punctuality maintain thin tu ka ni a. Amaherawhchu, kut-hnathawktute hi ka ngaipawimawh annih avangin, he resolution hi chu thlawp harsa ka ti a; min lo hrethiam ula.

Tichuan, he resolution-a ‘100 days’ tih hi, tunah ni 100 a la tling chiah lova. Thil reng hmanhmawh deuha thil tih hi chuan tihsual palh a awl thin a ni. Sap-thufingah pawh kan hmu a, “*Slow and steady wins the race*” tih kha. Chuvang chuan, thil tih thut thut hi chu tihsual a awl nge nge thin si a, tih kha ka sawi duh bawk a.

A tawpnah chuan, vawiin *International Womens’ Day*-ah hian, heta MLA, ka hmeichhiatpuite hi a hmasain - I want to wish them a happy Women’s Day; heta awm zawng zawngte, Assembly-a thawk hmeichhia zawng zawngte leh Mizoram pum puia ka hmeichhe puite he Womens’ Day hi hlim taka hmang turin duhsakna ka hlan a, chibai tha ber ka buk che u a ni. Ka lawm e.

HON. CHAIRMAN : Hriatthiam ka ngai a, membrete an hminga koh hi ka la harsat rih a. Awle, Pu H. Ginzalala, Champhai North Bialtu ilo sawm ang.

PU H. GINZALALA : Awle Pu Chairman, ka lawm e. Hei kan subject a zau si a, sawi dawn chuanin minute 5 lek a ni si a. Chuvangin, point hrang hrang ka hrut

dawn lova. Resource mobilization chauh pawh hianin min daih dawn lo zawk a, chulai te chu kan hrut ang a.

Engpawhnisela, Member zahawm tak Pi Prova-i rawn sawi kha tlem ka'n comment ve zeuh ang a. Adviser to Chief Minister kan nei a. Sorkar chuanin keimahni vangin senso tam deuh a nei dawn a ni. Amaherawhchu, '*hei hi inrenchem vang a ni*' tih kha kan sawi duh a; sum keimahni vanga sen aia tam daih kan thawkchhuak dawn; chu chu a tum a ni. Chuvangin, cheng za senna ah crore za tel kan phur chhuak dawn a ni.

Resource Mobilization chungchangah hian hma kan la a, a lawmawm hle mai a; a committee te pawh kan din a. 'Resource' kan tih hian, human resource te, financial resource leh thil dang dang forests resource te kan nei a. Hetiang lampang hawia hma lakna hi kan la nei lutuk lova, Mizo mipuite hianin; tunah hian hma kan han la tur hi a ropui khawp mai a. Kan resource hi a tlem a ni lova, under-managed resource a ni, tunah hian. Hei hi kan hriatthiam a pawimawh khawp mai a. Kan resource hi kan manage thiam lova, chuvanga tlem anga lang mai a ni a; tunah hian hma kan han la chho dawn a ni a, a lawmawm ka ti khawp mai a.

Pakhatnaah chuan, *human resource* hi han sawi ta ila. 'Tunah hian kan ramin a mamawh ber pakhat sawi teh' min ti se, *capacity building* hi ka ti ang, kei chuan. 'A dawt engnge' ni min ti se, *capacity building* tho; 'a pathumna engnge ni' ti ta se, *capacity building* tho. "*Sa zawng zawngah uisa a tui ber a, a dawtah chuan a thing*" tih ang deuh a ni. Chuvangin, *capacity building* hi kan human resource develop-na tur a ni a, tunah hian hotute'n hma an la mek a ni. Kan thalaite'n hna an thawh theih chuan kan ram hi kan develop ang; chutianga ti thei tur chuan, human development hi a pawimawh.

Hei, member dangte pawhin an rawn sawi tawh a. Sorkarin infrastructure tam tak kan din a, kan din mek zel a, kan din zel dawn a. Mahse, in sawi chu hei hi a ni, ka lo notice chu - A fail thin, tourist lodge a ni emaw, cold storage a ni emaw, eng project pawh; 'engvang nge', kan tih chuan, human resource-ah hian hma kan la ngai lo a ni. Chuvangin, sum hi sorkar hian human resource-ah a tam thei ang ber seng rawh se, a inchhir chuang lovang. Mihring tluka develop tur hi kan awmlo a ni.

Physical infrastructure lian pui pui - kawng a ni emaw, bridge a ni emaw, eng pawh lo ti pawh ni sela, a mihringa kha a enkawltu tur, a tipungtu tur, a siamtu tur, a hman tangkaitu tur lam hi kan inzirtir loh chuanin awmzia a nei lo a ni. Chuvangin, human resource development lam te kan sorkarin a ngaipawimawh a.

Tin, hei 'year of consolidation' te kan ti a, a 'authority measures' te kan ti a, chu chu financial resource lamah kan management hmalak tumna a ni. Hei hi a pawimawh khawp mai a. UT hun atang khan sum a rawn tam thut mai a, kan hman thiam lova. Tunah hian he thil kan tih hi a hun tawh tak zet a ni.

Tin, resource mobilization-ah kal leh zel ila, kan hun a chep a. Motor vehicle te hi a pung chak em em mai a ni a. Kum tin sing 2-3 motor thar kan lei ziah a. Chutah chuan a insurance hi phai company te'n company an rawn din a, sum pai tam tak kan pe ta thin a ni. Vawi khat pawh kan chhut ve mai mai a. (ka hresual viau paw'n ka ring a; mahse, idea kan neih nan) Kum khatah hian crore 40-50, crore 60 dawn te pawh hi insurance avangin mizo mipuite pawisa hi phai lamah hian a luan luh ka ring a ni. Heng te pawh hi 'engtin nge kan tih ang', tih laia pawh hi kan ngaihtuah a ngai khawp mai, he House-ah hian. Chuvangin, kan thalaite hian Insurance company hi din ve sela, insurance pek te pawh hi a chakawm deuh ang.

Hei, motor hi tlem ka nei ve a, insurance-ah hian kumtin nuai eng emaw zat ka pe ve a ni. Chu chu lak let, chhawr let tak tak a awm thei si lo. Chuvangin, insurance avang ringawt pawh hian kan inseng hnem khawp mai.

Tin, a dawt lehah kan resource kan hman tangkai miah loh (Pu Chairman, reilote; ka sawi laklawh a) leivung ringawt pawh hi resource a ni. Ka'n sawi duh chu, thil hotea kan ngaih hi a technology a awm chuan, resource a ni zel. Chuvangin, resource mobilize tur hi kan ngah lutuk kan ramah hian. Leivung hi khulaiah khuan kan paih thin. Mahse, tunah hian sorkarin development eng emaw project han siam ta sela, retaining wall tha tawh kan siam ang a, khutah kawr thlang deuh atangin leivung paihna hmun kan siam ang a, hmun zawl a lo chhuak ang a. Tlangram kan ni a, hmun awi kan ni a; chuvangin, space hi kan siam a ngai. Kan ram kan develop lohna chhan chu, space kan nei tlem lutuk hi a ni. Chuvangin, leivung hi kan siam a ngai.

Aw le, sawi tur ka ngah hle na a, ka hun a tawp tawh si a. Pu Chairman, ka lawm e.

HON. CHAIRMAN : Pu Lalrinsanga ilo sawm ang.

PU LALRINSANGA RALTE: Pu Chairman, ka lawm e. Vawiinah resolution kan han sawiho leh dawn a ni a. Vawiina kan resolution sawiho tur hi a la hma mah mah em aw, tihna ka nei deuh a. Ka hmaa sawitute'n 'ni 88 chhung a ni' an ti a; amaherawhchu, ni 12 chauh a awm tawh a. He ni 12 chhung hian vawiina kan tih loh, kan tih kim loh leh kut-hnathawktute, mipui harsa zawk te'n an beisei leh an ta tur anga kan ngaih te hi kan ti hman dawn a nih chuan a lawmawm viau turah ka ngai a.

Tin, he resolution ka lo en hian, Chief Minister-in ni 100 chhunga sorkar tih tur a puanna ah hian, a thu hi a tha viau a, amaherawhchu, sorkar hmasa kalpui tam tak tho kha a ni a; a thu rawn thlak kual ang deuh te a ni a. *Entirnan:* Boundary Committee te pawh sorkar hmasaah Dy. Chief Minister hoa din a ni a. vawi 4-5 vel thutkhawm a ni a, tun term-ah vawi khat thut leh a ni a. Chutiang chuan, Resource Mobilisation Committee pawh hi term hmasaah khan a awm a, crore eng emaw zat an lo lalut tawh a. Sorkarin, 'hei hi kan ram tan a tha; chuvang chuan, department-ah i siam ang u' tiin Cabinet-in a

pass a; tun sorkar hian directorate-a siam kha a thiat a, committee angin a rawn kal chhonzawm leh a ni mai a. Han danglamna vak kha a awm chuangin ka hre lo a.

Tin, helaia ni 100 chhungah tih ngei ngei tura kan ngaih, mi-rethei leh harsa zawk kut-hnathawktute tan ₹11,00,00,000 vel, D-A-H tiin kan dah a; kan dah bo vang vang mai a. Hmunphiah ah harsatna namen lo kut-hnathawktute'n an tawk a, Sorkarin mawh kan la leh ngam si lo va. Governor thusawi-ah sorkar huaisen, sorkar langtlang leh sorkar mawh la ngam a nih tur thu sawi siin company pakhat, vai kan mawhpah leh mai mai tho a. Chuvang chuan, vawiinah hian lawmthu sawi vakna tur hi a awm em maw ni le, tih kha ka rilruah a awm a.

Tin, Pu Chairman, kan member, ka hmaa thusawituin a rawn sawi kha a tha dawn hlein ka hria a. *Year of Consolidation*-ah kan puang a, sum leh pai siam thata insawhngheh kum a ni a, austerity measures atan te pawhin kan ti a. Adviser to Chief Minister PA pakhat hlawh ringawt pawh hi SEDP Board-a staff kan neih mi palite hlawh belh khawm pawh khan a phak lo a ni a. Chuti chuan, Adviser to CM leh an staff hlawh tur, thla khatah ₹15,00,000/- mai a ni lo, an OE te nena chhut phei chuan kum khatah chuan a tam viau ang. Amaherawhchu, chu chu kan Adviser to CM rawn sawi ang khan, ₹1,00,000/- an sena cheng vaibelchhia vel an thawh chhuah zel theih dawn chuan, Adviser to CM hi sawmhni vel law law nei ila, kan ram tan resource mobilize na'n a va tha zawk awm ve, tih kha ka han rawt ta daih a ni. Pu Chairman, ka sawi tum loh zawngin ka sawi ta a nih chu. Adviser to CM te'n khatiang zah pawisa an thawk chhuak thei dawn a nih chuan, a lawmawm hle ang.

Vawiinah hian kan House Leader hnenah pawh rawtna ka'n thlen duh chu, Adviser to CM kha siam belh leh hram teh se, khatiang pawisa an thawh chhuah zel theih dawn chuan, tih kha ka rilruah a awm a. Chuvang chuan, khating a nih loha, hei hi kan insawimawina mai mai a nih dawn chuan, tun kum hi *Year of Consolidation*-ah kan puang ta rau rau a, austerity measures lain tun kum na na na hi chu, kan insiam that kumah te hi chuan pawisa ren thei ila chuan a va'n duhawm awm dawn ve aw, tih kha ka rilruah a lo awm a.

Dik tak chuan Pu Chairman, tunah hian '*Sustainable Development & Reforms Policy*' tih, ZPM kan Sorkarna Bu, kan sorkarna chhan pakhat, chapter 10 ah hian, 'inrenchem beihpui thlak a ni ang a, Chief Minister leh Minister ten hma an hruai ang a, sorkar motor pakhat bak an kawl lo vang' tih a inziak a ni. Vawiinah hei pawh hi kan bawhchhia; a tak takah chuan kan sawi angin ka awm thei lo a. Hei hi Protocol, kan Minister leh kan CM te hian...

(*Hon. Dy. Speaker-in Chair a la a*)

Aw le, Pu Dy. Speaker, ka vannei thei hle mai; minute khat vel min han tibuai leh a.

Kan CM leh kan Minister-te hian dan, a security angah pawh kawl zat tur hi an nei ve hrim hrim a ni. Tunah pawh kan Minister ten official car te, support car te pawh an kawl ngei ngei a ngai; kha kha hre reng chungin mipuia kan inzawrnaah chuan, ‘Chief Minister leh Minister te’n sorkar motor pakhat bak kan kawl lo ang’ kan ti a, vawiinah hian kan sawi angin kan awm leh thei si lo a ni. Chuvang chuan, tuna kan resolution te pawh hi han ngaihtuah hian, a lawmawm em em eng emaw zat chu a awm ang; amaherawhchu, mahni sorkar infak nan chuan a la hma deuh em? Kut-hnathawktu thingtlang mipuite tana ka tih theih chin te, kan tih tumah kan sawi anga kan awm loha, sum renchem chuang si loha kan hman hiau hiau karah hengte hi mipui hruai kawi zawnga hlawhtlinna anga kan inlawmpui zel dawn chuan, kan sorkar hi a kal dan a va dik dawn lo em, tih kha ka rilruah a awm a. Chu chu Pu Dy. Speaker, ka han sawi ve duh a ni e. Ka lawm e.

HON. DEPUTY SPEAKER: Ka bial thenawmpa a ni a, ka’n duhsak deuh che a. Tunge sawi leh ang? Lunglei South Bialtu Pu Lalramliana ilo sawm ang u.

PU LALRAMLIANA PAPUIA: Pu Dy. Speaker, ka lawm e. Vawiina kan sawiho tur hi *100 days programme* chungchanga lawmthu sawina kha a ni a. Hun khawhral loh nan ka’n sawi zar zar mai ang a. A vaia sawi dawn chuan sawi zawh sen a ni lo a. Amaherawhchu, 100 days programme tarlan zinga ka rilruin ka lo vei leh pawimawh ka tih em em thin point hnih emaw chauh ka sawi lang ang a. A dang pawh kha tha ka ti vek a. Amaherawhchu, mi dangin khang kha in lo sawi lan tam deuh te a nih avangin kei chuan ka chuk nawn tawh lo mai ang a.

He *100 days programme*-ah hian ‘punctuality and time management’ tih an rawn dah tel hi tha ka ti lutuk a, a bawhzui dan han en hian lawmawm ka ti bawk a. Hei, *time management & punctuality* hi keima mimalah chuan, mihring ka hmuh phata kan han khawsak ho hian, mi-puitling a nih leh nih loh ka tehna hmanraw pawimawh hmasa ber chu – ‘a punctual em’ tih hi a ni; chu chu thil engkimah, an chet zuinaah leh sorkar hnathawhah pawh tehfung pawimawh a ni tlat a ni. Chuvang chuan, hei hi kan CM-in ngaihpawimawh hmasaka a han nei hi lawmawm ka ti takzet a. ‘Hun vawn dik loh hi rinawm lohna a ni’ tih te pawh hi kan inzirtir a thain ka hria a. ‘*Better late than never*’ tih te kan sawi a; tlai te hi kan han sawi mawi a. A chang hi chuan, ‘tlai lutuk ai chuan tih loh malek hi a fuh zawk a ni’ tih te pawh hi rilruah a awm thin a.

Tichuan, biometric attendance system hmanga min han kalpui te hi lawmawm ka ti a. Hei pawh hi, thlen hun dikah a thleng em, tih ringawt teh nan hmang lo ila; hun dik takin a hmang em; a tawp thleng a awm em, tih teh nan hmang ila; ban dawnah te pawh record zel ila, tih te pawh rilruah hian a awm a. Chutianga kalpui tur chuan ka’n beisei deuh hlek a. Heng *punctuality & time management* kalpui an tum dan hrim hrim te hi ka hmuh hian ka rilrua ka lo vei leh ngaihpawimawh a nih avangin, kei chuan a lawmawm ka ti em em a ni. Chuvangin, hun vawn dik mai ni lo, ai kal thlengin a veng

dawn avangin, hei hi a tha ka ti tak zet a. Chuvang chuan rilrua ka lo vei em em *punctuality & time management* chungchanga hmalakna hi a lawmawm ka ti zual em a, ka'n comment duh bawka a ni.

Tin, a dawt lehah chuan, keimah mimalin 'hlawhtling se, a takin kalpui se' tia ka lo it em em thin, *Mizoram Rights to Public Services Act, 2015* a taka hmang ngam tura sorkarin hma a'n la ta hi lawmawm ka ti a. 'A hma pawhin kan nei reng; kan hmang reng alawm' kan ti a ni maithei a. Mahse, a taka hmang tur leh kalpui tur hian department kan nawr ngai lo a ni. Tun tumah erawh chuan kan sorkar thar hian department-in an zawm loh ngam loh turin a nawr ta a. Hei hi tha ka ti a; 'engnge a nih' tih pawh hi mipuiaah kan in zirtir hmasak a ngaiin ka hria. Rawn thlirtu mipui dangte pawh an awm ang a, ka'n sawi duh chu, he Act hi department leh sorkar hnathawkte'n mipui tana hnathawk an ni tih an inhriatna turin leh, an thawh chhan ang ngeiin kan mamawhte hunbi dana min siamsak chhunga min tih hlawhtlin sak ngei ngei tur atana service min pekna tur a ni. He mi kawngah hian mipuiaah pawh awareness kan pek a ngai a.

Entirnan: Driving license - Smart Card nena pek chhuah te hi ni 4 chhungin an ti hlawhtling ngei ngei tur a ni. Tin, License - Smart Card renew phe chu ni 2 chhungin an ti hlawhtling tur a ni. Tin, Job Card ni 15 chhungin min pe ngei ngei tur a ni, tih te kha department-ah kan claim thei a ni. Mipui tana hmanraw pawimawh tak leh hriam tak a ni a, hei hi kan mamawh em em a, a nih angin, a taka hmang lo thei lo tura min han nawr hi lawmawm ka ti a, official leh department lam pawh hemi chungchangah hian mipuite paw'n kan nawr luh a ngai dawnin ka hria. Hei hi a nihna takah chuan, department-te pawhin, 'hemi hun chhung hian kan ti thei ang' tia an inhuamna huang chhung zelah dan hi siam a ni. Chuvang chuan, an inhuam chin angah dan siam a nih chuan, tihlawhtling ngei turin he hmanraw hmang hian kan nawr a tul dawnin ka hria a. He *Services Act* hi a hman loh hram dan kan zawng a nih chuan, computer inchhawp reng sia, type writer la hman talh duh zawk ang kha kan ni ang a. Chuvang chuan, hmanraw hriam leh tangkai kan neih chuan hmang ngei ngei turin sorkar leh mipui atang hian department-ah kan kalpui a tul tak zetin ka hria a. Ngaihpawimawhawm ka ti em a, ka han sawi uar deuh bawka a ni, hei hi.

A dang pawh hi tha ka ti vek a. Vawiin ah hian hmunphiah chungchang resolution kan sawi lova, ruihhlo chungchang resolution bik kan sawi lova. Kan hriat atan tha ka tih chu, he resolution hi, "100 days chhunga programme CM-in a duanah *hnathawh a tum tak tak a ni* tih rawn lang leh, chumi bawhzui danah chuan a lawmawm kan ti em a, kan lawm a ni" tih a ni. Zoram mipui leh thalaite pawh (social media-a an comment leh an tawngka te kan hmuh hian) an lawm a ni; kan CM-in *100 days programme* a puang leh, ti hlawhtling tura a hmalakna, a bawhzuina han thlir hian, keini House member-te hian Zoram mipui lo thlirtute leh thalaite pawh an rilru put hmang kan thlirin, lawm loh talh kan tum chuan, kan dik lo zawk ang.

Chuvangin, lungruual takin he resolution hi pass a awm ngawih ngawih ka ti a. Vawiin ah House member-te'n sawi nawi lova, he resolution hi min pass pui ngei tur pawhin ka sawm duh a, kei pawhin ka thlawp a ni, tih kha ka sawi lang duh a ni e. Ka lawm e.

HON. DEPUTY SPEAKER : Aw le, tunah Pu RM Chakma, Tuichawng Bialtu zahawm tak ilo sawm ang u.

PU RASIK MOHAN CHAKMA: Pu Dy. Speaker, ka lawm e. Hei, Pu Jeje Lalpekhlua Private Member Resolution kan sawi ho a; 'Ni 100 chhunga tih hlawhtlin tur sorkarin a lo duan lawk' tih thleng hi chu a lawmawm lutuk a, a pawm-awm a, '*tih hlawhtlin a ni chho zel hi a lawmawm kan ti hle*' tih hi chu pawm har ka ti deuh a ni.

He *Private Members' Resolution* ka hmuha ka rilrua awm chu, i dinglama thu kan pute hi an complacent hma deuh em aw; an hna ah an lungawi hma lutuk em aw, ka ti deuh a. Time bound neia target siam hi a tha a, kan House Leader (kan Chief Minister) zahawm takin a puan pawh khan, 'a va han tha dawn em' ka ti a ni. Hetianga programme te time bound neia siam hi a tha a, programme siam hi thil tih kan tumna a ni a. Sorkar inrelbawlnaah hian tu tan pawh a bu ang thlapa tih a harsat zia chu kan hria a, a pawm theih a. Mahse, a enga mah hmaa lungawi nghal ringawt hi chu mipui tan a him lo deuh em aw, ka ti a. Insit deuha hnathawh chho zela, mahni inenfiaha retrospection nei chungin an thawk lo ang, tih kha a hlauhawm a. House zahawm takah hian he lawmthu sawina resolution han pass hi chu, a hma deuh e, ka ti a ni. Hlawhtlinna chu an nei a, "minimum price support will be fixed for ginger, turmeic, chilly & broom at which the government will procure it from the producers" a in ti a. Sorkar-in private entrepreneurship hnenah khan hmunphiah man ₹100/-ah a fix e, a ti a; a chingtu farmers-te khan a aia to an hralh theih chuan a tha, a tlawm berah ₹100/- in sorkar-in procure dawn, an ti a ni. Chuvangin, 'government will procure it from the producers' tihah hian a hlawhtlinna kan la hmu lo a ni.

Lehlamah producers te an mangang em em mai a, social media (youtube, whatsapp) ah an sawi nasa si a; kan mipuite an mangan lutuk khan tute emaw an phone reng a. Chuvangin, lawmthu sawi hi chu a harsa ka'n ti deuh a ni. A chhan chu, enga mah hma a lawmthu kan sawi hi, mihring ve mai kan ni a, dinglama thute kan intihlungawi hma lutuk chuan, an kal zelna ah insit deuhin an kal ang, tih a hlauhawm a. Chuvang chuan, he resolution hi tihian kal zawk se – "Ni 100 chhungin programme kan siam a, mipuite'n election laia thusawia vangin kan lawm a, thinlung takin hna kan thawk chho zel ang, anmahni hamthat nan" tih zawngin ni ta se la chuan, lungruual takin kan pass theih ka ring a. Chuvangin, he resolution hi tlema tih danglam loh chuan. 'Engpawh ni se, hmunphiah hi kan leisak ang e; kan procure ang e' tih talin a concern minister emaw, kan house leader zahawmtak emaw hian he House hi tiam sela, veilama thute pawhin pass-pui kan hreh miah lo ang, tih kha ka sawi duh a ni e. Ka lawm e.

HON. DEPUTY SPEAKER : Pu K. Hrahmo, Palak Bialtu ilo sawm ang.

PU K. HRAHMO : Pu Dy. Speaker, ka lawm e. ZPM sorkar a lo din hian, an lakah beiseina sang tak ka nei a. Kan House leaderte, kan minister-te leh MLA zahawm takte kan biala an kala an thil tum dan te an sawi khan, an lakah beiseina sang tak ka nei ve a; ‘hetiang a nih chuan kan tha viau dawn e’ tiin, an term laia MLA han nih pawh hi ka inchhuang ve viau a ni.

Vawiinah, *100 days achievement* chhuang takin he House-a resolution an luhpui atang hi chuan ka hmuh dan a tlahniam hret a; a chhan chu, sum lamah kan pachhiat zia kan hre vek. Nimin, ni hnih-thum kal ta ah khan budget tlangpui sawina kan nei a, *year of consolidation* kan puang a. ‘Year of consolidation’ chu Mizo tawngin – ‘inrenchem’ tiin kan dah a, a mawi khawp mai, a family ang leh a mimal ang pawhin. Tunge inrenchem chu duh lovang? Kan duh vek; kan mamawh vek. Hei hi chu, kei ka hmuh danah chuan, lan mawina mai ah ka ngai. Kuang chhunga ruang tawih tawh rimchhe em em, a chung a puan mawi var taka kan khuha lang mawi ta em em mai ang hian; hei hi chu lan mawi tumna ah ka ngai mai.

Chutianga kan kal mawp mawp lain, eng emaw austerity measures tak tak lakna awm chuang lovin, heti hian *year of consolidation* kan puang a; hei hi chu a inhmeh lo; a la hma hret a ni. Tin, austerity measures lakna hi a awmin ka hre lo bawk a. Hmanni a kan House Leader-in austerity measures an lak dan a rawn show a, ‘paper a leh lamah pawh kan zia a, kan paih mai mai duh lo’ a tih kha, austerity measures an lak awmchhunah ka ngai. Ka hmuh sual nge, ka hre sual ka hre lova. Tin, PSU hi panga nge, paruk kan nei ve a, Mizoram-in. Tun hma kha chuan MLA hote hengah hian chairman te an ni fur a, MLA hlawh ringin tikhan chairman nihna te an chelh a. Tun tumah erawh chuan, hei, (ka ti sual lo ang chu maw) MLA nilo, hlawh pek chawp ngai mi eng emaw zat chairman ah kan dah a. Hetiang sorkar hi a ni a; han inchhuan viaua resolution hial han pass-na khawp achievement awmin ka hre lo a ni.

Tin, ka inzawhna ber chu – Kut-hnathawktute atanga hmunphiah te, aieng te, hmarcha te, sawhthing te leisak kan ti a, a pawisa pawh vaibelchhe 100 chuang kan dah tawh kan ti a; Mahse, ‘aieng lei a ngai rih lo’ kan ti leh si a; chutianghin hmarcha te, sawhthing te pawh kan ti a. ‘A sum pawh kan kutah a awm reng’ ti siin, hmunphiah lei hun lai tak, a chingtute’n an mamawhna san lai takah hian kan pawisa daha kan insawi kha kan phawrh ngam si lovin, hetah vaipa kan mawhchhiat leh mai mai te hi, a paw ka ti tak zet zet a ni. Chuvangin, ka rilrua awm chu - hmingthatna chu kan duh; sawrkar tha anga mipuia lan kan duh, mahse chutianga hmingthat lakna tur chu a awmin ka hre lo. Thiandun ram kal chanchin an sawi kha ka rilru ah a lo lang a - A upa zawk a ding a, a thianpa hnenah, ‘*Thianpa, nang Tlaiberh nge i duh zawk, kei Vahrit*’ a tih ang deuh kha a ni a. Hmingthat lak kan duh; lan mawi kan duh; mahse, a tak awm chuang si lo hian he sorkar hi kan kal mekin ka hria a, paw ka ti takzet a ni. In thil tih tawhahte thil tha

sawi tur pakhatmah a awm rih lo; mahse in tum te in sawi chhuah atang te erawh chuan beiseina sang tak ka nei. Nichina ka sawi tawh ang khan, resolution meuha lawmthu sawiin, ‘*hei hi kan ti a ni*’ tih tur leh chhuan em em tur, resolution meuh pass-a va pawm tur ka la hmu lo a ni. Chuvangin, he resolution lo luh atang hian he sawrkar ka hmuh dan hi a hniam sawt. A kg buk ta ila, a rit zawk pawh awm lo; 50:50 ah ka dah mai, kei chuan. Chuvangin, a thatna ka hmu lo a, a chhiatna em em pawh ka la hmu bawh rih lova; mahse, resolution meuh pass tur chuan tha lo ka ti. Chuvangin, a kg-in buk ta ila, 50:50 ah ka dah che u. Pu Dy. Speaker, ka lawm e.

HON. DEPUTY SPEAKER : Pu T. Lalhlimpuia, Lunglei West Bialtu ilo sawm ang u. Chair kan han inthlak lawk ang e aw.

(*Hon. Speaker-in Chair a la a.*)

HON. SPEAKER : Sawi tan rawh le.

PU T. LALHLIMPUIA : Pu Speaker ka lawm e. Lehkhabu lar tak pakhat, ‘*You are in Charge - Now what?*’ tih ziaktu chuan Franklin Roosevelt-a kha 1933-a US President lalthuthleng a thut khan, khawvel economy kha kan hria a - *Great Depression* a hmachhawn mek a ni. Chu hunah chuan bank an khar a, investors ten sum hman an phal lova, bank deposit a hniam em em a, bank zawng zawng deuhthaw deficit in an kal a. Tin, hna nei lo kha mi 4 zelah 1 ang anni a; chutah chuan, Lalthuthleng a thu chiah kha, decisive action a la a ni. Hun harsa tak karah quality action a la a ni. Kan hria a, *Great Depression* in khawvel a nuai nasat zia chu. Tun tumah pawh hian Mizoram chu hei ‘*Great Depression*’ ti hial pawh ni ila a awm thoin ka hria a, chutiang dinhmunah chuan kan awm a. Chutih laiah chuan kan CM-in *100 days programme* a rawn siam a, vawiin ah hian ala hlawhtling vek lo a ni. Ni 88 vel a ni kan ti a, ‘a hlawhtling mek hi a lawmawm kan ti hle’ tih resolution, vawiinah hian Pu Jeje Lalpekhlua, South Tuipui Bialtu-in a rawn chhawp chhuak a, sawiho nuam tur tak leh Zoram mipuiin an bengkhawn em em a ni a, vawiinah thiam tak maiin a rawn present a.

Football pet ringawt hi a thiam lova, thil dang pawh a thiam tel a; a thiam zel turah pawh ka beisei bawh a. Tunah hian ka’n tarlan ve tur chu, *Zoram mipui Aw* website kaltlanga lungawilohna sawrkara thlen thei tura kan CM-in action an la hi, a ropui ka ti a. Hei hian a entir chu - fiah a ngam a ni; lungawilohna thlen ngam khawp sorkar siam a tum a ni. Chhin a ngam a ni. Diklo lo thleng tawh leh, thleng mek leh, lo la thleng tur pawh ven a duh a, chutah chuan mipuite a sawm a ni; mipuite participate turin, telve turin a sawm a ni. Chutiang ti thei tura heng a’n duang chhuak te hi lawmawm ka ti a. Tin, a security tha em em mai, inchhui awlsam em em maia a’n han siam te hi a nachang a hre hlein ka hria a, heng a’n ti hlawhtling te hi a ropui ka ti em em a ni. A website chhung te pawh han luhchilh ka chak viau a, nimahsela hun kan nei rei lova, hun chanve kan hman leh mai tawh si a.

Chuvangin, a dawt lehah kan tarlan duh chu - Anti- Intoxicating Substances Drive neih hi a lawmawm ka ti em em a. Ni 100 chhunga ruihlo-dona kawngah chak takin hmalak a nih tur thu winter session-ah khan a sawi a, chutah chuan a ma kaihruaina hnuaiyah Excise Minister chak tak leh remhre tak Pu Tetea hovin hma an han la a. NI 13th January ah khan, Aizawl khawpuia kohhran thalaite an ko khawm a, khutah Excise Hall ah khan. Chutah chuan hei, ka bula thu Pu Lalramliana, Lunglei South Bialtu nen hian min sawm a, thute pawh kan sawi ve nghe nghe a. Chona nasa tak kan CM leh kan Excise Minister-in thalaite hnenah a pe bawh niin ka hria a; Vawiinah hian heng kan hmalakna turte hi a ropui ka ti a. Tin Central YMA-te nen sawihona te neiin, hmalak dan tur an han duang nghal ringawt te pawh hi a ropui ka ti a. Tin, Pu Speaker, ka han tarlan hram duh chu, nikum winter session tawpa kan CM-in a windup ah, 'VDP kan tichak ang a, legal power kan pe ang' tih a sawi te kha an bengkhawn em em mai a. Christmas hmang tura kan han haw te kha, Lunglei VDP Co-ordination Committee te chuan, 'engtik ah nge hun i neih theih ang' min ti a, tichuan, ni 29th December ah khan kan inkawm a. Chutah chuan an lawmna em em chu, ruihlo-in kan ram leh kan thalaite min run mek laia kan CM-in hetiang a 100 days chhunga hmalakna tur a'n puang kha ropui an ti em em mai a.

Pu Speaker, khawngaih takin; ka topic hi ka han zo ang a, ka duh tawh ang. Tichuan, VDP inkaihruaina tur an duan chhin te min kawhhamuh a, min pe a; chung te pawh chu kan CM hnenah pawh ka tarlang nghe nghe a ni. Heng zawng zawngah hian kan CM-in tuna 100 days a puan mek te tih hlawhtlina a awm chho mek hi lawmawm kan ti a. Mipuite'n an beisei a, 'an beiseina angin kan kal mek a ni' tih hi, heng pahnihte lek atang pawh hian a chiangin ka hria. Chuvang chuan, vawiina Pu Jeje Lalpekhlua, House Member zahawm takin Resolution a rawn putluh hi adopt turin ka rawn thlawp e. Ka lawm e.

HON. SPEAKER : East Tuipui Bialtu, member zahawm tak Pu Ramthanmawia ilo sawm ang.

PU RAMTHANMAWIA : Pu Speaker, i dinglama thute, a move-tute hi an phur lo riau mai a, sawi vak pawh ka tum lova; mahse, tlawmngaia sawi leh a ngai tlat mai a.

Pu Speaker, vawiina Member zahawm tak Pu Jeje Lalpekhlua Private Resolution - '*Ni 100 chhunga tih hlawhtlin tur sorkarin a lo duan lawk tih hlawhtlin a ni chho zel hi, a lawmawm kan ti hle*' han tih hi a thu chu a mawi khawp mai a. Chu ai chuan, 'A duan lawk la tih hlawhtlin lohte hi chak thei ang berin tih hlawhtlin ni rawh se' ti ta se chuan, Zoram mipui kut-hnathawktute an lawm ngeiin ka ring a. Pu Speaker, kan House Leader-in Ni 100 chhunga achievement a han siam hi, a huaisen ka tiin, a fakawm ka ti a. Hetiang hi kan la hre ngai lova, kan ramah pawh; mi ramahte chuan kan hria a, a tha ka ti a. Amaherawhchu, Pu Speaker, kan lawm hma mah mah em; lawmthu kan sawi

hma mah mah em, tih kha ka rilruah a lo lang a. Lawmthu kan sawi hun tur chu nakum tun ang hun velah ni sela. Chutah chuan, he sorkar hi eng angin nge a kal; vawiina kan pass tum ang hian lawmthu kan sawi thei dawn nge, tih lai kha ka ngaihtuahna-ah chuan a awm a ni. ‘Thla thum em pawh la sorkar lo kan ni a, engmah tihna hman a awm lo a ni’ an ti a, a dik a ni. Kan beisei san lutuk avangin anmahni pawhin mipuite beisei sang tura an *key* an lak san avangin, Mizoram mipuite kan beisei a lo sang viau mai a, a hun hian a la zir ngang lo a. Chuvang chuan, tuna lawmthu sawina motion a rawn putluh pawh hi a la hma deuh a ni.

Tichuan, ni 100 chhunga sorkar tih tur point 12 an han sawi te kha kan hre vek a. Kan sum dinhmun a that loh avanga sum renchem a ngaih thu te, Bangla luah dawna cheng tam tak bungrua a thara thlak thin te, a chei thatna a tana sum tam tak sen thin te chu, ‘tih a ni lo ang a’ a ti bawk a ni; henge te hi a ngaihthlak a nuam em em a ni. Mahse, hei hi a ni tak tak em? ‘Bangla chei loh’ tih te hi, a ni tak tak em’, tiin nakumah tun ang hunah kan la sawi dawn a ni. Chuvang chuan, tunah hi chuan a la hma deuh a ni. Kan tih loh tur hi kan ti tho si em, tih lai kha Pu Speaker, ka zawhna a ni. Kan Chief Minister-in ‘*tih loh tur*’ a tih hi a tha lutuk; ti lo se; ti lo ila, tih hi a tha vek a ni. Amaherawhchu, kan tlin leh si lo ang a; tunah hian lawmthu lo sawi ila, helaia tih loh tura tih kan lo ti leh si ang a; nakum tun ang hunah kan sawi chhuah leh hunah a hrehawm lutuk palh ang e, Pu Speaker.

Chuvangin, vawiinah hi chuan lawmthu hi chu la sawi lo hram ila, kan mipuite lam hawiin kut i phar zawk teh ang u; kan mipuite tan i luangchhuak phawt ang u; chumi hnuah lawmthu i sawi ang u. Keini pawh a sawi chak hlei hlei kan ni ang; i dinglama mite aiin keini i veilama mite hi a sawi chak chak kan ni dawn; chu chu a ni. Mahni leh mahni kan infak hma lutuk em aw; kan thil tha tih leh kan thil tha tih turte hi a tha. Mahse, ‘*a la hma deuh e*’ kan ti a ni.

Pu Speaker, eng pawh ni sela, kan Governor pawh thu kan sawi sual tir nuai mai a. Kan hriat angin Speech-ah khan, ‘kumin chhungin heng thlai tharte hi kan lei ang’ a ti mai a; kan Governor hi kan timualpho deuhin ka hria, kan House hian; kan sorkar hian. Chuvang chuan, kan Governor pawh hi a rilru a nat pawh ka ring. Governor Speech a zahawm em em a ni. Chuvang chuan, kan sorkar hi sorkar tha ni turin keini pawhin theihtawpin support kan tum. Kawng tha leh kawng dika he ram an hruainaah mipui tan za-a-za kan support a ni. Amaherawhchu, thil hi kan sawi tam lutuk a, kan thusawi hian kan thil tih hi a um phak leh si loh chuan min vawlettu a ni ang, tih te pawh kan hlau a. Chuvang chuan, i dinglama mite hi Pu Speaker, kan venpui te pawh hi a ngaih chang te pawh a la awm dawn a ni.

Eng pawh nisela, vawiinah hetiang sawi a tul hi a that rualin, hei aia pawimawh tak tak sawi zawk ila, ram hnuk tak takte hi chai zawk ila; kan ram, kan hnam, kan sakhua himna tur lamte hi rawn pulut zawk ta se sawi a va nuam dawn em! Pu Speaker,

engpawh nise, rawn putluh tur hi an hre lo mang e aw; kan lo thlansak lo a ni, tih te ka ngaihtuah rum rum a ni. Vawiin atan, he hun a tan chuan a la hma deuh, Pu Speaker, kan ti a ni e. Ka lawm e.

HON. SPEAKER : Sawi turin Mamit Bialtu, Member zahawm tak Pu H. Lalzirliana ilo sawm ang.

PU H. LALZIRLIANA : Pu Speaker, ka lawm e. Vawiin niah hian Pu Jeje Lalpekhlua, kan Member zahawm takin Resolution a putluh - “*Ni 100 chhunga tih hlawhtlin tur sorkarin a lo duan lawk, tih hlawhtlin a ni chho zel hi a lawmawm kan ti hle*’ tih kha, GAD kan sawiho mek a ni a. Mite, ram changkangte tih angin, *CM - 100 days programme* kan han puang hrim hrim hi kalphung thar a ni a, a tha ve hrim hrim, tih hi a ni a, a dang han lawm em emna tur lai hi chu a tam lemin ka hre lo a. Tunah a hlawhtlinna te sawi turin resolution hial kan han nei a; kawng lehlamah ‘*thla thum awrh chauh sorkar kan la ni a, engmah la tihna hun a awm lo a,*’ an ti lawi bawk si a; a in contradict deuh em aw, te ka ti a.

Vawiina 100 days programme bak hi chu 365 days programme a ni tawh mai dawnin ka hria a; 200 days programme te hi neih kan la tum em, tih te ngaihtuahnaah han nei ta ila. Member zahawm tak takte’n an sawite kan hria a. Vawiin niah hian kan budget, SRDP-ah te pawh rawn sawichhuah, Governor Speech-ah pawh rawn tel, 100 days programme-ah pawh, hetah additional point thlenga rawn tel – ‘*allocation of funds for programming of ginger, turmeric, chili and broom*’ tih te, hengte hi vawiin niah hian kan ngai pawimawh hle niin a hriat a. Sorkar pawhin sum leh pai kan neih ang ang atangin kut-hnathawktute, chhawm dawlna tur *minimum price support* te siam sakin, thlai thlan bikte kan han nei a, Governor Speech-ah khan chiang takin a rawn lang a. Pu Speaker, I phalnain ka’n quote lawk ang a - “*My government will fix remunerated prices and will start procurement and will start ginger.....*” tih hi a chuang a ni. “*Tun kum chhung ngei hian heng thlai palite hi minimum price kan siam ang a, chutah chuan heng thlai palite hi kan procure dawn a ni*’ tih hi a chuang kulh mai a.

Tunah hian kan tih fuh loh deuh mai awm chu - broom stick kan lo telh hi kan lo tisuah em aw, tih hi a ni ta a ni. Hei aiah hian Iskut te lo ti ta ila a fuh fe zawk awm mang e, ka ti a. Sorkar in crore 110 thlai thar lei nan a dah a, crore 40 healthcare ah kan dah bawk a; pawisa awm chu a ni tawh ngei mai a. Crore 40 kan hman na zawk hi chu, pawr takin kan sawi a, kut kan beng hluah hluah a ni. A crore 110 zawka hi; tun hi a hman hun a ni dawn lawm ni? Pu Speaker, crore 40 kan hman ang tho hian, kan commitement a nih bakah Governor zahawm tak pawhin a speech-a a telh hiala hi, tih hlawhtlin a va tha em.

HON. SPEAKER : Khawngaihin; hei dar 1 a ri a, kan member hi sawi zawh tir law law ang aw. (*House-in rem a ti a.*) Aw le, sawi chhunzawm rawh le.

PU H. LALZIRLIANA : Pu Speaker, ka lawm e. Governor Speech hiala lo telh a nih avang hian, he kan resolution hi tlemin han expand ta hlek ila, “Ni 100 chhung a sorkarin tih hlawhtlin tur a lo duan lawk hi, tih thlawhtlin a lo ni chho zel hi a lawm awm kan ti hle,” tih bakah hian sentence hnih-khat lek, “*La tih hlawhtlin loh awm te hi, ti hlawhtling turin hma chak takin lak ni leh rawh se*” tiha belh ni sela. Hei, ni 12 tha er awr kan la nei a, heng te hi a hman tangkai theih viauin a rinawm a ni.

Pu Speaker, vawiin hetiang a 100 days programme han neih hrim hrim pawh hi a changkan thlak a, mi tih dan, ram changkangte tih dan kan copy a nih avang hian, thil lawmawm tak a ni. Resource mobilisation committee lam te sorkar hmasa pawhin a ngai pawimawh a, a deartment ang hialin a lo din a. Amaherawhchu sorkar tharin, ‘a department em em a ngai lo e; a committee hi a tha e,’ a ti a, heng te pawh hi thil tha tak a ni. Nichina kan memberte sawi ang khan, resource kan neih ang ang hi mobilise that a ngai a, *optimum utilization of resources* hi kan kal chhoh pui reng tur a ni.

Mizo fate’n kan neih that em em chu, *manpower resources* hi a ni. kan la *tapped* loh, a full-a kan la *tapped* lohte pawh hi opportunity kan neih a ni. Hengah te pawh hian sorkarin nasa zawkin hma la se ka duh a. Chuvang chuan, sawi ang ni lo, sawiloh ang nih hi a hlauhawm a. Nakinah mipuite’n min la judge tur a nih avang hian, vawiin ni ah hian lawmthu sawi kan duh rual rualin, hemi la tih thlawhtlin loh la awm, a bangte pawh hi tih hlawhtlin chhoh tura hma lak chhoh zel ni se, tih te kha kan resolution ah hian han belh ni se; chu chu ka rawn dinchhuah pui a ni e. Pu Speaker, ka lawm e.

HON. SPEAKER : Aw le; hei kan chawhma hun a lo tawp ta a, dar 2 ah kan thukhawm leh dawn nia.

(Recess till 2:00 PM)

2:00 PM

HON. SPEAKER : Private Resolution chungchang kan sawi kha a ni a. Tunah chuan, Aizawl West-III Bialtu, Member zahawm tak Pu V.L. Zaithanzama ilo sawm ang.

PU VL. ZAITHANZAMA: Pu Speaker, ka lawm e. “*Ni 100 chhunga tih hlawhtlin turte sorkarin a duante tih hlawhtlin a ni zel hi lawmawm kan ti hle a ni*” tih, Pu Jejea Lalpekhlu Resolution rawn put luh hi, tha ka ti hle a; tha ka tih thu theih ang angin rawn sawi rik ka tum a ni.

He thil hi ngaihtuah thuak chuan Pu Speaker, tih awm loha ngaihna te pawh a awm mai thei a ni; kei pawhin ka ngaihtuah thuak hi chuan awm lo te pawh ka ti lek lek a. Mizoram ah hi chuan hetiang hi kan hriat vawi khatna niin ka hria a, ka hriatsual loh

chuan; thil tihawm lo tak nia ka hriat hi ka ngaihtuah chiang chet chet a, ‘thil tihawm tak kan ti a ni’ tih ka ngaihtuah chhuak a.

Political party te hian inthlan dawnin kan thil tih tur policy te duangin kan aupui thin a, chu chu kan sorkar hnua kan ngawih san leh daih chuan thil dik lo tak a ni a. Chuvangin, inthlan hmaa kan tih tur kan ruahmante ti hlawhtling turin, ni 100 chhunga tih hlawhtlin tur te, nakin zelah chuan kum 2 chhunga tih hlawhtlin tur te, inthlan hmaa kan policy kan aupuite phei kha chu kum 5 chhunga tih puitlin kan tumte a ni a. Kha kha ngawih san mai lovin, tunah hian kan Chief Minister zahawm tak hian a rawn puang chhuak ta a, tih hlawhtlin a ni ta zel baw k a, a lawmawm em em a ni.

Thil pakhat - *Mizoram Subordinate Services Selection Board* te pawh thiah a lo ni ta a, hemi thiah chungchangah hian ngaihdan te pawh a inang lo mai thei e; ni 100 chhunga tih tur zingah a tel miao a, kan thiat ta mai a ni. Inthlan dawn khan kan Leader hian nasa takin a aupui a, ‘min thlan tlin chuan, kan thiat dawn’ tiin a au a ni. Tichuan, thlan tlin kan ni ta ngei a, mipuite’n min thlang tling ta ngei a; thiah a ni ta a ni. Mipuite’n thiah an duh a, min thlang tling a ni; thiah duh lo se chu, thlan tlin kan ni lo ang, tih kha a lang reng a ni. Tunah hian kan tum chu, tih hlawhtlin a ni ta zel a ni.

Ram hruaitu hrang hrangte pawhin an lo puang tawh thin, tih kan ngaithla a. Mizoram ah kan Chief Minister-in a puang ve ta a, a lawmawm tak zet a, kan budget pawh ZPM policy tinzawna budget siam a lo ni chho ta zel hi a lawmawm em em a ni.

MLA te’n car thar kan lei loh avang ngawta sorkar sum kan save tam zia te hi sawi uar loh theih loh; heng kan tum zinga thil pawimawh tak takte kan sawi vek seng lo ang a. Hun hman dik te hi hmasawna a ni; Sorkarin helama hma a la zel te hi a lawmawm takzet a. Assembly hi hun hman dik kawngah chuan kan entawn tlak hlein ka hria a, tan hun - ban hun engkimah hun kan hmang dik hle a ni. Keini ho pawh hian hmun dangah pawh hun hman dik hi uar zel ila a tha awm e.

Ruihhlo do chungchanga sorkarin tihtak zeta hma a la chho te hi a lawmawm ka ti hle a, vawiin chanchinbu ah khan kumina ruihhlo vanga thi 10 ngawt mai kan han awm ringawt te pawh kha, ngaihtlak a nuam lo hle mai a, mipa - 9 leh hmeichhia – 1; mipate kan thi zawih zawih mai hi a pawh takzet zet a ni.

Pu Speaker, thil pakhat sawi ngei ngei ngai awmin ka hria a. 2019 June thla khan hun reilote chhungin MNF sorkarin kawngpui a siam tha hi lawmawm kan ti hle, tih resolution kha kan chai vak tawh a. Chuvangin, tuna kan resolution hi ‘*in ti hma lutuk*’ tih kha, kha pawh kha hma tak a ni. Khatiang khan a hnu zelah a tha ta lem lo leh nghal a, keini erawh chu khatiang kha a ni dawn lova. Thlaithar chungchang erawh chu, kan sawi dana inang lo tlem han tih rik ka duh a. Pu Speaker, ‘*thlaithar kan lei ang*’ tiha, ‘lei’ tih lai hi kan tum dan a ni chiah lo; a tawngkam hi kan hmang sual thin a ni. Thlai

chingtu ten an hlawk loh dawna, a rate sorkarin a tuk ang aia tlawma lei emaw, hralhna emaw an hriat loh dawn ai chuan, ‘support price kan pe ang’ kan ti chauh a ni. Sorkar hi sumdawng tur a ni lova, sumdawng chi pawh a ni lova, sum dawn pawh kan tum lo.

Tin, a bik takin hmunphiah chungchang kan sawi ri ring hle a, han sawi fiah hlek ka duh a. Kan lei dawn lova, support price kan pekna tur kawngah khan tih tur a awm a ni. Nimin demand kan sawinaah pawh khan kan sawi a, Cooperation a pawimawh zia te kha ka sawi ri a. Society tha tak din a ni ang a, chumi society through khan hmunphiah leitute pawhin an lei ang a, chumi inkarah chuan a tul dana zirin sorkar chuan support price a lo pe mai dawn a ni. Tunah erawh chuan, society mumal din a la ni lova, chuvangin a kawng a la awmlo a ni; kha kha chu kan hriatthiam a ngai awm e. Lei leh hralh chungchangah khan a kawng tur uluk taka ngaihtuah a duan sa a ni a, kha kha tihfel a nih hunah chuan, ‘kan lei ngei ang’ ti lovin, ‘support price kan pe ang’ tih kha ka’n sawi a ni e.

Pu Speaker, ka lawm a; he resolution hi he House-ah hian pass a nih ngei theihna turin ka rawn thlawp a ni e.

HON. SPEAKER : Aizawl West-I Bialtu, Member zahawm tak Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiina Private Members’ Resolution kan hmuh hi a taka tawng chho mektu kan ni a, ding lam leh vei lama thute pawhina kan hmuh mek a ni. Tin, sorkar kalphunga danglamna kan hmuh hmasak berte zinga mi, ni 100 chhunga tihhlawhtlin tur programme a taka kan tawng chho mawlh mawlh mai hi, ‘a lawmawm’ tih bak chu han sawi vak ngaihna pawh ka hre lova. Hetiang zawnga target neia sorkarna siam tuk atanga sorkarin inpuahchahna fel fai nei saa kal tur leh ruahmanna a siam sa te a han ti hlawhtling chho mawlh mawlh mek leh, vawiin nia la zawh loh deuh pawh hi tun thla chhung ngeia la zawh hman vek theih tur awm anga ruahmanna kal mek han hmuh hian, mipuite’n lo hria se ka duh chu, ‘he sorkar thar hi ti tak tak sorkar, tum nei sorkar a ni’ tih hi a ni a.

Chutih rual chuan, Pu Speaker, ka bial chhungah chhiat kan tawh hlauh mai a, tun maiah khan Phunchawng-ah khuan insak laiah lei a min a, pafa a chhilh a, a ruang an la hai chhuak thei lova; chu chu House memberte han hriatah ka han sawi lang zuai duh a. A lungchhiatthlak, rilru pawh a tibuai khawp mai a, han sawi lan loh kha ka hreh deuh a.

Chief Minister-ina 100 days programme a puan zinga mimal taka ka lo lawm em em mai leh, a hlawhtlinna vawiin, he Budget Session-a kan sawi chhoh mawlh mawlh mek bik lai te hi han thlur ka duh a, chu chu ‘Year of consolidation’ tih hi a ni a, ‘insawh nghehna’.

Sorkar hmasa, hmasa leh kal taah khan kan lo hmu tawh a. 14th Finance Commission kaltlangin kan sum dinhmun te, kan sum dawn thin te-ah hmasawna nasa tak 14th Finance Commission-ah khan kan lo hmu a. Khatah khan 31% tax devolution, chhiah kan insem thina 31% ni thina kha, 14th Finance Commission khan 42% ah a rawn san lawih mai a. Khatah khan kan state chanpual te, devolution atanga India ram chhiah tlingkhawm atanga kan chanpual 0.5% khan nasa tak maiin kan state chanpual a rawn tisang a.

Khami devolution piah lamah khan post-devolution deficit grant kan tiha kha, kha sorkar thar lo piang khan, a tirah tak te phei chuan sang hnih chuang min pe a. Khati laia kan budget en chuan central transfer kha 60 - 65% te a kai a ni. Kan GSDP atanga teha 160 te kha a han hawlh pha a ni. Khatiang dinhmunah khan *Year of Consolidation* pawhin a hlawkthlak a, kan leiba pawh nasa takin a kiam a. 2019 - 2020 a lo nih kha chuan kan gross fiscal deposit te pawh kha 10% ah sorkar leh FRBM Dan bu ina, '3% hnuai lam a ni tur a ni' a tih kha, 1.57-ah kan tlahniam hman nghe nghe a ni. Kha central ina kan sum hmuh dan kalphung inthlak danglam ina a rawn hrinchhuahte zinga pakhat ni tho mah sela, sorkar hmalakna kha a takin a rawn lang chho a, tun dinhmunah eng emaw chen hmasawna kan hmu a.

Amaherawhchu, kumin 15th Finance Commission-ah ve thung chuan a lo danglam ve thung ta a. Central policy-ah tam tak chu inngat kan nih avangin, 42% devolution kha 1% khami atan dah mah sela, vawiinah hian kan indaih lohna ber revenue deficit grant kan tih mai tax devolution min pek tawh hnua kan la indaih lohna gap-grant kha tam tham zawka rawn thleng thin crore 7000 or 8000 kan budget a nih laia, crore 2000 chuang kan dawn kha, crore 14000 chuang a nih tawh hnuah chuan hniam lam pan zelin, kuminah phei chuan crore 1070 vel awrh chauh kan lo hmu ta a. Nakkumah phei chuan crore 580 velah a tlathla dawn tih kan hria a, kan sawi lang nasa hle a. Hei hi sorkarin fiscal target-a neih sum leh pai dinhmun sawh nghehna tur atana hma a lakna hmasa ber chu tun kum budget, he sorkar tharin a budget pharh hmasak berah hian Chiang takin a rawn thai lang a. Tah chuan leiba kan sawi thin te, sum puk kan sawi thin te, loh theih loh a nih rualin, awmze nei zawkin leh kan sum leh leiba rulh turte ngaihtuah chung zelin, sorkar tharin flagship programme-a sum tam tham tak a dah pawh a beisei awm em em rualin leh hma lak vut vut a chakawm rualin, policy mipui hamthatna tur tam tak kan lo ngaihtuah kha huaisen tak maia a tihnam ngam a, indaih tawh tawh nia kan ngaih kha sem zai zawka budget awlsam zawk leh kan hmuh theih zawnga an rawn tarlang ta hi, lawmawm ka tiin, heng point 12 te zinga mi hi a vaiin kan sawi hman dawn lova. Mipuite'n lo hria se ka duh bik lai chu, he '*insawh nghehna kum*' kan ti hlawhtling ringawt pawh hian kum nga lo awm leh tura he ZPM sorkar lo ding, he mipui sorkarin that tlan a tum hi a chian em em avangin leh hmasawna rahbi, sum leh pai enkawl chungchangah leh inremchemna kawngah te, a thawh chhuah dan tur hma lak a tum dan zawng zawngte kan puang awl lova. Khang hmalakna khan, he sorkar Chief Minister (kan Finance Minister ni baw) in huai tak maia insawhnghehna kum a siama, rem leh

rem lova, sum leh pai inrenchem zawnga mahni leh mahni inhrek ngama legislator-te, i vei lama thute pawh kan ni ang, kan zavaia helai Hall chhunga thute'n theihpatawp chhuaha mahni inhlanin, kan chanvo chan ve thin tam zawkte kan paihthla ngama bul kan tan ngam hi a lawmawm ka ti baw k a.

A dang ka sawi tawh lo mai ang a, Pu Speaker; vawiina he resolution rawn lut hi he House member zahawm tak te hian ngaihtuahna thui tak hmang chung leh lo thlirtu mipuite pawhin a taka kan hmuh chhoh theih zel theihna tura bul tanna tur a ni, tih hre rengin adopt ngei turin ka rawn ngen a ni e. Ka lawm e.

HON. SPEAKER : Lunglei North Bialtu, Pu V. Malsawmtluanga ilo sawm ang.

PU V. MALSAWMTLUANGA: Pu Speaker, ka lawm e.

Pu Jeje Lalpekhlu, kan Member zahawm takin a rawn put luh Private Members' Resolution hi a tha hlein ka hria a. A hun pawh a thlang thiam ka ti a, a hun takah a rawn pulut niin ka ngai a, han sawi hran vak tur awmin ka ngai lo deuh a. Ka ding lo ang ka ti zeta, amaherawh chu, Pu Speaker, i vei lama thu member thenkhatte khan tlemin an hresual deuh nia ka ngaih avangin, ka han sawi ve hrim hrim dawn a ni.

Hei, kan hriat angin kan sorkar chuan kalphung-thar, mipui-sorkar a siamna kawngah a bul tan nan kan Chief Minister-in ruahmanna fel tak siamin, 100 days chhunga tih tur a duang lawk a, hei hi mipui pawh an lawmin ka hria a. Hun rei tak mipuite'n, 'sorkarin engtin nge min hruai dawn' tiin ngaihtuahna thui tak senga sorkar lo thlir thin te'n blind taka an lo thlir thin chu vawiin ni ah thiahin a awm ta a, a lawmawm hlein ka hria a ni. Tin, he House-ah hian 100 days programme avang pawhin lawmthu ka sawi ve duh hrim hrim a.

Tin, i veilama thu member thenkhatte khan sorkar fakna ang deuh khan a rawn sawi a; khatiang deuh khan a ngaih theih tho a. Amaherawh chu, *100 days programme* hi a that em avangin, hetiang resolution rawn lut hi a ni ber a. Tin, he 100 days programme hi a zawh hnuah khan han putluh chi pawh a ni lova, a thu a rawn luh danah hian. Kan Member Pu Jeje Lalpekhlu khan a tha a tih avangin a rawn pu lut kha a ni a. Hei, tunah hian kan member thenkhatte khan an hresual hlek a ni mai thei a; March ni 31 thleng a ni a, ni 23 lai a la awm a ni. Hengah hian kan Chief Minister kaihhruaina hnuaiyah thil tam tak kan la ti hman ngei ang, he sorkar hian tih kha ka ring tlat baw k a ni.

Tin, mipui an lawmin ka hria a, tun sorkara 100 days avang pawh hian. Pu Jeje Lalpekhlu, kan member zahawm takin a rawn putluh lai khan, youtube lam te ka'n en thuak a. LPS leh ZONET te'n an live baw k a, hemi pahnih ringawt belhkhawmah pawh khan mi 7800 chuangin an lo thlir a ni. Mipui hian kan Assembly Session te hi tun

hmain kan ngaihtuah vak ngai lo mai thei a, mahse vawiinah chuan kan sorkarah beiseina sang tak an nei a, min thlir thup a ni. A bik takin ka thalaipuite pawhin tuna kan session hi min thlir a ni. Chu chu, eng nge a chhan, kan tih chuan, he 100 days avang pawh hian niin a lang a ni.

Tin, *Year of Consolidation* chungchang hi han sawi lan ve hrim hrim ka duh bawk a. A pawimawh hle mai a, kan member thenkhatte khan an rawn sawi chhuak a, Adviser to Chief Minister chungchang te. Hei, ka bula an thut vang pawh ni lovin, ka hrechiang em em mai a. Hetiang tak hian adviser to CM hian Mizoram tan hna an lo thawk a ni maw, tih te a takin ka han hre chho ve zel a. Tin, he *Year of consolidation* - insawhnghehna kum, kan CM-in a puang pawh hi a ropui hlein ka hria a, a niin hun rei tak a lo vahvaih pui tawh kan finance dinhmun, kan zoram dinhmun chiang taka a hriat avanga a puang pawh hi a lawmawm hlein ka hria a. Tin, hemi inrenchem kalpuina kawngah hian a tum ber nia lang chu, *tul lova sum kalral hnem* thin kha a ni a. Chuvang chuan, kan adviser to CM te pawh a tul hle a, a tulna avanga kan Chief Minister-in a ruat chho pawh niin a lang a, a lawmawm hlein ka hria a ni.

Tin, SEDP chungchang hi kan hria ang a; tun inthlan dawn hnaihah pawh khan ka bengah ngei ri a awm a - “hei, sorkar turin theihtawp kan chhuah a, mahse engmah hi ka la hmu ve si lova; SEDP tal hi dawn ka duh a ni,” tih, unit hruaitu thenkhatte ti ti ka ngaithla a ni. Chumi ka han sawi chhuahna chhan chu, khang mite khan SEDP kha an mamawh ber tlat lo a ni. Scheme tha tak anga lang kha, kalpui dan a zirin ‘scheme vanduaithlak’ te pawh a ni thei tlat mai a. Chumi kan han sawi chhan chu, khang atang te a sorkar tuka healthcare scheme-a leiba rulh nana sum han dah te kha a lawmawm hlein ka hria a; a bik takin, healthcare scheme kaltlanga nu leh pa rumte tan phei chuan a lawmawm hle dawn a ni.

Sawi tur tam tak chu Pu Speaker, la nei mah ila, “*Ni 100 chhunga tih hlawhtlin tur sawrkarin a lo duan lawk tihhlawhtlin a a awm chho zel a hi a lawmawm hle a ni*” tih resolution rawn putluha hi, he House hian adopt ngei se tiin ka hun ka khar ang e. Ka lawm e.

HON. SPEAKER : A lawmawm e. Tuirial Bialtu, Member zahawm tak Pu K. Laldawngliana ilo sawn ang.

PU K. LALDAWNGLIANA: Pu Speaker ka lawm e. Pu Jeje Lalpekhlua Private Members’ Resolution - “*Ni 100 chhunga tihhlawhtlin tura sorakin a lo duan lawk tihhlawhtlin a lo nih chhoh zel hi a lawmawm ka ti hle a ni*” tih sawihona hun tha tak mai kan nei hi ka lawm hle a ni.

Amaherawhchu, Ni 100 thlen hmaa sawiho tura kan han tih hi, a la hun lo hle mai ka ti a. Ni 88 chauh a la ni a, a zawh hma ni 12 a la awm a, a hlawhtlin leh hlawhtlin loh te,

a lawmawm viau leh viau lohna te hi chu budget pharh leh hunah hian a takin a lo lang dawn a ni. A then hi chu a thain a lawmawm hle mai a, he resolution hi a dik hlein ka hria a ni. Hei ruihhlo-do chungchang hi tuna do thar thut a ni lova; kan ram hmelma a ni a, nasa leh zuala kan do hi a pawimawh hle a ni.

Hei, Resource Mobilisation Committee pawh hi, kan hriat angin sorkar hmasaah khan a department anga din a lo ni tawh a, hei pawh hi hming thlak mai a ni a. Tin, ZPM policy-oriented budget siam hi tha bik, kalphung thar bik riauin kan han sawi thin a; sawrkar apiangin policy, party apiangin policy-base zel khan budget hi siam thin a ni a. Hei, State Marketing Board din hi tha ka ti khawp mai a; amaherawhchu, tun dinhmunah hian kan sawi fo thin, financial year zawhna tur ni 12 a la awm a, hemi hma hian kut-hnathawktute manganna hi a sawi loh theih lo a. Hmunphiah hi ngaihsak a ngai; hei hi chu i hreh lo ang u. Hei hi chu, ‘kan fail a ni’ ti ngam ila, hemi tel chung hi chuan, ‘a tha hle a ni’ tia han pass hi kei chuan harsa ka ti hle mai; chu chu Zoram mipui leh kut-hnathawktute pualin kan sawilang tel leh duh bawka a ni.

Hei, Boundary Committee te pawh hi kan sawi fo thin a, hei pawh hi sawrkar hmasaah a awm a, kha kha tun tumah pawh hian an din leh mai a ni, tih ka’n sawilang tel leh duh a ni. Tin, MSSSB thiah hi kei chu, tha ka la ti thei lova, a thatna lai ka la hre chuang lo a ni.

Tin, SEDP sum chhungkaw 60,000 vel sem tur crore 150 han dah sawn daih mai hi, chhungkaw 60,000 te rilru na taka kan siam hi lawmawm viau ah kei chuan ka ngai lo a ni. Tin, aikal lak chungchangah hma kan la a, a lawmawm ka ti a ni. Amaherawhchu, khatia report a hriat ringawt kha a tawk lo a ni. Kalphung tharah chuan, ‘engtin nge action kan lak ang; action kan la dawn em, tih hi kan ngaihtuah a va tha em tih kha ka’n sawilang tel leh duh bawka a. Tin, inrenchem chungchang hi budget ah pawh a awm a, a tha khawp mai a. Inrenchemna, medical reimbursment te leh thil dang dangah pawh khan a awm teuh a. Amaherawhchu, thenkhatah kan inrenchem a, thenkhatah kan inrenchem lova.

Hei, Board chungchangah te pawh, ‘*uluk taka enpui leh ngai*’, ni 100 chhungah tih turah khan an ti a, kha kha ennawn leh a thain ka hria a. Sawrkar sum ei hek mai tute kan ni em, tih te pawh hi enchian leh a va tha em; keimahni leh keimahni infak fo hi a tha ber em; mipui zawk hian min rawn fak rawh se, tih hi. Vawiina mi pawh a ni a, niminah pawh a ni tho a; Zoram mipuite’n min thlir thap a; min thlir avang khan, ‘a tha ta e’ an rawn ti a ni lo. Chuvang chuan, a that leh that loh hi chu nakum budget lamah hian mipui hian lawmthu an rawn sawi turah ka ngai a ni.

Pu Speaker, a tawp berah chuan, kan inrenchem leh inrenchem loh dik tak hi chu nakum budget session kan sawi lehah hian a takin a lo lang dawn a ni. Chuvangin, Pu Speaker a then hi chu lawmawm ka ti a, a then hi chu lawm har ka ti a ni. Ka lawm e.

HON. SPEAKER : A lawmawm e. Aw Hrangturzo Bialtu, Member zahawmtak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka thu hmaah chuan, Session hmasa berah khan, ‘Session apiangin traditional dress-in ka inchei ziah ang’ ka ti a; wawiin hi ka puan ven tur ka theihnghilh tlat mai a; amaherawhchu, hei hi Mizo tlema kan changkan hret hnua kekawr hakna chang kan hriat hnua kan traditional dress a ni.

Pu Speaker, wawiina kan resolution hi a tha hlein ka hria a. I veilama mite pawh khan an han sawi thin a; ‘tihhlawhtlin vek a nih hi a lawmawm kan ti’ tih a ni reng reng lo a nia; ‘*tih hlawhtlin a ni chho zel hi...*’ tih a ni. Chuvang chuan, ni 100 a la tling lova, a la hlawhtling vek lo tih chu hriat sa vek a ni a. Tunah hmalakna thenkhat, ‘Year of Consolidation’ tih te hi sorkar kal tawha kan la hriat ngai loh, dinhmun a chhiat viau pawha pawisa khawh lut zur zur, luangliam zur zur; ti reng mai thin kha a ni. Keini chuan a takin kan sum harsat zia hre chiangin kan Chief Minister-in hetiang hian a rawn ti a, a fakawm takzetin kan hria a ni. Hetiang hi chuan ti lo ila, sorkar hi *belte phai theilo* emaw tia, a hman theih zawng zawng sorkar ta; sorkar hi a zen theihna zawng zawnga zen tuma ei mawlh mawlh lam ringawt hi a nih loh zia; sorkar hi tluchhe ve thei, tlu chhe rup thei a ni, tih hi a chiang a. Kan dinhmun pan zia hriaa hetiang sorkarin hma kan han la hi lawmawm ka ti a, a huaisenthlak pawh ka ti a ni.

‘Resource Mobilization Committee’ tih te pawh hi, a department zawng leh a hautak zawnga han ti lovin, committee-in kan ti mai a, Vice Chairman te pawh ₹1/- hlawh IAS Chief Secretary hlui ngat te a ni a. Chuvang chuan, hei ai hian Resource Mobilization Committee hian thil tamtak an dek chhuak ang, tih hi a hriat theih khawp mai. Tin, inhmanna then a tul leh tul loh hi; ni e, tul tih zawng hi a in ang lova, party-in a policy neia thil kalpui kan ni a. Sorkar hmasaah khan SEDP Board hrang hrang siam kha tul an ti viau a, keini chuan tul kan ti lo viau a, kan thiat ta kha a ni ve leh mai a. Chuvang chuan, hei work order te pawh sawrkar hmasa kha chuan sawrkar tawp dawna sawrkar hmasa hna lo pek kha chu an inchhuh tawp tawp mai a ni. Kei chu ka bialah pawh khan an han beisei deuh dawn a, ka awih lo; mi rilru intihnat a tha lo. “*Miin i chungah an tih i duh tur ang bawkin mi chungah ti ve rawh*” a ti a. Pathian-thu hi sawi tlawr dup a ni lo; a taka nun mai tur. Chuvang chuan, miin, work order an lo hum ve tawh a, an beiseina tamtak nen an lo hisap ve a; khang zawng zawng inchhuh kha a rawng a ni. Ka bialah phei chuan ka awih lova. ‘Hei, ‘sorkar paw’n a ti; tiang hian chhonzawm tur’ an rawn ti mai a, work order nei tawh chu. Hetiang ang chite hi a tha ka ti khawp mai a. Anti-corruption measures atana Monitoring Committee an rawn din te hi tha tak a ni.

Kha, kan ngaithla a, House Leader pawhin contractor thenkhat terminate ngaite a rawn sawi tawh a, khatiang chi kha hetiang Monitoring Committee-in an han en a, ‘hei hi chu a diklo a ni; hei hi chu *revise* tlak a ni lo a ni; hei hi chu a zo tawh tur a ni’ tih ang zawng zawng kha, khang kha eng emaw insiamrem sa atangin kan Leader ngei pawhin wawi

tam tak a sawi tawh a. Revise tum sa in emaw, project thenkhat phei chu an thawh tih mai tur ang, tam lutuk ang kha chu a rawn ti reh dawn a.

Hei, Biometric Attendance hi kal tlai leh tlailoh piah lamah hian, aikal venna atan hian a tha dawn hle a ni. Ka'n sawi nawn leh ang a - aikal tamna deuh Health Department leh Education Department ah hian ti tam sela. 'Aikal la ho hi Biak-ina lam tui tuite pawh anni' an ti awm e; hengte hi a tha lo viau a ni. Chuvangin, hetiang hi mi tumah an kutzia a inan loh a vangin, ai-kal lak hi a theih dawn loh tawp a, heng te hi a tha hlein ka hria a ni. Chuvangin, tuna kan private resolution hi tlang ngei turin ka rawn support a ni e. Pu Speaker, ka lawm e.

HON. SPEAKER : A lawmawm e. Tunah chuan, Lawngtlai West Bialtu, Pu C. Ngunlianchnunga ilo sawm ang.

PU C. NGUNLIANCHUNGA: Pu Speaker, ka lawm e. Vawiina Private Members Resolution huna kan thu ngaihtuah 2-na, Pu Jeje Lalpekhlu resolution - "*Ni 100 chhunga tih hlawhtlin tur sorkarin a lo duan lawk, tih hlawhtlin a ni chho zel hi a lawmawm kan ti hle*" tih hi, tuna ka hma chiaha rawn sawitu kha tisa lamah pawh ka pu a ni a, a chhan chu ka nu hi Punte a ni a, Punte chu ka pu te anni a; a sawi kha a dikna chin a awm a. Amaherawhchu, 'a hma deuh lo maw' ka ti. 'Hlawhtling chho zel' tih ringawt helai Mizoram rorelna sang bera han chai tak luih luih mai chu; Mizoram mihring nuai 11 chuanga mi 40 thlankhawm ram rorel turina kan tiha tan chuan a la hun lo deuh e a.

Entirnan: Winter session ah te emaw, monsoon ah te emaw ni 100 chu lo tling tawh sela, chumi hunah chuan a hlawhtlinna te pawh, 'hei, a hlawhtlinna kan hmu e' han tih awm a ni a; a hlawhtling a awm rualin, hlawhtling lo hi a la tam em mai a. Chuvangin, Pu Speaker, kei ka ngaihdan chuan, a la hma deuh ka ti a. Chutih rual chuan, sorkar, Mizoram-a la awm ngai lo sorkar-thar, mipui-sorkar ina ni 100 chhunga a tih hlawhtlin tur a rawn siama hi chu, a changkang ka ti a. Chutiang chuan, kum 5 chhunga kan tihlawhtlin tur te pawh hi siam ila, kan ram hian hma a sawn phah ngei ka ring a ni.

Ka hma chiaha sawi ka pu khan, 'year of consolidation hi an la ti ngai lo' a ti a, Congress sorkarah khan kan lo ti tawh a ni. Kan sum leh pai dinhmun te a tha lova, khatih laia kan Finance Minister Pu Lalsawta khan a ti a, kan puang nghe nghe a, kha kha kan hlawkpui. Minister-te'n household staff 4 kan neih thina pawh kha 3 ah tihtlak a ni nghe nghe a ni, khami zulzui khan. Khatiang khan hma a lo la a, kha kha kan hriat ve a tan pawh a tha hrim hrim a.

Pu Speaker, vawiina kan resolution-ah hian hmannah kan Leader of Opposition-in parking chungchang leh kawng hrang hrang a'n sawi a, kan House Leader chhanna ah khan, '*kan la ti hman lo a ni*' a ti a, a dik chiah. Parking chungchang leh thildang dangah

tun sorkar hi ni 88 chauh a la kal a ni; beiseina sang tak erawhchu kan nei. Chumi ah chuan, kan sawiho tur hi a tak hmuh nghal tur emaw lam ni lovin, he sorkar kal chho turah hian general discussion a ni emaw, Minister te demand kan sawi emaw pawhin he kum kan kal chhohna turah hian, ‘hetiang hian kal nise a va tha ve’ tia rawtna kan neih duh ve te kha, i veilama thu te pawh hian he House-a member kan nihna angin kan rawn thawh ve zel kha a ni a.

Chutichuan, Pu Speaker, hei thlaithar lei chungchangah hian sawi a tam khawp mai a. Kan House Leader ngeiin, ‘*kan mawh a ni lova, agent te mawh a ni*’ han tih ngawt laia kha, a fuh tawk loin ka hria. Sorkarin D-A-H kan thei a, L-E-I erawh kan la ti thei lo lai hi a inhmeh lo deuh lo maw, ka ti a ni. Chuvang chuan, sorkar pawhin a inhuam ang ngei khan, ‘minimum support price kan dah ang’ ti ngawt lo khan, a mawh kan lak chhoh tak zet a tulin ka hria a. Pu Speaker, he kan kal chhohna turah hian vawiin niah thil tam tak tihhlawhtlin tawh a awm a; ruihhlo dona chungchangah pawh, ‘hma nasa zawkin kan la dawn a ni’ tih a ni a, a lawmawm ka ti. Engatinge sorkar tharah hian he ti em ema drugs hi a tam; sorkar hi a inthlahdah nge nia, sorkar hi a tanga, tunhma a mi kha a lo zalen deuha kan man ta rum rum em ni, tih tur khawpin nitin mai drugs-in kan ram min luhchilh nasat zia a lang chiang a ni.

Pu Speaker, a tawpna atan chuan, he sorkar thar resolution-ah hian Mizoram mipui leh Aizawl khawpuiina mutmawh hnarmawha kan neih leh, Congress emaw, MNF emaw lo kalpui tawh te’n *awm lo se* kan duh, khawpui chhunga tanga Assam Rifles sawnchhuah, (sorkar hmasa te phei kha chu kan duhthawh deuh bawk a, an kelsa bel te nen lama kalchhuak tawha kan ngaih, kan han sawia te kha an la chhuak si lova) heng zawk te hi tun kan sorkar hi kan support tlan theihnan kumin chhung emaw, nakum 2025 chhung emaw hi chuan, ‘Aizawl khawpui atang hian Assam Rifles te hi nawrchhuah ngei ngei ni rawh se’ tih resolution te hi pass ta ila, sorkar hmalakna pawh a tichak leh zual ang a, tih te pawh kha rilru ah a awm a ni.

Pu Speaker, engpawh nise, kan House Leader-in minutes 5 a ti si a, minute 5 hi chu kan kham lo tlang chu a ni e. Ka lawm e.

HON. SPEAKER : A lawmawm e., sawi tur kan awm tawh loh chuan... E, an awm maw? Ban phar kan hmu mai lo a ni. Aw le, Aizawl North-III Bialtu, Minister zahawm tak Pu K. Sapdanga ilo sawm ang.

PU K. SAPDANGA, HON. MINISTER: Pu Speaker, ka lawm e. Vawiinah Private Members Resolution kan neih, kan sawiho taka hi, ni 100 chhunga tihhlawhtlin tur tihhlawhtlina awm mek chungchanga lawmthu sawina a ni a. *Ni 100 programme* puan hi tih na mai a ni lova, mihuaisente thawm a ni. Puan ve ngawt ngawt chi a ni lova, huaisen lo tan chuan sawisel mai tur a ni mai a. Chuvangin, a sawiselna lam hi chu kei chuan *dawihzep-aw* ah ka ngai.

Tin, a putluh hun chungchangah hian, ‘*a la hma lutuk e*’ tih thawm te kan hria a, ‘ni 100 a kim lohna hi ni 12 chauh a ni tawh a, a hlawhtling chho mek e’ tih a ni bawk si a; a liam tawh hnu ah chuan, ‘*a hlawhtling chho mek e*’ tih resolution hi putluh chi a ni tawh lova. Chuvangin, December session-a putluhna chang kan lo hre lo kha kan tlai hle zawk a ni. Chuvangin, eptu lama kan thiante pawh hian min lo ngaidam sela, kan lo pulut tlai mah mah a nih zawk hi.

Tichuan, kan hmuh angin, he *Ni 100 programme* hi puan tawh chinah chuan a hlawhtlinna kan hmu chho zel a, hei hi lawmthu kan sawi a ni mai a; Session dang koh leh hunah chuan ni 100 tam tak a liam hman tawh dawn a. Chuvangin, tun tuma hetia, tun Session tak, ni 100 a liam hmaa lawmthu sawina putluh hi chu tih makmawh a ni zawk a, a nachang hria kan member te zinga an lo awm hi a lawmawm tak zet zet a ni.

Tichuan, he program, ni 100 chhunga tih hlawhtlina tana tha kan House Leader-in a rawn puante zingah, ramin chawp leh chilha a chhawr mawlh mawlh chu, *inrenchem* a ni. A hmasa berin MLA te tana motor leina a tan nuai 10 phal thin han tihtawp ringawt pawh hi, sawifo angin, chawp leh chilhin he ram hian vaibelchhe 4 a hlep nghal a ni a, a tha thlawt a ni. Tin, minister nih vang te, MLA nih vang tea sorkar a tanga hamthatna chuangtlai tak tak dawn thin, a chanvea han cut te kha a ropui a, a huaisen thlak a ni.

Tunhma zawng zawnga kan hotute thawm chu kan hria a lawm; kan sawi tha ngam lo zawk a ni. Tih tak takah chuan kan flagship programme ve kan sawi fo thin ‘Sawhthing’ kan ti a, Sawhthing hmun zawng hian kan hotupa hi Tlawng kamah te hian a lo zuk kal ve mai ang tih kan hlau a. Chutiang ti lova huaisen taka mipuite lam a hawi zawka hi keini chuan ropui kan ti a, *huaisen* kan ti a ni.

Tichuan, vawiin nia kan resolution hi a chipchiarah kan lut lo ang a, kan lut hman lo bawk a. Hetiang resolution hi a leh pekah pawh ni 100 dang chhunga tihhlawhtlin tur hi la puang leh thei phei ila chuan a tha leh zual ang a. Kum khat chhunga tihhlawhtlin turte, a kum hnihna a tihhlawhtlin turte hi chhawp chho thei zel ni ila, chumi ti hlawhtling tur chuan theihtawp chhuah tlang ila; tichuan, he rorel khawl hi mipuite tan a tangkai takzet ka ring a. Chuvangin, vawiina resolution putluh hi House-in adopt ngei turin ka thlawp e.

HON. SPEAKER : A lawmawm e. Thorang Bialtu zahawm tak Pu R. Rohmingliana ilo sawm ang.

PU R. ROHMINGLIANA: Pu Speaker, a hmasa berin he House zahawm taka kan memberpui zahawm tak Pu TBC-a biala chhiatna lo thleng hi ‘ka tawrhpuoi takzet a ni’ tih, he House kaltlangin ka’n sawi duh a. Tin, chumi rual chuan, vawiin *Women’s Day* hi Mizoram hmeichhia zawng zawngte ka lawmpui a ni, tih kha ka’n tarlang hmasa duh bawk a.

Tichuan, Pu Speaker, vawiinah hian i dinglama mite hian *a buk thelhin an thelh* niin ka hria a. He resolution hi thlakhat vel lo zir chiang leh sela, rawn pulut sela tha tur a ni a; an thelh hlein ka hria a. Hei, aikal lak chungchang te an sawi a. Aikal lak te hi ‘a zavaia tha lo’ tih tawp te hi a tha lo ka ti a, he House ah ngei pawh aikal lain zawhna te pawh kan inzawh tir a nih hi! Chuvang chuan, an case azirin, dam lohna te thil chi hrang hrang a awm thei, tih hi kan hriat a thain ka hria a ni.

Tichuan, Pu Speaker, kum khat birthday pawh hi thla sawmpakhatah an lawm ngai lo; thla 12-ah a ni an lawm thin. Vawiin resolution hi ‘*sorkar fakna resolution ni rawh se*’ tiin rawn thlak sela tha tur a ni a.

Tichuan, Pu Speaker, ka chhut dan chuan, ni 92 a ni tawhin ka hria a; February thla hi ni 29 a awm avangin an chhut sual deuh em aw, ka ti a; ni 8 vel la awm niin ka hria a. Tichuan, Pu Speaker, helaia resolution hi kan chian a ngaiin ka hria; Member zahawm tak Pu Jejea a resolution hi, “Ni 100 chhunga tihhlawhtlin tur sorkarin a lo duan lawk tihhlawhtlin a ni chho zel hi lawmawm ka ti hle” tih a ni a; kei chuan he resolution hi ka pawm thei thlawt lo a ni. Tihhlawhtlin eng emaw zat chu a awm e, Pu Speaker.

Hei, ni 100 chhunga tih tur hi Mizoram a kan media te hi an changkang em em a, Pu Speaker, vawiinnia kan House Leader-in CM anih ve leha kum khat chhunga a thil tih tur a sawi, chanchinbu mite’n an tar chhuah atang hian ka rawn sawi ve duh a. Tihhlawhtlin pakhatmah an nei lo, ka ti lo; amaherawhchu, an tihhlawhtlin loh ho hi ka sawisel a ni. chuvang chuan, lawmawm ka ti thei lo; kei chuan ka pawm thei lo.

Pakhatnaah Pu Speaker, kut-hnathawktute tan thlaithar chungchang Governor Speech-ah pawh awm - ‘Sawhthing, Aieng, Hmarcha leh Hmunphiah a rate siam’ tih a ni. Pu Speaker, kan House Leader ngei pawhin he House-ah, ‘Hmunphiah minimum rate ₹100/- a ni ang’ tih a sawi tawh a; mahse vawiinniah chuan an mangang em em a ni. Pawisa MNF sorkarin a dah zozai kha hmunphiah lei nan engatinge kan hman mai loh? In thei anih chuan min pe rawh u, ka bial chhunga mi chu ni 100 hma hian ka leisak vek ang che u; a pawisa kha min pe rawh u, naktukah pawh ka tlan thla mai ang.

Tichuan, Pu Speaker, a point dang lehah chuan, SEDP sum crore 150 chu, ‘thu-leh awm hma chu khawih chet loh a ni ang’ tih a ni; hei hi thil awl lutuk a ni, thu-leh awm hmaa khawih chet loh chu; *thu-leh* an neih loh chuan an khawih che lo ang a; *thu-leh* an nei a ni ang, an khawih che tlat; crore 110 kha thlaithar lei nan an dah a lawm; crore 40 kha Health lamah an dah a ni.

Tin, Pu Speaker, ‘Minister tinte department enkawl tur road map kan pe ang’ tih a ni; an pek ka ring; hei hi chu thil awl te a ni. Lawmna tur viau ka hre lo; a ho viauin ka hria. ‘Chhiarkawp dikin budget kan siam ang’ an ti a; an siam em? Hei hi chu kan la en dawn chauh. Tin, ‘Supplementary demand sawiho thin a ni ang’ an ti, kan sawiho pui

che u; thil pawimawh vak a la awm lo, helaia kan tih chinah hian. ‘Resource Mobilization din a ni ang’ in ti a; in din e, kan pawm e. Mahse, tax sang taka lakna a bul tanna atan kan hmang a nih kha; *year of consolidation* - inrenchem chungchangah kan fail Chiang Hlein ka hria. ‘Minister te zinin kan inzui duah duah lovang’ an ti; mahse kan hmu, social media ah pawh kan hmu nasa lutuk. Helaiah hian in fail Chiangin ka hre bawk. A resolution rawn puluttu rawn putluh hi a fail Chiangin ka hria, Pu Speaker. Chuvang chuan, inrenchemna lam a ni lo.

Tin, Pu Speaker, ‘MSSSB leh SEDP Board kan thiat ang’ an ti; an thiat e, mahse Mizoram tan engnge a thatna ka hre lo; he thil hi a tha lo lam hawi a ni zawk. Pu Speaker, ‘Advisor to CM pathum ka nei ang’ tih kha Aizawl Post chanchinbu ah a inziak a ni. Mahse, vawinniah chuan *panga* a ni tlat. Chuvang chuan, Chief Minister anih ve leha Pu Speaker, vawiinnia kan House Leader-ina ‘*ni 100 chhunga tih tur*’ a tih hi a fail Chiangin ka hria. ‘*CBI general consent pek tur*’ tih te erawh chu, consent an pe ngei, Pu Speaker.

A tawp nan, heti laia ‘*ni 100 chhunga tih tur*’ an tihah hian a awlsam sam an ti a, amaherawhchu, Mizoram tana thil tha a kha an tih hmaih a ni. Chuvang chuan, Pu Speaker, he, “Ni 100 chhunga tih tura lo duan lawk tihhlawhtlin ni chho zel hi a lawmawm ka ti hle” tih hi, kei chuan ka pawm thei lova, thil tha kha ti hlawhtling se chuan ka pawmpui thei mai ang, tih kha ka sawi theih tawk a ni e. Pu Speaker, ka lawm e.

HON. SPEAKER : A lawmawm e. Aizawl East-II Bialtu, Pu B. Lalchhanzova ilo sawm ang.

PU B. LALCHHANZOVA, HON. MINISTER: Pu Speaker, ka lawm e. Pu Jeje Lalpekhlua private resolution, CM - 100 days programme, a ni a la zawh hmaa review, a ni mai ang chu, kan han nei thei hi a lawmawm ka ti hle a. A hmasa berah chuan, midangte’n min lo tehna tur puanchhuah ngam hi hmasawanna entirtu a ni a, kan thlen chin mite’n min teh theihna tur duan hi kawng engkimah, ram rorelna ah pawh hian thil tul tak mai a ni a. Pu Speaker, tun tumah pawh hian i veilama mite tan hian he *100 days programme* hmang hian sawi tur tam tak pek anni a, hei hi he sorkar tan pawh hian thil tangkai tak, kan kal chhoh zelna tura tan, ram ro kan relna tura tan kan darthlalang, keimahni tana kan hun a ni a; kan tihhlawhtlin leh hlawhtlin loh chu hunin a la hril zel dawn a ni.

Tin, kan intiamna te reng reng hi a hun a zawh hmaa kan thlen chin he House zahawm taka sawiho a ni hrim hrim mai hi a tha hlein ka hria a, a tul a nih phawt chuan, 10 days programme te pawh kan la puang ang chu; 1 day programme te pawh, maw. He ram siam tur hian hmanhmawh hi a ngai hle hian ka hria a, he ni 100 chhunga tihhlawhtlin tur point 12 rawn chhawp chhuahte hi a ropui ka ti hle a. *Entirnan:* kan Chief Minister

hian ZMP-sorkar a lo pian tirh khan MLA tling tharte min kokhawm a, chutah chuan SEDP la hman bang crore ₹150 a awm thu a sawi a. Khang te kha Pu Speaker, Zoram mipuite hriatah hian ka sawi duh a – ‘*Engtia hman tur nge ni ang*’, tihah khan, keimahni kan party worker-te tan emaw, MLA-te tan emaw tih lam reng reng kha awm lovin, ‘*thlathar lei nan i hmang ang u*’ tihah khan kan lungrual em em mai a, kut kan beng dar dar mai a ni. Khang te kha Zoram mipui hriatah kan sawi duh a.

Tin, he ‘*100 days programme*’ mai hi a ni lova, Pu Speaker. Minister tin mai hi tihhlawhtlin tur zawng reng rengin, ‘kan ti hlawhtling tlem bik ang’ tih hlau reng reng hian minister kan nih atanga vawiin ni thleng mai hian, mu hman mang lovin kan la buai chho dat dat mai a. Chu *100 days programme*, kan Chief Minister-in a puan chu kan ram tan thil tangkai tak a ni.

Tin, ‘MLA-te tan car thar lei a ni lovang’ han tih lai te hi, car zuartu pakhat chuan, “Pu Chhanzo, inpuang ringawt a, car kan hralh tlem phah; amaherawhchu, a tha tho e”, a ti a. Tin, kan driver te, kan car chhawm te pawh hi kum nga chhungin kan thlak ngam kher lovang a. Kan zin nikhua leh thil kan tih nikhuaah te pawh hian, ‘check uluk teh u’, tiin, tunah hian mahni tan thil hi kan lalut a, kan tangkaipui em em a ni.

Tin, healthcare bill bat rei a manganthlak zia kan hria a ni. He House-ah ngei pawh hian ‘damlo tinte bill tur cheng nuai 2 a awm’ tih kha, Pu Speaker, kan hriatna a rei tawh a ni. Engatinge maw sorkar hmasa khan an lo pek tlak mai loh? Keini chuan kan han pe tla mai te hi, Zoram mipuite hian kut an an beng a ni tunah hian; kan mipuite hi an lawm a ni. Heng hi i veilama mite hian, ‘tih that nei reng reng lo; lawmna ka nei lo’ an han ti te hi, a mak ka ti.

Tin, ‘minister zin inzui duah duah loh’ tih te hi, kan inzui lo viau a ni. Kan Chief Minister Shillong zin, Delhi zin tih te hi, a minister te pawhin a rawn haw leh haw loh hi kan ngaihven lo; press mite a kawm a, ram tan thil a rawn puang hi a ni mai a. Tin, ‘restricted tender, CM remtihna lo chuan..’ han tih lai te pawh hi, sorkar hmasa hunlai chuan restricted tender kha a ngampa em em a, a thlawk nuai nuai hi a ni mai a; tunah erawh chuan kan fimkhur hle a ni, he ram tan hian. Heng te hi *100 days programme*-a kan han lan tir te hi a tha hlein ka hria a. Hei hi Zoram mipuite hnenah kan sawi leh duh a - Hetianga kan ram mipuite ro kan rel sakna kawnga ni 100 chhunga tihhlawhtlin kan tum kan han puang chhuak hi mipuite paw’n min lo teh rawh se.

Tin, Hmunphiah chungchang pawh kan thiante, i veilama mite pawhin an sawi a; he sorkar hi hmunphiah lei turin a intiam a ni. Vawiin nia min sel tute Pi Pravo-i pawh kha House-ah a awm lova, lawmthu min hrilh hun hi he House chhungah ngei hian Pu Speaker, a la thlen hi ka ring a ni. Hei vang hian, Pu Jeje Lalpekhlua resolution rawn putluh hi ka thlawp e. Ka lawm e.

HON. SPEAKER : Aizawl North-II Bialtu, Minister zahawm tak Dr. Vanlalhlana ilo sawm ang.

DR. VANLALTHLANA, HON. MINISTER: Pu Speaker, ka lawm e. Hei Pu Jeje Lalpekhlua resolution, “*Ni 100 chhunga tihthlawhtlin tur sorkarin a lo duan lawk, tihhlawhtlin a ni chho zel hi a lawmawm kan ti hle*” tih kan sawiho hi a ropui ka ti a; he resolution pawh hi tha ka ti khawp mai a.

Ni 100 chhunga sorkarin tihhlawhtlin a tum tam tak sawi tur a awm karah a then ka rawn lachhuak ang a. Hei, sorkar hmasain a tih ngam loh CBI general consent an pe tawp te hi a ropui ka ti a. Corruption do tum tak takna thinlung nei sorkar hmalakna niin ka hria a. Tin, *austerity measures* lak loh chungchang kha an rawn sawi nual mai a, i veilama mite khan. Pu Speaker, *minister inzui duah duah loh* kha kan ti viau a. Hei, keimah ngei pawh hi hmannah Lawngtlai thleng ka va kal a; (khatah khan official-in hmuh tur a awmin ka ring a) motor engzatin nge min zuia, engzat nge kan ken, tih te lo en sela ka duh a; endik kan cho a ni. Tin, CM haw pawh Airport-ah kan hmuak ve luai luai lem lo. A rawn haw a, tikhan fel takin press conference te a rawn ko a. Tin, car kan lei lo ringawt pawh kha, pui tak a ni. Car pakhat entirnan: Verna hi cheng nuai 18, (a aia tam pawh a ni tawhin ka ring a) chhiah zawng zawngte nen chuan, Minister 12 in an han lei loh ringawt pawhin cheng nuai 200 chuang kan save a; chu chu *austerity measure* chu a ni, tih kha kan sawi tel leh duh a.

Thildang tam tak pawh a awm ang. Hei, keimahni department-ah pawh motor Superintendent ten an lo kawl a; ‘hei hi a fel lo e’ kan ti a, kan tihtawp tir a. Niminah ringawt pawh, ‘pahnih a dang i kawl tho a, hei hi chu a tih chi lo e’ tiin, pahnih dang kan han titawp leh a. Sorkarin motor a hawh, hawh man kan pek ang chi kha niminah ringawtah pawh pahnih kan titawp leh a ni. Chumi a nih avang chuan, ‘he sorkar hian ni 100 chhung hian inrenchem a kalpui a, hma a la a ni’ tih kha ka sawi ngam a. ‘*Kum thum chhunga intodelh*’ tih te, ‘*ni 100 chhunga traffic jam free*’ tih te ai chuan, ni za chhung tih tur rawn langa hi a ropuiin ka hria a, tih theih tak tak pawh a ni hlawm a.

A tawp berah chuan, *bio-metric attendance* an hman kha ka’n sawi ve leh duh a. Hetah hian, ‘sorkar-hnathawkte kan inendik leh zual a ngai ang a’ tiin hma lak chhoh a ni a, ‘Secretariat lamah te hma lak a ni phawt ang’, tih a ni a. Keimahni department-ah pawh hmannah pawh kan sawi tawh a. KAI application kan hmang a, kan la zo chiah lo deuh a, tlema zawng tihfel ngai a awm a. Kar lehah khian, naupangte zirtir turin zirtirtute an kal tak tak em, tiin enchhinna kan nei chho thei tawhin ka ring a. Chu chu ni 100 programme-in a rawn hrin chhuah a ni. Sorkar sikul hi a tam em em a, sikul zawng zawng tan hian khawl lei vek dawn ila, sumah harsatnate kan tawh avangin *austerity measures* te kan la a, *year of consolidation* te kan ti a, sum inrenchem kan kalpui avangin. Chutiang chuan, a awlsam zawngin QR Code te kan ti a,

thla lak mai theih turin tihhlawhtlin kan duh bawk si a, *a takin hma kan la a ni*, tih kha ka sawi duh bawk a.

Tichuan, ni 100 chhunga kan han buaipui kan han tifel thei te hi a ropui ka ti a. Chuvangin, Pu Jeje Lalpekhlua, kan MLA-puiin resolution a rawn putluh, “*Ni 100 chhunga tihhlawhtlin tur sorkarin a lo duan lawk, tihthlawhtlin a ni chho zel hi a lawmawm kan ti hle*” tih hi pass ngei atan tha ka ti e. Ka lawm e.

HON. SPEAKER : Tawi Bialtu, Minister zahawm tak Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, ka lawm e. South Tuipui Bialtu, Pu Jeje Lalpekhlua’n resolution tha tak a rawn pulut a, ‘*Ni 100 chhung programme tihhlawhtlin a ni chho zel hi...*’ tih kha a ni a. ‘Kan tihlawhtling tawh’ tih a ni lova, ‘*tihhlawhtlin a ni chho zel hi..*’ tih lai kha kan sawiho lai chu a ni a.

Pu Speaker hetah hian, i veilama thute hian, ‘ni 100 a la tling si lova, a la hma mah mah lo maw’ tih kha an rawn sawi ber kha a ni a. Kei ka rilruah chuan, ‘tihhlawhtlin a ni chho zel hi...’ tihah khan kan cheng turah ka ngai a. Chuvang chuan, ni 100 a la tling lo mahse, lawmthu sawina tur hi tam tak a awm tawh a ni. A kum em pawh kan la sorkar lova, *ni 100* tih kha a la ni mai a. Ni 100 chhung hian tihhlawhtlin tur programme kha kan tihlawhtling tawh nual a ni. A bak a la awm, tih chu kan hai lo.

Chutih ruala ka sawilan duh chu, “*lawmte hi i inlawmpui tawn ang u*” tih hi ka’n sawi duh a. Kan Bible-ah paw, “*lawm fo rawh u, ka ti leh pek thin ang; lawm rawh u*” tih a nih kha. Chutah chuan lawm duh lo talh tan chuan lawm a har ve tho ang; amaherawhchu, inlawmpui te pawh hi thil tha a ni a. A leh lama kan thut avanga inlawmpui loh tur, tih a ni chuang lo. Kan budget session leh kan session hmasate pawh ka han thlir a, keini tan chuan vawiin thleng hian, ‘a va lawmawm em’ kan ti a. Kan thawhhona ah hian vawiina thil rawn lang deuh ta chu Pu Speaker, i dinglama mite resolution rawn put luah a nihna zawnah hian, i veilama mite hian rawn kalh talh an tum deuh ni hian kan hmu a. Eng pawh ni se, an rawn kalh fiam deuhah te pawh ngai ta ila; game an rawn khel ve deuh ah te pawh ngai ta ila. Min rawn lawmpui lutuk hi chuan lehlamah an bialte emaw, anmahni mi leh sa te pawhin an khak ve thei laia kha an vengthawng ni ah ka ngai deuh a. Keini chuan kan thlen chinah kan lawm a ni.

Hei, CBI koh luh chungchangah, *general consent* han pek tawp hi chu sorkar tan huaisen thlak tak a ni. Chutah chuan, kan sorkar kal tawhah te pawh khan (ti ila,) a *general consent* chu sawi loh, eng emaw issue, thubuai deuhah pawh kan ko ngam meuh loh chu a nih kha! Keini chuan, kan CM hian *general consent* a han pe pawp mai hi chu, a huaisen thlak deuh ka ti a. Keini House-a mipui aiawha thute chauh

loh pawh, zoram mipui tan hian a lawmawm lawm ni, tih laia kha ka rilru ah chuan a lang lian khawp mai a.

Tichuan, *MSSSB thiah* chungchang hi kan inzirtir sual lek lek dawnin ka hria a. Hemi kan thiah tak avang hian thalaite hi hna hmu lo nghal turah kan inzirtir deuh ni te hian ka hria. A changtlung zawk, a tha zawkin hei hi chu kan kalpui dawn; a tha zawkin kan kalpui dawn tihna a ni. Thalaite hian hna hi an chan phah dawn lo, tih laia kha ka sawilan duh a ni a. Hemi thiah chungchangah pawh hian, thil tha tur zawk a nih chuan, kan lawm tur a ni dawn lawm ni? Healthcare scheme hnuaiah pawh kan Health Minister-in nimirah pawh a puang a, “kan pe tawh a, tumkhat; a la bak zawng hi chu kar leh chhungin kan damlote account-ah a lut thei tawh turah kan beisei” a tih khan, nimirah pawh dawhkan kan chum luai luai a ni lawm ni? ‘Thlaithar leina tur kan dah ang’ kan ti a, kan dah a; amaherawhchu, harsatna kan tawh a, kan House Leader (kan CM) ngei pawhin a sawi tawh a; kan dah a ni. Tichuan, ‘lei ila’ tih kha, thil tul em em pawh niin ka hre lo. Chuvang chuan, *a lawmawm hrim hrim* tih laia kha; hmabak erawh a la awm. (*Warning Bell a ri a.*)

A tawpna tan Pu Speaker, miin lawmthu an sawi laia a inti-beidawng zawnga hnung atanga inpawh talh hi chu; min tih beidawn an tum ni hian ka hre zual a. In motivate tawn hi a ngai a; ‘ni 100 pawh la tling lovah hei zawng zawng hi in ti thei a ni a, theihtawp han chhuah teh u’ tia min nawr min nawr tur zawk anni, i veilama mite hian ram an hmangaih ve chuan.

Tichuan, Pu Speaker, Pu Jeje Lalpekhlua resolution - “100 days programme tih hlawhtlina a awm mek zel a hi kan lawm a ni” tih kha ka rawn thlawp e. Ka lawm e.

HON. SPEAKER : A lawmawm e. Aizawl North Bialtu, Minister zahawm tak Pu Vanlalhlana ilo sawm ang.

PU VANLALHLANA, HON. MINISTER: Pu Speaker, wawiina kan resolution Pu Jeje Lalpekhlua rawn put luh, “*Ni 100 chhunga tih hlawhtlin tur sawrkarin a lo duan lawk, tih hlawhtlin a lo ni zel hi a lawmawm kan ti hle*” tih hi a tha ka tiin, ka thlawp a. Nikum 8th December ah sorkar a lo ding a, sorkar chhuak thar chuan ni 100 chhunga a tih tur a rawn duang chhuak a, chumi a bawhzuinaah chuan a lungawi thlak a, mipui pawh an hlim hlein a hriat a. Tin, a thu hi han ngaihtuah vang vang hian, han ngaihtuah thui tur pawh a awmin ka hre lo a, infuihna ang deuh niin ka hria. ‘*Ni 100 chhunga tih hlawhtlin tur sorkar in a lo duan lawk, tih hlawhtlin a ni zel hi a lawmawm kan ti*’ ti hi naupang zirlai angah tehkhin ta ila - tha deuhin bul a tan ta a; tichuan, kum tawp exam kha a hmabak a hmachhawn tur ber a chu a ni. First term exam a lo thleng a, a ti tha hle mai a; phur takin kum tawpah result tha tak a neih theih nan, ‘i va han ti tha ve’ kan ti a, kan fuih ta a. Chutiang deuh chuan, tuna sawrkar thar pawh hi, ni 100 chhunga a thil

tih kan en hian, “A tha e; a lawmawm e” kan ti mai a ni. Chuvangin, ngaih kawih tur a awmin ka hre lo.

Tin, hun hmasa lama kan hriat thin chu, a tir atangin hnathawk tura induan te hi a awm lo em ni; target te hi an nei ve lo em ni, tih mai turin, kan inchibai laih laih a, kum khat a ral a. COVID a lo ni leh a, ‘hnathawhna hun a awm lo’, tih te kha kan hriat thin ang kha a ni a; tunah hi chuan kan thil hriat hi a dang ta deuh hlek niin a lang a. Sum leh paiah kan harsat em avangin, *year of consolidation* kan han nei te hi a tha a, State Project Monitoring Committee kan han nei te hi thil thar tak meuh meuh a ni a. Party mite leh NGO te, Congress te leh MNF te an telna - monitoring committee din te hi thil dangdai tak chu a ni ve hrim hrim a ni.

Tin, *austerity measures* - in remchem chungchanga sorkarin hma a lak dan te pawh hi, mahni inhal ral, mahni in-sacrifice chungin a ni. MLA te car leisak anni thin kha kan han tibo a, chumi avanga lakh ₹400/- kan han hlep ringawt mai te pawh hi a nep lo viauin ka hria. Tin, MSSSB kan sawi a, rem leh remlo te pawhin kan han sawi hram thin a. Ka sawi chak vak lo a, bengka ka hriat ngei leh min hrilh tu, MNF hotu thu ve tak pakhat hian, “In pu hian MSSSB hi thiah tur a ti a ti mai a; in ti tak tak em ni?” a ti a. “E, kan puin a tih te chuan, kan thiat mai ang chu”, ka ti a. “Politician inni a, laina in nei a, thian in nei a, worker in nei a; in duhsak te pawh hi a remchang ve a sin” a ti a ni. An induhsakna; chumi chu diklo takin an la, tih ka sawi lo; amaherawhchu, kan rilrua kan hlauhthawn anga kha thil thleng thei a ni a, thil thleng te pawh a ni ang u. Chuvangin, mipui rilrua rinhlelhna awma kha tihbo a tul hrim hrim a ni. Boundary Committee te kan han sawi a, kan *100 days programme*-ah a tel a, Boundary Committee chu kan din mai a ni. Term hmasa lamah in lo din a nih pawhin, ‘in din lo’ kan ti lova; kan din khan, a tha a ni mai a. *100 days programme* kha, ni e, Boundary Committee din kan ti a, kan din a ni ve mai a ni.

Tin, Kolkata ah Mizoram House kan nei a; mi rama ram neih hi a har em em a ni. Amaherawhchu, hralh ruk a lo ni reng mai a, chu chu sorkar tharah hian kan in recover leh a, pawisa lo pek tawh te pawh a tul angin kir a ni a; tichuan, kan han hum leh hram a. Kan Dy. Speaker hi a awm ta lo a, kar hmasa khan Silchar ah a zuk kal a; tam takin ram kan nei tih pawh kan hriat loh, enkawl pawh kan enkawl zui tawh loh kha a zuk zawng chhuak a, a zu hmu nual a ni. Chu chu sorkarin a humhalh a, a tul anga kan hman chhoh te pawh a la tul dawn a ni. Chuvangin, kan vai hian “Pu Jeje Lalpekhlua resolution hi i thlawp vek ang u” tih kha kan sawi duh a. Heta *100 days programme* a point tam bera hi kan manifesto ah tel a ni. Tichuan, mipui hma ah kan inzuar tlang a, kan *100 days programme* leh a dang zawng zawng pawh hi, mipuiin rinna an ngat a, thlan tlin a ni a; sorkar thar a lo piang ta a ni. Hei hi, manifesto kan tihpuitlinna hmanrua bultanna a ni, tih kha, membrete’n min hriatpui ula; kan resolution hi i thlawp tlang ang u, tiin kan sawm che u a ni. Ka lawm e.

HON. SPEAKER : Aizawl West-II Bialtu, Minister zahawm tak Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, ka lawm e. Pu Jeje Lalpekhluva resolution put luh, “*Ni 100 chhunga tih hlawhtlin tur sorkarin a lo duan lawk tihhlawhtlin a ni chho zel hi a lawmawm kan ti hle*” tih hi, kei pawh ka lawm a. ‘*Ni 100 inhlawhna*’ tih hi a awm thin a; tun tum kan resolution pawh hi ‘*Ni 100 inhlawhna*’ ni berin ka hria a, kan inhlawh chho dawn a ni.

Pu Speaker, inthlan hma khan au hla pahnih lian tak mai kan neih chu – ‘CBI kan ko lut ang’ tih leh, ‘MSSSB kan thiat ang’ tih a ni. Tichuan, kan han sorkar ta a, ni 100 chhungin CBI kan ko lut a, MSSSB pawh chu thiah a ni ta a ni. A hmaa ka sawi tawh angin, constitutional body - MPSC kan nei reng a, chu chu kan tichak dawn a. Hna lak hi kan titawp dawn a ni lova, constitutional hnuaiyah hna lak hi chhunzawm zel a ni dawn a. Chuvangin, thalaite tan pawh MPSC ngawtin a lak anni tawh zawk dawn a, hei hi thil lawmawm tak a niin ka hria.

A pahnihna ah chuan, Pu Speaker, *Minister-zin* chung chang kha austerity measure kan lak zinga mi a ni a. Khatah khan sawi lan te a awm a; Dr. Mathlantea sawi ang khan, Pu Speaker, kan zin tawhna, kan tour programme-ah khan kan awm dana chu a chiang mai a. Delhi ka awm laiin CM a lo thleng thla a, amah leh PS kha an ni mai a, airport atangin a hawng chho nul nul a; ka’n hriat meuh chuan press conference a lo ko leh tawh a; chutiang chu kan ni a. Politician nih chuan, mahni infakna lam te pawh hi han chhiar chhuak ila. Hmanniah group pakhatah pastor pakhatin a thu post hi an rawn dah a; Pu Speaker, i rem tihnain ka’n chhiar ang e –

‘Ngaihtuahna min siamtu Ningani khan chhungkaw thilah Kolasib ah kan zuk lehleng a, DC office-a officer pakhat chuan, hman ni khan Sports Minister kal thu leh, an lo hriat mai loh thu leh an hriat hnuah ava zawt a, buaipui an ngaih loh thuin a lo chhang a. Mahse, VIP kal ta chu a va phei a, concerned officer pahnihin an lo zui thu leh, an ei leh in pawh Minister-in a lo pek fel vek thuin a lo chhang a, sum senso a tlem tak viau thu a sawi uar viau. Kan haw kawngah Kolosib tlawh tur Dy. Speaker kan tawk a, a hma ah bike pakhat leh, a hnungah DC Car pakhat chiah kan tawk leh a; fak leh demna lam hawi a ni lo a nia,’ tih hi, Pastor pakhat hian a post a, chu chu an rawn forward a. Ka’n chhiar chhuah chhan chu Pu Speaker, Minister te zin hi a renchem thei ang berin kan kal mek a ni.

Pu Speaker, ruihhlo-do chung chang hi, ni e, engtik lai pawhin do a ni a. Kan CM tawngkamah chuan, ‘*thapui thawhin kan do ang*’ a ti a; kan do rem thei kher lo ang, a harsa tih kan hria a; amaherawhchu, theih tawp kan chhuah dawn a ni kan ti a. Excise hna thawktu kan police-te kan ring tawk a, chumi piah lamah chuan, ‘keini mai a tawk lo e’ tiin, tlawmngai pawl te leh Kohhran hial kan han au ta a ni a. Jan 13-a kohhran

thalai pawlte nena Excise Department Auditorium-a an thu sawi chu – “He hmunah hian kan awm rei tawh hle a, Excise Department-ah hei chen kan thawk tawh a; CM kan office-a min tlawhtu hmasa ber a ni”, an lo ti a. Kan sawihona ah chuan Social Welfare Minister te pawh telin, Excise te, Police-te a pumpuiin ruihhlo-do ah hian, ‘*khawngge, thapuiin thawh teh ang,*’ kan ti a. Sorkar hmasa pawhin theihtawp a chhuah a, a hma leh pawhin theih tawp a chhuah a; kan dinhmunin a zir loh avangin kan bei zel dawn a. Chu chu ni 100 chhunga kan tih tura a tel avangin theih tawp chhuahin kan umzui zel a ni.

Pu Speaker, pakhat chiah kan sawi leh duha chu, helaia kan inhnialna pakhat hi chu, thlathar leina tura sum dah leh dah loh chungchangah hian a ni a. Sum dah a ni a, a lei dan turah leh a price support pek dan turah, keini pawh inpeih hman lo; kan aiawha sorkar atanga kal turte pawh inpeih hman lo. Chungte chuan min han nangching bawkw si a, kan duh ang zanin kanin lei fel thei ta lova, kan in-support thei ta lova; amaherawhchu, he term kum 5 chhung hian kan lei lo a nih chuan, nuai 3 tiama pe ta lo ang mai kan ni dawn a.

Chuvang chuan, Pu Speaker, kum 5 chhung hi chuan hmunphiah emaw kan intiamna dang 3-ah hian price support pein, kuthnathawktute hi kan chhawmdawl thei ngei ang, tih hi ka beisei tlat a. Chutiang tur chuan vawiinah hian ni 100 chhunga kan tih tawh chinah pawh hian lawmna tur a awmin ka hria a; chuvangin, he Resolution hi ka thlawp a ni.

HON. SPEAKER : A lawmawm e. Tunah Tuichang Bialtu, Member zahawm tak Pu W. Chhuanawma ilo sawm ang.

PU W. CHHUANAWMA : Pu Speaker, ka lawm e. Pu Jeje-a’n ni 100 chhunga thil tih tur chungchangah resolution a rawn pulut hi, a lawmawm ka ti hle a. Tun hun taka putluh a han nih hi i veilama mite khan an lawm hle turah ka lo ngai a, sawi tur an ngah lai tak huna an han chhawp chhuak hi, an tan chance a that teh lul nen; nakinah a zawh tawh hnuah chuan sawi tur an van rawih awm si a. Chuvangin, tun hun hi an tan chuan a timing a sin maw le.

Engpawh ni se, ZPM-te kan campaign thin lai khan kalphung-thar, mipui-sorkar te kan ti thin a; ‘*engnge in kalphung thar chu*’ tia min zawh hian, kei pawhin ka chhan danah hian, ‘tih loh ang apiang kha a ni mai’ tih hian ka chhang thin a. Tunah pawh hian ni 100 chhunga tih tur intuk a, chumi chhunga han puana, a la kal mek lai zawh dawn hnaiha resolution sawiho tura han chhawpchhuah te hi, tuma la tih loh a ni a, an tih loh danin kan kal a ni.

Chutiang bawkw chuan, tih tura tih tam tak a ti a, ni 100 chhunga tih tur puan zingah tihhlawhtlin a tam em em a. I veilama mite hian Pu Speaker, thil tithei hle ah an ngai a

nih ka ring a, tihlawhtling vek tur nghalah an ngai pawh a nih ka ring a. Rinna an nghahna hi lawmawm ka ti em em a; he sorkarah hian rinna pawh an nghat thuk hlein ka hria. Tichuan, Hmunphiah ringawt mai an rawn sawi a, *'thawka phita Hmunphiah'* kha a ni mai a; Hmunphiah lo kha chu han lek ur ur tur kha an nei lem lo; chuvangin, hmunphiah kha han lek leh thin sela a tawk mai a. Engpawh nise, khati vak vak ringawt kha, *'Maurawkela zawng khuang ang'* hi kan nei bik chuang lo' tih kha lo hre phawt sela. Tichuan, ni 100 chhunga tih tur zingah CBI koh-luh te, kan hotupa-in a han ko lut ta rup mai te hi; engkim mai ni 100 chhunga tih turte leh budget te pawh kan pharh a, khang zawng zawng kan policy leh engkim inthlunkhawmna, a hlawhtlinna leh a hlawhchhamna hi chu corruption-ah hian a innghat vek a ni; chu chu a chabi pawimawh ber a ni. Kan ni 100 tih tur chhungah khan CBI general consent pek kha a tel a, chu chu a ti ngei reng bawka ni.

Tichuan, tunah chuan, eirute emaw, kut-tlinglote emaw khatiang chi reng reng kha man theitu tur, hrem ngaite hrem kha a ni a. Tin, ACB te hi an rinawm lo, kan ti lo; amaherawhchu, Vigilance hnuaia awm te a ni a, kan Leader hian mahni leh mahni a inchhui theih loh tih hi chu a chiang khawp mai. Chuvangin, amah pawh lipse vek theitu tur general consent han pek mauh mai te chu, tuilet hnua la awm ngai miah lo a ni. Chuvangin, 'heng te hi a va lawmawm em' tih hi a hun hle zawkin ka hria. Pu Speaker, lawmthu inhrilh te, infuihna thu inhrilh te hi mihring min tichaktu, tumna min neih san tirtu, beiseina min siamsaktu an ni thin a ni. 'Lawmna reng reng ka nei lo' intih leh tawp thin hi chu; 'hlawhchham vek rawh u; inkal dan hi han hlawhchham chhin ula kan va hmu chak em' tihna ang tluk deuh niin ka hria.

Chuvangin Pu Speaker, he resolution hi a lawmawm thlawt a; a hun la tawp hma ngeia sawiho tura i veilama mite pawhin duh tawka an sawi hun han siam sak te hi lawm taka sawiho pah chung hian, anni pawh hian lawm taka min pass-puia, min pawmpui turin ka sawm a ni e. Ka lawm e.

HON. SPEAKER : A lawmawm e. Tunah chuan, Aizawl East-I Bialtu, Minister zahawm tak Pu Lalthansanga ilo sawm ang.

PU LALTHANSANGA, HON. MINISTER: Pu Speaker, ka lawm e. Ka aw a chak lo deuh hlek a min lo hrethiam ang a. Vawiina kan Resolution Pu Jeje Lalpekhlua rawn putluh hi thil thar diai mai, Mizoram tana challenge ropui tak, zofate tan chuan he thil hi beng thleng thlenga bawp khaina tham niin a lang a. 2008 a kan han MLA ve lai te pawhin i veilama thute hian an tih awm takte tih loh hi an nei thin a, vawiinah pawh mi tih loh eng emaw, mi tih han chan hi an thiam em em a. A chhan chu, *'Remna leh muanna avanga Mizoram-in hma a sawn nasat zia'* tih te Congress party-te khan an rawn pu lut a ni; khang te ka ngaihtuah a. Tin, 2019 June thla-a kawng that zia, Mizoram kawng zawng zawngte tha tawh ang maia an rawn tih te rilruah a rawn chawk tho thar hle a. Heng zawng zawng han ngaihtuah hian leh kan ram kal tawh dan leh kan ram

dinhmun thlir hian, a lungchhiat thlak hle a. Amaherawhchu, sorkar thar, kalphung-tharin vawiinah challenge ropui tak mai zofate ah a rawn chhawp chhuak a. Hetianga kan chhungkua theuh pawh kan kal a nih hi chuan, nasa takin hma kan sawn dawn ni hian a lang a.

Hemi resolution a rawn dah dan reng rengah pawh hian, ‘*hlawhtlinna kan chang chho mek*’ tih lai hi a ni a, hlawhtlinna kan hmu a. Heng hlawhtlinna hrang hrang vawiina kan hmuhah te pawh hian, a sorkar ang te phehi hi chuan lawmna tur hliir hi a ni mai a. ‘Year of consolidation’ tih te, hei vang ringawt pawh hian 2024-2025 ah hian public debt hi crore ₹697.69 zetin a tlak hniam phah dawn a ni. Chutiang tak chuan vawiinah hian kan sorkar hian hma a la a. Kan lo ngaithla a, Zawhna & Chhanna hunah te, hmun hrang hrangah building tawl, lianpui pui sak zawh tawh hman tangkaina awm si lo, a hman tangkai theih ang em, tih kha, kan House member-pui zahawm tak takte khan an rawn sawi nasa a; chungte hman tangkaina tur leh kalpui dan tur an rawn zawt nasa a. Khang te kha han ngaihtuah chuan, state matching share te kha a tam awm mang e; 100% funding a ni awm si lova, kan state pawisa a eihek nasat tur zia te han ngaihtuah chuan, hemi ah te hian Pu Speaker, keini sorkar chuan kan state pawisa atanga project lian tham reng renga counterpart funding tih te pawh hi ‘kan ti lo ang’ a tih te hi, kan han ti tawl mai te hi lehlahmah chuan a huai thlak hlein ka hria a. Chutiang tak chuan, he ram hi uluk tak leh a neitu thinlunga enkawl kan tumna a lan chianna niin ka hria a.

Heti lai, 100 days programme a pathumna-ah hian, kan sawi fo mai hmunphiah chungchang hi a ni a. “Sorkar hi kan la inpeih hman lo a; thla thum em pawh kan la ni lova. Kan la naupang em em a, kan la thu khu vung vung a. Chuvang chuan, tun kan dinhmun han thlir hian kan la lei hman lo deuh a ni a. Chuvang chuan, hengte hi min lo hrethiam teh u”, tiin kan au lawm lawm a. RR Associates te chauh hi rawn lang an ni a, a bak an rawn lang lova; a hnuah hei, an rawn lang leh deuh tuam tuam a. Chutiang chuan thil chu a’n kal chho ve bak bak zel a ni a. Tin, hemi Soil department pawh hian nasa leh zuala hmunphiah ching tute tan pawha kudam tha te kan ngaihtuah zel a; chutiang sakna tur pawh chuan Central-ah pawh project kan kalpui mek a ni a. Chungte chu a hlawhtlin chuan, hmun hrang hrangah hmunphiah lo dah lailawkna tur leh, hetia vai hoin an duh duha a rate an rawn siama, kan kut-hnathawktute mangang lova siamna tur hian hma kan la dawn a ni, tih kha ka sawi duh a.

Hemi chungchangah pawh hian kan sorkar hian hma a la mek a, Agriculture Market Assurance Fund Management Board (AMAFMB) a din a. Hei hi Ni 14.2.2024 khan notify chauh a ni. Chuvang chuan, hemi chungchanga kut-hnathawktute kan hmangaih anga kan sawi lai pawh hi a nihna takah chuan, sorkar demna tur zawinna mai a ni. Hei hi, Ni 14.2.2024 khan din chauh a ni a. “Kan budget atang hian kan lei lo a nih chuan min dem rawh u, kan budget pharh atang hian kan lei ngei dawn a ni” tih kha, ka assure duh a ni e. Pu Speaker, ka lawm e.

HON. SPEAKER : A lawmawm e. Aizawl South-I Bialtu, Minitter zahawm tak Pu C. Lalsawivunga i sawm ang.

PU C. LALSAWIVUNGA, HON. MINISTER: Pu Speaker, ka lawm e.

Tawitein; vawiina resolution kan sawiho hi, Ni 100 chhunga tih hlawhtlin tur sorkarin a lo duan lawk tih hlawhtlin chhoh a nih zel avanga lawmawm a tih thu, resolution Pu Jeje Lalpekhlua'n a rawn put luh hi a ni a; "tih hlawhtlin a ni chho zel", tih hi vawiina kan dinna chu a ni a. Amaherawh chu, ni 100 a la tling lova, ni 100 tling tawh ang thawthangin ngaihtuahna kan seng em aw, tih rilruah a awm deuh a. Inrenchemna kawngah pawh nasa takin hma lak a ni a. A hminga Minister-te pawh kan Chief Minister hovin hma hruaitu-ah tan kan tum a. Tin, Pu Speaker, i veilama mite ngei pawh a hma hruaitu-ah an tang a; kan zavaiin hma kan hruai niin ka hria a.

Memberte'n an sawi ang khan, Pu Speaker, i ding lam atanga he resolution hi lut a ni a, i veilama thute ah kha chuan support lo tura ngaihtuahna deuh hi a awm em aw, tih theihin ka hria a; engpawh nise, an thinlung chhungah chuan an lawm ve viauin ka ring, tawngkain an sawi duhlo mai mai a ni. Kawng lehlamah chuan sawrkar kal ta hmalakna PAHOSS te pawh kha an ngaihtuahin ka ring a; 'PAHOSS' tih chuan, thenkhat thinlung hi chu a khur zawih zawih mai thei a ni. A hlawhchham chiang si a, pawisa a kalral tam si a; kum thum chhunga intodelh pawh min tiam a, kan intodelh lem hlei lova.

Mahse, tunah hi chuan ni 100 chhunga tih tur kal chho meka hlawhtlinna lo awm tawh eng emaw zat kha a lawmawm em mai a, 'he House hian lawmthu i sawi ang u,' tih resolution kha a ni ber mai a; lawmthu sawina awm reng pawh niin ka hria. Tin, MSSSB thiah chungchang pawh kha, sawitu tam tak khan an rawn sawi a. Hei pawh hi constitutional body, India Danpui ina a sawi ang thlap leh a phal ang thlapa din - MPSC kan nei a, chumi kan neih lai reng a, State sorkarin a thuneihnaa a din MSSSB thiah kha, i veilama mite hian an la na deuh em aw, a tih theih a. Sawrkar thar hi chuan an duh ang kha kan duhpui ve lo a ni e. Chuvang chuan, kan thiat a ni e, tih min pawmpui ve sela a tha khawpin ka hria.

Tin, term kal ta kha kan han thlir vang vang chuan, department hrang hranga hna awm kha restricted tender-in duhsak zawngte an inpe deuh vekin a sawi theih a ni. An hnathawh dante mipuiin kan phekk hmuh a; mahse, 'hnathawh thalo' kan ti a, kan duh lo bawk a; loh theih loh a nih loh chuan, restricted tender hi kalpui a nih tawh loh tur thu, tun ni 100 chhung programme atan CM-in a rawn sawi te hi a lawmawm em em a, lawmthu sawina tham niin ka hria a.

Tin, kum 36 chhung State puitling niin kan lo kal tawh a, i vei lama thute rorelna hnuai ah kan awm a; hetih chhung hian sawrkar-hnathawkte pawh an pisa kai danah inthlahdahna a lo nasa a ni ang, anmahni sawrkar hnathawh hlei hlei hian an vei

a. Sawrkar thar a lo piang a, a hunbi dik takah pisa kai a lo ni a, a hun takah ban a lo ni a; Sawrkar-hnathawkte hlei hlei hian nuam an ti a, an lawm a ni. Chuvang chuan, ni 100 chhung programme ah hian heng ringawt te pawh hi lawmthu sawina tham a tlingin ka hria a. Chuvangin, Pu Speaker, vawiina Pu Jeje Lalpekhlua Resolution – “*Ni 100 chhunga tihhlawhtlin tur sawrkarin a lo duan lawk tih hlawhtlin a ni chho zel hi a lawmawm kan ti hle*” tih hi lungrual takin i pawm mai ang u, tih ka sawi duh a ni e. Ka lawm e.

HON. SPEAKER : A lawmawm e. Sawi tur kan awm tawh loh chuan, Opposition Leader in sawi duh a nei em? A neih chuan, i lo sawm ang u.

PU LALCHHANDAMA RALTE, OPP. LEADER: Pu Speaker, ka lawm e. South Tuipui Bialtu, MLA zahawmtak Pu Jeje Lalpekhlua Resolution - ni 100 chhunga sawrkarin a tih tura a tiam *12 points on CM 100-days programme* chungchanga lawmthu sawina motion move a ni a, a mover kha a thiam ka ti khawp mai, ka congratulate hmasa a ni.

Pu Speaker, A pakhatna ah chuan - chawhma lama kan debate boruak avang khan chawhnu lam chu kan sawrkarpu lam chu, “E, kan lo tifuh lo mang e, kan resolution chu” tia, chawlh-lawk laiin “mi tlem zawk anni a; hawh u, thapuiin i han nawr teh ang; i han rum-thaih teh ang’ min ti ni hian kan hre deuh a. Amah erawh chu, thudik hi chu ‘a dingchang zawk dawn’ tih ka’n sawi duh a.

A pahnihna ah chuan, Mizo Upain, ‘*mahni infak leh sakhi ngalah engmah a bet lo*’ tih a ni a; kan sawrkar hi mipuite’n min fak hun zawk nghak hram ula, he House rorelna in-zahawm takah a sawrkarin *ni-100 chhunga tih tur* a tih, ni 100 em pawh thlen hmaa hmanhmawh em ema mahni infakna han sawi tliar tliar mai te kha a zia lo ka ti a, Minister zawng zawng pawhin an sawi ve bawh leh nghal.

Kan Bible chuan fak der tute lakah fimkhur turin min zirtir a; mihring tana hlauhawm ber chu, ‘*chawimawina*’ hi a ni a. Ka rilru leh lama awmah chuan, kan House Leader phiarrukna hi a awm emaw ni chu aw; ‘he House ah hian lawm taka han siam vela, Opposition lam te’n kan tih loh zawng zawng an sawina turah kan House Leader hi a hmai han ti bal teh ang’ kan ti lek emaw chu aw, ka ti a ni. Ka ngaihtuahna a kal thui khawp mai, Pu Speaker.

A dawt leh ah chuan, kan House Leader hian he resolution hi a hmu nge hmu lo, ka hre lova; diktak chuan heng point 12 ah hian kar hmasa, hmasa leh khan i veilama mite hi chuan kan duh loh thil a awm a vangin, Private Members Resolution kha kan rawn sawisel tawh a, pawm a ni dawn lo tih a lang reng tawh a lawm maw le; inhniaalna lianpui a awm dawn tih kha a lang tawh reng a, chutih laia in han thehluh hi mak ka ti khawp mai.

A dawt leh ah chuan, kan sawi lian em em a, (a thente phei chuan in ning lek lek tawh a) Hmunphiah chungchang (thlathar) kan sawi hi kan sawi satliah a ni hlei nem; Assembly Session kan neih hmasak ber ni 13.12.2023-a sorkar lakluh khan, kan Governor khan sorkar aiawha a sawi kha Pu Speaker, i phalnain ka'n chhiar lawk teh ang - *“My Government will fix remunerative price and will start procurement of ginger, turmeric, chillies and broom stick from this financial year itself”* tiin a inziak a ni. He sorkar hian tun sorkar kum la la, ni 22 la awm chhung hian, a bik takin ‘Hmunphiah kan lei ngei ngei dawn’ tih hi a sawi a lawm maw le; ‘sorkar kumtharah kan lei ang’ tih lam a ni lo. Chuvang chuan, a ni kan sawi ni. Kut-hnathawktu ten Hmunphiah an ching a, an tap a, an rum a. Governor-in, ‘sawrkarin kan lei dawn’ a ti a. ZPM sorkarna hnuai hian RR Associates te hi sorkarna an pe em ni? An niin an lei theih loha vanga lei loh ngawt hi a dik dawn em ni, Pu Speaker? Engatinge, mawhphurhna la ngam - ‘responsible government’ kan ni dawn in ti a, mawhphurhna in lak ngam loh zia hi vawiinah hian (a mawilo deuha tawng hi ka hreh a) in inngaihtuah chian hi a ngai ka ti. Hmunphiah chungchang sawi te pawh hi kan chak bik hlei nem; kan Chief Minister-in, *‘hei chu kan fail a ni’* a tih tawh pawha a fail-na sawi sawi hi, kan Chief Minister tihhniam tumna a niin ka hria a, tha ka ti lo.

A dawt leh ah chuan, heng point 12 ah hian, ‘a zavaiin in ti lo e’ kan ti lo; in tih tam tak pawh hi kan lo lawm a, kut kan beng ve nasa a ni a; lawmna chang hre reng reng lo kan ni hauh lo a nia. Tin, heng point 12 ah hian thil thenkhat hi chu sorkar thiltih kut ben hluah hluahna tham lem lote pawh a awm ve a nia. *Entirnan*: ‘Work order nei tawh thawk mekte chu kan thawh chhonzawm tir ang; work order nei tawh la tan lo leh departmental work anga hna tan lo chu tuman thawh loh tur’ tih te hi kut ben hluah hluahna tham a ni vak lo; State Marketing Board din turah hma engmah lak leh si loh chungchang te hi kut ben hluah hluahna tham a tling lo; Boundary Committee pawh sorkar hmasa din tho kha an din leh a, kut ben hluah hluahna tham a tling lo. Tin, ‘Dissolution of 15 SEDP Boards’ tih te pawh, an dissolve hma khan a thawktu zawng zawng an bang vek tawh a, office pawh an kalh vek tawh a; chumi hnu ah newspapers-ah ‘kan dissolve e’ tih te kha, kutben hluah hluahna tham a tling lo. Chuvangin, vawiinah hian in tih loh tur in ti a ni.

Lawmawm em em thung erawh chu - Anti-Corruption chungchanga CBI consent pek kha a ni a, kan lawmpui che u; Right to Public Service Act chungchang te pawh hi kan lawmpui che u a ni. Tin, ‘Anti-intoxicating drive kan ngai pawimawh dawn’ in tih pawh kha, kan lawmpui che u a nia. Tin, punctuality chungchanga hma kan lak tanna pawh kan lawm; bul kan tanna pawh kan lawm; mahse, vawiina ka sawi duh chu, sorkar-hnathawkte chauh hi punctual turin kan zirtir ang e aw; a zirtirtu, keimahni ho hi kan punctual dawn em? Meeting kan ko ang a, a ko tute hi kan tlai chheh chheh ang em? Chief Guest turin kan awm ang a, mipui hian min lo nghak thup si ang em? Punctuality kengkawh tur hian a takin, kum 4-5 lo kal turah hian mipuiin min judge dawn. Sorkar

officer-te leh thawktu kan mite ringawt chungah ham strict lovin, mahni ah example kan set dawn lawm ni, tih ka sawi leh duh a ni.

Dissolution of MSSSB chungchangah hian tawite, Pu Speaker, ka'n sawi leh duh chu - Sorkarin thiah in duh chuan, in thu a ni e. Amaherawhchu, a thlakna tur MPSC tihchak leh awmze neia budget pawh pek hma hauha, a pawnga puia sorkar hmasa din a nih avanga han thiah ringawt te; exam tur mi tam tak, fee tam tak pe tawh te an awm nghuk laia, nunrawng tak ang maia kan han thiat buaih buaih te hi a ni, tha lo kan tih ni. Chungte chu a ni heng 12 points chungchangah lawmthu sawi har kan tih em emna chu. *Year of consolidation* pawh a thu chuan a mawi; tha kan ti; thil thenkhat in sawi te kha dik tak chuan Pu Speaker, 'Minister car thar kan lei lo ang' tih te kha; tunge lei ang? VIP car a lifetime hi kum 10 a ni. MNF ministry khan Congress kum 10 hman hnuah a thar kan leia lawm; tunah term khat chauh a la ni a, car thar lei hun a la ni lo hrim hrim.

In lehkhabu ah khan, 'minister-te, chief minister te'n motor pakhat chauh an kawl ang' in ti a; pakhat in kawl em, en rawh u; thenawm ten lo en rawh se, ka sawi loving; in sawi ang khan in awm chiah lo. Chu chang a nilo, thil dangah pawh sum in ren nge ren lo; eng emaw min hual veltu tur kan din dan te, Board hrang hrangah kan MLA rualte an awl thep thup laia khawilai political party emaw atanga kan mite tihlawmna tura tana political accommodation ang maia kan board-te kan hmang hi a dik em; chu chu sum renchem a ni em, tih kha ka hrethiam lo a ni.

Chung zawng zawng chu vawiinniah hian kan sorkar hian, "Zoram mipuite'n ring tawk taka ZPM te hnathawh kawr min hak tir avang hian, Zoram mipuite chungah kan lawm a, in mi rin ang ngeiin hna tha taka thawh kan tum ang" tih resolution te hi rawn pulut ta zawk se keini paw'n kan pass pui ang, chutiang te chu. Hna in thawh that chuan kan pui dawn che u; *constructive opposition kan ni dawn* kan tia lawm maw le.

Vawiinnia in ngaihtuahna hi, a kal fuh lo em aw ka ti a ni. Chuvang chuan, Pu Speaker, i veilama thute chuan kut-hnathawktute kan Governor ngeiin, 'kan lei sak dawn, tun financial year ngei ah' a tih mawlh mawlh laia, a pawisa pawh in kuta in kawl nghek nghuk laia in lei thei tlat lo te hi, chutianga lawmthu han sawi chu harsa kan ti; kut-hnathawktute lamah hian kan tang ve tlat a ni. Mite tah laia lawmthu sawi hi kan thiam lo; MSSSB ah exam tur thalai rualte mittui nen an awm lai hian, vawiinniah hian MSSSB thiah avanga lawmthu sawi hi, keini chuan kan thiam lo; kan ti thei ngang lo. Mipui chhiah tihpunah pawh hmanni lawkah pawh kan sawi khan, '1% atanga 3% a pung kha, 2% ah ni hram rawh se; tihpun chu tha kan ti; sang lutuk chu ti lo ang' kan tih laia, in tih tho si ah te leh, 100 days a tlin hma hian lawmthu sawi mawlh mawlh hi chu a har kan ti a ni. Pu Speaker, vawiinniah hian a sorkar hrim hrim hian a ti tha lo, kan ti hran lo; mahse, lawmthu sawitu tur chu mipuite ni rawh se; 2028 a kan thil tih ah lawmthu sawi rawh se; he House-a keimahni infak leh sakhi ngal ah engmah a bet lo. Kan Chief Minister hi ropui taka siam in tum lai hian, a phenah

hian eng emaw a awm a ni lo maw; phiarrukna hi a zam chia i a ni lo maw, heti tak maia kan in lipse duh mai hi?

Pu Speaker, a tawp nan (**Hon. Speaker:** Khawngaihin; minute 10 a lo ni a; i tih thui viau takin, kan Rules of Procedure (clause 131) angin, minute 15 kha a pelh theih loh tih kha kan in remind e).

Awle, ka pel lo ang, kan House Leader hi, a hruaina pawh nuam kan ti a, House a kan awm dan pawh mi paw'n 'ava hmuhdawm em' an ti. Vawiiinah ngei pawh Pu Speaker, i hriat lai ngeiin House Leader hnenah ka sawi kha maw le. Inhnial chiam te, in sawisel chiam te hi a tha lo ka ti a ni; Zoram mipui hmuhah hian a fuh lovin ka hria. Kan Leader hi rawn dingchhuak se, engnge maw a sawi ang le? Mahni sorkar fak viau lah kha a tan a nuam dawn si lova, 'ka sorkar chuan kan ti tha a nia' han ti viau se, a tan chuan ka a chih ngawt ang maw le. Sorkar kal tawh te han dem bawih bawih a mawi dawn si lova, *State-pa* kha a ni bawk si a. Chuvang chuan, kan tih tur zawka hi chu, mipuite thlavang hauh zawng te, hnam tana tha tur, ram tana tha tur resolution te hi i dinglam atang hian lo kal thei sela Pu Speaker, kan pass pui dawn a ni. Chuvang chuan, vawiiinniah hi chuan, *12 points on Chief Minister 100 days programme*, a mizo tawnga in rawn dahah khan lawmthu la sawi em hi chu, kan tih tur a ni dawn em ni, kan ti a ni. Pu Speaker, ka lawm e.

HON. SPEAKER : A lawmawm e. tunah kan House Leader-in sawi tur a nei chuan, ilo sawm ang.

PU LALDUHOMA, HON. HON. CHIEF MINISTER: Pu Speaker, kan hriat tlan ang khan vawiiin hi *International Women's Day* a ni a. Helaia kan member-pui kan hmeichhiate lawmpuina leh chibai kan buk duh a. Mizoram-ah hmeichhia Cabinet Minister kan neih hmasak ber a ni a. Tin, hmeichhia pathum term khat chhunga MLA kan neihna hmasa a ni bawk a, kan House nulain a conduct-na hmasa ber a ni bawk a; chuvang chuan, a chhuanawm ka ti a. Tin, ram pumpuiah pawh hmeichhiate vote ngah zawk, awmze nei zawk tea a din sorkar kan nih avangin, an hnenah pawh chibai ka'n hlan a ni.

Tin, kan ngaihthlak tawh ang khan, kan Mara unaute *Lyuva Khutla* a ni a, a lawmpui nan hei, Mara-coat nia ka hriat ka rawn ha ve a. A ni tho ti rawh u? Lai nen hian an thuhmun deuh a, an inchuh deuh an ti a. Unau lo chuan ro an inchuh ngai lo ka ti mai a. (**Speaker:** Pu Nguna kha sawi tur a nei em?)

Awle, hei kan *100 days programme* hi point 12 kan han ti tak na-a, ni 100 a tlin hma pawh hian point 12 piahlam hi kan Minister te'n an dai hnem hman em em tawh a. Demand for Grants-ah khan 12 points-a kan ziah loh, kan minister-te'n hma an lo hlen tawh tam tak kan ngaihthla tawh a. Kar leh lamah khian Pathian zarah kan la ngaihthlak

belh zel dawn a ni. Chuvangin, kan Minister zawng zawngte chungah lawmthu ka sawi a. Ni 100 a ral hmaa lawmthu sawina resolution kan han nei thei hi lawmawm ka ti hle a. Infakna lam thu nilovin, lawmthu sawina resolution a ni.

Tin, han sawifiah ngai neuh neuh hi a awm thin a. Tun maiah khan ka Opposition Leader khan an sorkar laia vehicle life-time kha “kum 10 a ni a, a ral tawh a; chuvangin, a thar kan lei a ni”, a ti a. Amaherawhchu, vehicle life-time hi kum 10 ni lovin, kum 15 zawk a ni. A ral hmian a thar an lei tih kha, sawichhuahna hun min rawn siam sak avangin ka lawm thin khawp mai.

Hmunphiahah ka'n tan ve ang a. Tun hma zawng zawng khan hmunphiah hi a mahal lai a awm a ni, sorkar te khan. An mahal a, a aia rate sanga lei duh kha awm ve mahse, an lei thei miah lova. Mahaldar ho khan an duh ang rate khan an lei sak a, a market a sang thei lova, competition a awm thei miah lo a ni. Phun a nasa a, kan party pawh khan mahal system hi kan do nasa em em thin a; balu thlengin kan do a ni. India Vice President-in Sairang a rawn tlawh tum pawh khan kan VCP-in a dodalna hall-ah a lo sawi a, balu mahal kha a tawp phah nghe nghe a ni. Mahaldar-te hian mipui, an hnuaia eizawngtute an dangchep em em tih kan hria a. Tichuan, kan sawisel kan sawisel a, hmunphiah mahal kha an han titawp a, a tha chuang reng reng lo a ni. Free market an ti a, mahaldar a awm loh chuan duh duh kha mahaldar an rawn ni ve thung ta a ni. Tichuan khawilai hmunah emaw chuan hmunphiah leitu tur an awm miah lo a, an inzawng chawp a, tlawm em emin an lei a. Tlabung, hei, kan pi bialah ngei pawh hmunphiah an seng lai khan ka va kal a ni. Mahaldar a awm tawh si lo, pa-pakhat khanin tlawm deuh mai khan a lo lei a. Chu chu khawvela an market neih chhun a ni a, mittui tla chungin an hralh a ni.

Chuvang chuan, a tha chuang lo; mahardar siam pawh a tha lova. Sorkarin, ‘in awm-awmin awm rawh u’ tia, sezawl chhuaha chhuah pawh a tha chuang lo. Hmunphiah thar laiin Saipum-ah ka kal a, an mangan zia a takin ka hria a, ka mitin ka hmu thin. Marpara ah ka kal, Silsuri-ah ka kal baw; chung hmunahthe chuan mimalah an inngat vek a ni. Mimal a leisak tute rate kha a inang lo thluah a, a rate sang tawng fuh kha an vannei a ni mai a, a rate hniam tawng kha an vanduai a ni mai a; chutiang chu a ni a. Chutiang nei-nuaia an awm chung a royalty lo lak baw te kha ‘a tha lo e’ tiin kan hruaitute’n, ‘a leidan i ngaihtuah ang, royalty pawh chawi suh se’ an ti a. Tichuan, kan Governor Speech-a kan intiam ang ngei khan, kan rate-a leitu tur pawh kan siam a, kan sawi tawh a ni. Kan Opposition leader khan a rawn la bawp lawk ang reng viau mai a; a bawp lawk ang deuha kan sawi ve dawn chuan, ‘a vaiin kan lei ang’ kan ti bik miah lo a ni. A lei chu kan lei a lawm; kan lei seng lo mai a ni. Kumin chu, tunhma an dinhmun angah khan an awm leh ta rih a, pawl kan ti khawp mai a.

Kan sawi fo a; dik chiah chuan, a ching peih lo ho hi a bengchheng anni; hmunphiah ching ve hauh loh ho hi a bengchheng an ni a. Thil hi sawi sual leh leh sawi fuh lo hi a

awm a, 'nuai 3' han tih ngawt te pawh kan hria a, 'Party-president atangin ka chawl tawh ang e' an tih pawhin, an chawl lo leh mai a; a lo remchang leh lo a ni ang. Hmunphiah ang deuh bawh hi a ni a, remchang leh lo hi a awm thin a ni e.

Experience kan nei tawh a, kan ziralaiah kan ngai a. Kumthara kan tih dan tur chu, empanel buyer kan siam dawn a ni. Kan empanel buyer-te nen rate kan siam ang a, kan rate anga an lak ngam loh chuan, an ngamna tawkin an lei ang a, chumi inkar chu support price-in kan hnawhkhat ang a. Pawisa kan dah lawk vek a, harsatna a awm lo. Kan empanel buyer-te chauh kha transit pass kan pe ang; kan empanel buyer-te lo chuan Mizoram pawn an chhuahpui thei dawn chuang lo; tiang chuan kan control tawh dawn a ni. Chuvangin, goal keeper tha tak maiin penalty vawi 99 a save a; pakhat a chhuah palh hlauh avanga sawichhiat vak tur a ni lo.

Boundary committee te pawh hi, a dik chiah chuan a hlui rin ngawt thu a awm lova, Chairman kha MLA pawh a ni tawh si lova, dinthar leh a ngai a. Pa-pakhatin motor a lei thar a, 'i motor chu a va thar si lo ve' an ti a, 'motor thar ka lei' ka ti hlei nem; 'ka lei thar' ka tia lawm' a ti a. Boundary committee hi kan dinthar a ni lo a, a thar kan din a ni.

Assam Chief Minister-in hmanni lawkah breakfast ei turin min sawm a, ka naute zawng zawng nen kan va ei a; 'tumahin buaina i siam lovang; kan inchin fel hma chu tu lam lam mahin buaina siam loh tur; kan pahnihin kan ensure ang' kan ti. Tin, 'kan hun chhung ve ve hian kan inkar hi sawifel i tum ang' kan ti; tiang chuan inpawh takin kan sawi dun a. Hei, session kan han zo ang a, an Minister, Atul Bora a rawn tir chho ang a, helaiah kan Home Minister te nen, kan boundary chairman te nen an inkawm ang a, tichuan, an inbe chho dawn a ni. Chu chu thil kal mek a ni a; ramri la buai reng, la sawifel loh na na na kha chu a committee din zel a la ngai a ni.

Tin, sorkar sum mimal account-a dah nia kan hriat avang khan, ni 16th February ah office memorandum tih chhuah a ni a; an lo awm palh a nih pawhin, lo insiam fel se kan duh a; action lak kher kan tum lova, grace period kan pe a ni. Chu hun erawh chu a ral ta, tih kha lo hria se langin. 100 days programme hi, "thil tih awlsamin lawrkhawm; thil awlsam te-te inlawrkhawm", te an ti a. Chutiha hnu chu, engatinge anni khan an lo tih loh? An ti miau lova, kan tih a ngai a lawm; kan tih hi sorkar hmasa tena an tih loh hlir a ni kan tih ni, Pu Speaker.

Tin, aikal chungchangah hian, aikal zat hriat phawt kan duh a; hetiang hi kan hriat dan a ni –

Health & medical reason-ah health issue - hrisel lohna lam chi hrim hrim nei mi 2070 kan nei a. Tin, chhungkaw harsatna - family problem avangin mi 703 an awm a. Personal problem *entirnan*: inluah tur hmu zolo te, kawng chhiat lutuk avanga motora

an thlen zawh loh te, an va awmna tur hmuna an tawng thiam loh vang te, khatiang personal problem nei kha mi 350 an awm a. Tin, chhuanlam tur nei lem lo mi 90 an awm bawk a. Tin, hotu, thuneitu sang zawkte thupek avanga ti mi 35 an awm a. Tin, zirna sang zawk kal zel duh avanga ai kal la mi 43 an awm a. Chhan chi hrang hrang in ang lo tak tak 74 an awm a an vai hian 3375 an awm a ni.

Tichuan, School Education ah an tam ber a, mi 1115 an awm a, Health Department ah mi 624 leh P&E Department-ah mi 253 an awm a ni. Chu chu, a chinchang kan han hre phawt ang a, kan hruaitute, cabinet-in tul a tih angin ala ngaihtuah ang a. Tin, aikal thenkhat hi chu, an tha zawk an ti a ni. (MLA-te pawh hi aikal lak theih sela, kan aia tha zawk hi an tam ve viau mai thei bawk a.) Thenkhat chu thawk tlak lo anni a, chu na na na chu, ‘compulsory-a retire tir mai tur a ni dawn lawm ni’ tih te a ni a. Thenkhat chu, cancer vei te anni a, ‘vanduaina tawh naka laia inban ringawt chu’ te pawh a tih theih a; kha kha kan hruaituten ngun takin an la ngaihtuah dawn a ni.

Tin, ‘Resource Mobilization’ kan han tih te, ‘Year of Consolidation’ kan tih te hi thil hmun khat vek a ni a. Project reng reng hi pawisa awm ngawt mahse, counterpart funding tam tak tak ngai ang chi te, a maintenance hautak lutuk ang chi te, tin, a hmanna tur awm lawi mang si loa pawisa sen teuh teuh ngai ang chi te kha, hmanni lawkah pawh kan member zahawm tak Pu Nguna bialah kan hmu a ni. Sorkar hmasain a sak, ‘tute’n nge luah ang’ an ti a, a luahtu turah kan buai a; luahtu tur pawh awm hlei lo pawisa tam tak sengin an sa a ni. Khatiang chi kha keini chuan kan duh lo a ni. Nimin lawkah an sawi a, ‘sorkar hmasain DPR kan thehluh chu, Jeep trip khat a tling ang’ an ti a ni. Khatiang kha kan duh ve lo; pawisa ringawtah kan buai ve lo. Kan ram tan a tha ang em, tih kan ngaihtuah a, kha jeep trip khat khan vawiin ni ah kan lu a ti hai mek a ni. ITI te, Polytechnic building te kan vei em em; kan bial chhungah pawh hetiang hi ka hmu teuh. Slaughter House, cheng tam tak man te an lo sa a, ar pakhat pawh an zuk talh lo chutah chuan; ‘ramhnuai pilrilah tumahin ran an zuk talh dawn lo’ tih Chiang sa ah khan an zuk sa a ni. Hmanni ah pawh, ‘khawl pakhat electric awm lohna ah an bun ringawt’ tih te sawi a ni a; helai ah kan sawrkar thara Power minister hnenah, “engtik ah nge electric i pek dawn?” a ti leh si a; engatinge electric a awm lohna hmunah an lo dah, khang kha? Current hmang tur khawl chu current awmna hmunah khan lo dah mai tur a lawm.

Tichuan hei, kan inren tlang a; keimah ngei pawh ka’n sawi ang a - hmanni Shillong ka zin te chu, Meghalaya sorkar te chuan kan zanriah eina tur thleng khan ambulance lian pui pui nen, doctor nen min zui tir reng mai a; kha kha Chief Minister convoy awm dan pangai a ni. a hnawk hi ka ti khawp mai a; kan thu si lo a, state pawn a ni si a. Vawiinah hian, ka movement ah hian doctor ka hruai lo, ambulance ka hruai ngai lo; ka hruai loh avang hian khan doctor te khan damlo tam tak an enkawl phah thei; Kha ambulance kha thil tangkai ah an hmang thei a ni. Magistrate hruai zel tur ka ni, ka hruai ngai miah lo; kha mite khan court ah thil tangkai tak an thawk thei a ni. District-ramri apiangah police

an lo inhmuh tir thin; ka inhmuah tir ngai lo. Tiang chuan kan zinna ringawtah pawh hian kan inpaih thawl nasa a ni.

Amaherawhchu, ‘motor, in neih tur zat aia tam in nei’ min ti a; vawiin niah hian, kan neih tur aia tam kan neih ka ring lo. Kan motor-te hian spare erawh chu a nei a ni. ‘Motor pakhat kan nei ang’ kan tih hian, ‘minister pakhatin spare nei miah loin 1 a ring ang’ kan tihna a ni lo; 1 plus spare hi a kalphung a ni. Hei hi chu hriat tur a ni a; spare nei lo chuan tumah an insiam ngai lo. Hmanniah pawh spare ka keng lo a, Luangmual chhovah ka inkhawm tur chawlhni zingah, a namin kan nam a ni, kan car kha; tichuan, Guwahati-ah kan zu repair tir ta ringawt a ni. Chutiang chuan, House Guard-te pawh kawl thei kan ni a, kan kawl lo. Kan in kan luah chhuah san tirhah a ruak ngawt mai, a fal si a, tiin rei lo te ka kawl a, tunah chuan ka kawl tawh lo, keipawhin.

Chutiang chuan, kan zin pawhin MLA zawng zawng chuan free travel facility kumkhatah nuai 2 kan nei theuh a ni. Keimahni zinna chang a ni lo; kan chhungte zinna pawh a kep vek a ni. Kei, a heh lo ber ka ni ang; ka zin khat a. Chu chu, kan chhungte pawh an zin thei; kan entitled a ni. Nuai 2 kan lo ei zo a nih erawh chuan, kan pocket atangin kan pe dawn a ni mai. Tunah kei pawh ka zin hnai maithei; kha ka free travel khan a daih tawh lo a nih chuan, ka pocket atangin ka hmang mai ang, ka chhungte tan chuan. Chu chu a kalhmang a ni. Tin, heti khawpa kan inren chung hian, leh, kan puk te kan tih tlema, kan leibatte kan titlem chung hian, kan plan outlay chu sorkar hmasa plan outlay aiin kan dah tam zawk thei tlat si te hi lawmawm kan ti a; chu chu kan lawmna a ni.

Tin, *hand-holding*-a thlaithar leina tur kan dah thei hrim hrim hi, thil la awm ngai lo a ni. D-A-H kan ti a, “a theih loh; budget la pharh ngai lo anni a, an thusawi hi awih suh u” min ti thin kha a ni a. Vawiinah chuan kan sorkar tuk deuhthaw ah kan dah nghal thei si a ni. Kan dah hrim hrim hi kalphung thar a ni a, Mizoram-a la awm ngai lo a ni. Chuvang chuan, hetia kan han dah hrim hrim te leh, kan rate aia sanga kan farmer-te’n an han hralh thei tak avanga hman ngai ta lo sum kan save, kumthara tana kan chhawm thei turte hi a lawmawm kan ti a. Tunah hian, ‘hand-holding ah indah tlem e’ min ti a, mahse heta kan ziah lan miah loh crore 55 central atangin kan dawng der tawh, hand-holding atan hian. A dang dil chhuahna tur hi kan rilruah a awm a ni. Khaw 273-te hand-holding atan crore 55.18 tunah hian min sanction sak tawh a. (**Hon. Speaker:** Khawngaihin; dar 4 a ni a, kan Leader-in a sawi laklawh la; tin, kan la windup lo bawk a, kan chhunzawm leh mai a ni ang chu)

Pu Speaker, ka lawm e. Hemi atan hian 1st installment ah crore 27.69 min rawn pe nghal a; ‘inthlan an puan hma hian a 2nd installment release nghal kan duh khawp mai; rawn hmanhmawh rawh u’ min ti a. Tin, tunah hian Finance Ministry in kan hand-holding atan bawk, ‘interest awm lo loan, handholding hnuai beneficiary te’n an puk tur kan lo pe ang che u; han inbuatsaih rawh u’ an ti a, kan inbuatsaih mek a. Amaherawhchu,

guarantor-ah sorkar kan tan ve a ngai dawn a. *Ceiling on Govt. Guarantees Act* kan la amend hman lo a, chu chu Council of Minister-meeting ah kan sawi tawh a; a rang lamin Amendment Bill kan pass phawt te a ngai dawn a ni.

Tin, niminah lunch break chhung khan USA atangin *Compassion for Jesus* te nen kan inkawm a, kan hand-holding atan pawisa a thlawna min puih an tum thu minrawn hrilh a ni. Chutiang chu a ni a. Chuvang chuan Pathian-in mal a sawm a, kan hand-holding hi. Helai a kan dah hi crore 310 chauh a ni a; amaherawhchu, hemi piah lamah hian kan hmuh belh mek zel a. Prime Minister lam atang pawhin special package kan la beisei a, kan hmuh ngei dawn leh dawn loh erawh chu kan hre rih lo a ni.

Mizoram House Kolkata, Mizo zawng zawngin kan ui ngawih ngawih an lo hralh kha, a man kan pe let leh a; tichuan, min khing mek a. Tunah hian kan advocate general hoin vawikhat hearing an nei tawh a, ‘a tu zawk zawk pawh chak se, Supreme Court chu kan thlen hmel a ni’ a ti a, kan Adv. General chuan. Hemi kan han la let leh ringawt hian Kolkata-a kan Mizo Welfare leh kan official-te a ti lawm em em a ni.

Tin, *Right to Public Service* hi notification kan chhuah tawh a, a hma sorkar hmasa khan Service 51 a lo nei sa a, tunah hian kan tih belh a; Service hrang hrang 140 kan cover tawh a. Hei hi tunthla ni 15 atanga hman tan tur a ni tawh a. Hemi *Right to Public Service* hi mipui hnenah awarness kan pek a ngai nasa em em mai a. Hei hi, a endiktu tur IO ruat anni a, district hrang hrangah ruat anni tawh a ni. Hei hi thil thar, mipuite tana sorkar va dawrna tur leh, an mahni va kal fo ngai lovin application an theh lut ang a, ngaih tha takin an hawng daih mai ang a; a chinfel ni kha hunbi tuk a ni a, chumi chhung chuan a fel tur a ni mai. Hei hian corruption pawh a titla duai dawn a ni.

Tin, *Sustainable investment Policy* kan han siam a, kan notified tawh a. Tichuan, hemi hnuai ah hian kan minister-te hian investment hrang hrang turte hi an hual nasa mai a; a thente phei chuan foreign lam thlengin connection an siam tawh a. Hemi kan investment policy hnuai ah hian kan la hmuh ngaih loh investment tha tak tak, kan rama entrepreneur-te tana hmalakna tha tak tak tur tih teuh theih kan inbeisei a ni.

Tin, Pu Speaker, *restricted tender* kan hre lar a, tun hmain contract kha an restrict deuh vek tih theih deuh thaw khan a kal a ni a. Keini chuan, CM remtihna lo chuan crore 1 chin chunglam chu, ‘restricted tender-a pek loh tur’ kan ti a, ‘restricted tender kan pe lo ang’ erawh chu kan ti lo; ‘restricted tender chu CM remtihna chauh a pek tur’ kan ti a; a lo fuh lo a nih pawhin, keima’n mawh ka phur dawn a ni. Kan sorkar chhunga thil diklo leh fel lo zawng zawngah chuan, keima’n mawh ka phur ngam a, keiman mawh ka phur dawn a ni; *“The Buck ends here”* kan ti ve dawn a ni. Tunah hian, loh theih loh in restricted tender chu kan ti ve tawh a; pakhat chu, Sakawrtuichhun - Sahuan kawng a ni. Hei hi West-I ka bial tirh khan a pawp lo a, theih tawpin hma kan la a, MLA

fund nen kan ti pawp a, motor a kal a ni. A tangkai em em a, ka bial loh ve leh a chhe leh deuh vek a; ka'n bial leh a, a tha leh a ni. A chhan chu, ka ngaihsak a ni.

House ah pawh, Pu Chatea a din tawh chuan, “Artahkawn a sawi dawn” an ti a, kei ka din tawh chuan, “Ropaiabawk a sawi dawn” min ti thin a ni. Chutiang khawp chuan kan vei a, kan sawi zing thin a ni. Kan Airport kawngpui a min zin zia kan hre vek a; a pin chuan, kawngdang pakhat mah kan nei lova, kan kawng neih chhun chu helai tlangdung kawng hi a ni. Chuvang chuan, a pawimawh em em a, hei hi. Tun sorkar hmasa khan a khawih ve a, a khawih muang em em a, mipui kal theih loh in thla eng emaw zat min dang a. An thawh chu tawi te a ni, tunah fur a lo thlen hma ngei ngeia kan tih tlang loh chuan, Airport kan pan thei lo mai dawn tih kan hria a. Chutianga pawimawh a nih avang chuan, ‘hei hi chu restricted tlak a ni e’ kan ti a, *restricted*-in kan pe a ni; kan zep lo. Chutiang zelin, Chhimluang, Pu Kamrula'n a thawh; ONGC tena thawh zawh thuai thuai tura min nawr sek; kan ram oil lakchhuahna tur dal tlat; tui a lo len chuan Tlawng atanga arawn li phak vek si, chumi tih vat vat ngai chu kan ti mek bawk a ni.

Tin, MSSSB chungchang kan sawi leh thin a. A dik tak chuan, 2019-a din a nih khan, kum khat chhung a kal mumal lo a ni. MPSC te nena an inkarah buai a awm reng a. department thenkhat direct recruitment ti turte phe chu nasa takin an buai a, kum khat chhung khan engmah an thawk hlei thei lo a ni. Khatianga a pian fel lo, a pian tirh atang renga kebai sa, sawiselna kara lo piang kha a ni a. Tuna kan han ti reh a, interim release order te kan han chhuah leh a, bungrua kan hlan vek a, a thawktute kan pe vek a, MPSC hi a theih ang angin kan thum chak a. A dik chiah chuan, Pu Speaker, i veilama mite hian MSSSB kan thiat hi a ruk tak chuan lawm tak anni. A chhan chu, kan thiat lo anga, political appointment tih nan kan hmang ve ang tih kha an hlau viau zawk a ni. An rilru ang kha pu ila kan thiat phal miah lo ang. Kan block-president fanu te tan kan dah duh ve a lawm; mahse chu chu kan duh lo a, kan thiat a ni. Chu chu thil awmzia a ni zawk.

Tin, biometric attendance chungchangah tun thla ni 15 hian Go-Live turin kan inbuatsaih mek a, DC Kolasib in hma a lo la fel der tawh a, ama area ah lawmthu ka sawi duh a. Civil Hospital-ah an lo hmang der tawh bawk a, thuneitute chungah lawmthu ka sawi duh bawk a. Kan Secretariat pumpui saw CCTV-in tunah chuan kan centralized a, kan cover vek tawh bawk a ni.

Tin, Healthcare-ah hian, kan intiam ang ngeiin Ni 19 February khan pawisa kan release a, tunah hian bill tang damlo 13053 kan nei a ni; chu mite chu a kuma kum bill tangte kha an ni. Heng mite zawng zawng tan hian tunah hian crore 45.59 kan release a, hei hian a daih turah kan ngai a. Tuna bill tang mek zawng zawng kan clear vek hnuah hian crore 4.40 hman bang kan la nei dawn a, chu chu damlo tharte bill pek chhoh leh atan kan hmang dawn a ni.

Tin, *Mipui-Aw* portal kan buatsaih a, complaint nei apiangin zalen taka an harsatna sorkarah an rawn thlen theihna turin kan siam a. DP&AR lam atangin mipuiin an hriat theihna turin flyer te tha takin an siam a. Hetah hian mipuiin complain an la rawn theh lut tam lova; complain vak tur an hre lo nge ni, a rawn lut chhun lah hi tunhma lam thil kha a ni deuh zel bawk sia. Hei hi hmang tangkai teh ang u.

Tin, State Project Monitoring Committee hi a tangkai khawp mai. Tute nge member kha, Pu Speaker? Kan hre lo maithei a, hei hi mipui-sorkar a nih avangin, kan tel vek a ni. Chung pawl hrang hrang aiawhtute chu ka'n chhiar chhuak ang a –

1. Mizoram Kohran Hruaitu Committee (MKHC) - Rev. R. Lalrinsanga, Mualpui Tlang, Salem Veng;
2. Mizoram Pradesh Congress Committee - An Vice-President, Pu Lalnunmawia Chuaungo;
3. MNF - Er. Lalrinawma;
4. BJP - Pi Lalremsangi Fanai, Falkawn;
5. ZPM - Er. Vanlalneiha Ralte;
6. Central YMA - Pu Lalhmachhuana, Chaltlang Lily Veng;
7. MUP - An Vice-President, Pu Lalbiakmawia Khiangte, Laipuitlang;
8. MHIP - An President, Pi Ngurmawii Sailo, Kanan Veng;
9. MZP - An President, Pu H. Lalthianghlina ITI Veng;
10. MSU - An President, Pu Samuel Zoramthanpuia;
11. Mizoram Consumer Union - Prof. Chawngsailova, Chawlhmun;
12. MPF - Rev. Lalramliana Pachuau, Leitan Ramthar Durtlang te an ni.

Hetah hian ZPM aiawh chu pakhat chauh a awm ve a ni. Chung ho nen chuan kan rama project-te kan monitor ho dawn a ni. Hei hi mipui siam sorkar a nih angin, mipuiin sorkar project, mipui aiawh ten an endik ang a. Tichuan, tunhmaa kan hriat thin thil tam tak - hun pawh sei vak vak te, revised estimate tih vak vak te kha, a vaia a bo thei lo a nih pawhin, tih tlem kan inbeisei a, chutah chuan kan zavaia kan lungawi leh kan remtih tlannain kan kal tlang dawn a ni.

Tichuan, Pu Speaker, a tawp nana ka sawi duh chu - heng zawng zawng hi mipuih kan zuar a, hemi ti hlawhtling tur hian keini ho hi min thlang a. Chumi tih hlawhtlinna kawnga hmalakna kan dodal a nih chuan, 'mipui kan dodal' tihna a ang viau dawnin ka hria a.

Chumi tihlawhtling tur chuan, tling lo chung leh insit tak chungin kan theih ang tawkin hun reilo te hma kan la ve a; kan insit em em a ni. Mahse, kan thlen chinah hian mipui tawiawmna leh Pathian malsawmna kan dawngin kan inhria a, '*lawmthu i sawi teh ang*', kan ti a ni. Vawiinah hian kan lawmtlangin ka hria a. Amaherawh chu, a ruka thinlunga lawm reng si, a langa lawm loh der te hi politics ah hian a lo ngai em maw ni; politics ah hian patling inthurual zo lo hi an awm nual hian ka hre mai a. Patling, mahni leh

mahni pawh kan inthural loh hi chuan, mut a tui mawh khawp mai a, chaw ei a tui duh lova, mumang te hi a chhe duh a, hriselna te hian a tuar duh a nia. Chuvang chuan, tha chu 'tha' ti tlang mai ilangin a tha a.

Heng kan hmalakna avang hian Pu Speaker, kan *work culture* hi a insawn dawrh a ni; a danglam a ni. Kan *work culture* hi a danglam tih kan hmu a ni. Heng kan hmalakna hi kan official-te, sorkar-hnathawk te ber atanga a lian ber thlengin min tawiawm tha a, an chungah pawh lawmthu kan sawi a ni. Chuvang chuan, kan *work culture* a inthlak mek a, kan value system pawh a inthlak mek a, kan thil ngaihhlut zawng pawh a danglam mek a ni. Hei hian *reformation* mai ni lovin, *transformation* tunah hian min thlen mek niin kan hria a. Chuvangin, mipuiin kan chungah beiseina an nghat a, i veilama thute ngei pawhin kan lakah hian beiseina sang tak an nei ni pawhin kan hria a. Chuvang chuan, thawhhona tha tak kan neih chhoh zel theih ka'n ring a, he sorkar thar a din atang hian party feeling na tak hi a bo nghal a, party feeling na hi tih bo chhoh zel kan duh a ni.

Pu Speaker, fake account hmanga, cowboy-dawizep ang maia hnung lama mi vih ching ho hi man zel kan tum bawk. Hengte hian kan society a ti khawlo. Chuvangin, Zoram-thar din turin kan inbuatsaih a, a thleng kan ti lo, a sehsam erawh chu a thleng tan; Zoram-thar rehearsal erawh chu kan hmang tan ah kan inngai a, min tawngtaisak tute zawng zawng chungah lawmthu kan sawi a.

A tawp berah chuan, Member zahawm tak Pu Jeje Lalpekhlua, amah kan hriatchian hma pawha a profile engkim ngun taka kan zira, kan zinga tel ve ngei tlaka nia kan hriat, nuai tamtak la thei dinhmuna a din pawha a hnawl te kha kan lo hria a. Chuvang chuan, kan zinga tel ve tura kan it em avangin kan sawm a, hei, tunah chuan kan MLA tha tak mai a lo ni ta a. Hei, ama resolution ni awm tak, amah nena inhmeh tak mai wawiiinah hian a rawn pulut a. Hei hi lungrual taka pass dial turin ka sawm che u a ni e. Ka lawm e.

HON. SPEAKER : Member 28, kan leader leh opposition leader te tiamin mi 30 in kan sawi a ni. Nimin khan kan hun hman dan kha kan puang lova; hun hmang tha ber kha - Pu Lalmuanpuia Punte a ni a, minute 10 a hmang lo deuh hlek a. Hmang rei ber chu - Thorang Bialtu, Member zaham tak Pu R. Rohmingliana a ni. Tichuan, Chuan wawiiina a hmang tha ber chu - Pu K. Laldawngliana, Tuirial Bialtu, Member zahawm tak a ni a. Ani hian minute 4:19 a hmang a ni. A hmang rei ber chu - Pu Robert Romawia Royte, Hachhek Bialtu a ni a, minute 7:56 (second 4 in minute 8 a tling lo a ni e). Kha kha report tawi a ni.

Tichuan hei, kan Dy. Speaker nen hian kan han sawi thin a, 'kan lung a awi lo' kan tih dawn chuan, kan lung a awi viau bawk si a. Thil kan sawi hlei thei lo, ka chih ang deuha kan awm hi kan khua a har thin a. Tun tum chu remchang a awm thin lova, tawi te sawi

phal loh tawp a ni chuang hlei nem maw le, ka ti deuh a. Ka sawi ri ve hrim hrim duh a – hei, kan West-II Bialtu Pu Lalnghinglova Hmar-in a sawina engah khan, kei pawhin a taka ka tawn, ka experience han sawi rik ve ka duh a.

Sawrkar thar lawmna an siama khaw pakhat, (a khaw hming chu sawi lo ila) chutah chuan kan kal a, pilot te nen kalkawngah chaw kan ei a, kan ei fel vek a. Tichuan, kan han thleng chu official-te khan, ‘engtingge ei leh in lam hi’ an lo ti a; tichuan, kan driver te, kan PSO te khan, ‘kanrawn ei tawh e’ an ti a; official-te khan mak an ti a ni. “A va kalphung-thar ve” an ti a. Tichuan, beng kan chhi zel a, ‘Zoram dung leh vangah hian VIP-te hian ruai tenau deuh hi department official-te an lo buatsaih tir thin a ni’ tih kha an sawi ta a. Ka ngaihtuah neuh neuh a, khang Official-te khan khatianga an lo buatsaih sak khan, an sum hmuhna head ah khan ‘VIP ruai siamna’ tih kha chu a awm ka ring lova, khawi atangin emaw, eng ti zawngin emaw an siamrem a, an ziahral a ngai dawn si a. Chung te chu corruption chi, corruption hringtu pakhat a ni ve thei ang em, tih te kha ka ngaihtuah thleng ta a; a ni lo tura ngai ila. Kha tianga ‘*ei bung bung te, rik bung bung te kha ka ti lo*’ a tih thu khan min hneh khawp mai a; keipawhin ka thil tawn ve a nih avangin ka’n share ve duh hrim hrim che u a ni e.

Tin, hei, kan bialah lawmthu sawi hian kan la fang chhuak ve lova, khaw 18 chauh ka la fang a. Tichuan, ka zinna, bial kan fannaa ka pilot motor te kha chu an bedding leh an thawmhnaw khan a khat a. Ka PS-in motor pakhat a keng a, keiin motor pakhat ka keng bawk a. Tichuan, sorkar thar lawm ve ta ruang chu, khaw 18 lai kal ta chu buhfai, buhban ilo, vaimin chumi khami, sorkar thar lawmpuina kha min lo pe ve ta nual a, kan motor ah khan a leng ta lova; kan PS motor ah kan han ti a, tichuan a khat tan a. Thawmhnaw nen, air bag te kan lo keng ve hlawm bawk a; kan driver khan, ‘kal leh hun chu support car keng tawh ang aw’ a ti thin a, leng leh leng lo khan a hnawh hram hram a; mi duhsakna min pek kha hnar thu a awm si lova. Ka hre reng mai a; a tirah pawh minrawn a, ‘motor eng ang nge ni ang?’ an ti a; ‘kan motor kalna a awm a, ka PS in a ken chuan, a tawh e’ ka ti a. Tichuan, a sawi leh thin a, ka hre reng mai si a, ka chhang ngam tawh si lova. Harsa deuhin an rem a, thiam tak main; thlan tla phungin an rem thin a. Chu chu, nichinah khan kan member-te khan, inzui tir hum hum leh, VIP taka che ang lek leka sawi rik kha a awm a; chu chu a taka ka thil tawn ka’n sawi ve hrim hrim a nih chu’ Chair-a thut manah. Remchang a awm thin lo em a, ka’n ti ve deuh a nih chu; tawngthei lutukah min lo ngai lo ula.

Ti khan, kan resolution neitu in a’n move a; kan sawi ho a, member te’n. Tichuan, tunah a resolution neitu Pu Jeje Lalpekhlua kan sawm ang a; han windup-a, adopt han dil nghal turin ilo sawm ang.

PU JEJE LALPEKHLUA: Pu Speaker, ka lawm e. Vawiina ka private resolutionrawn sawitu hi, House Leader telin mi 30 an awm a, i veilam atangin mi 11-in an sawi a, i ding lam atangin mi 19 in an sawi bawk a; sawilo hi mi pakhat a awm a

ni. Pu Speaker, he ka private resolution chungchang sawi zawng zawngte chungah thinlung zawng zawngin lawmthu ka sawi a. Pu Speaker, hmunphiah hi a lo pawimawh hle a ni; kan ramah hian phiah fai tur kan lo la ngah hle a ni ang e.

Pu Speaker, ni 100 chhunga kan tih loh kan sawi pawh a ni lova, kan tih chin kan sawi hi, i veilama thute hian na an ti viau em maw ni aw, ka ti deuh a; MSSSB thiah avanga mittui tla kha kan hre fuh lova. Kan House Leader-in a lo sawi tawh angin MPSC hnuaiha tha takin an exam thei dawn a; an mittui a lo tla anih chuan, ‘*he sorkarah hian an mittui a hul ang*’ tih ka sawi leh duh bawk a.

Pu Speaker, vawiina ka resolution put luh hi kan enchiang lo deuh em ni aw, ka ti a. “*Ni 100 chhunga tih hlawhtlin tur sorkarin a lo duan lawk tih hlawhtlin a ni chho zel hi lawmawm kan ti hle*” tih a ni a. Pu Speaker, i veilama thute pawh khan he ka resolution hi an rilru tak chuan an pawm viauin ka hria a; he House zahawm takah hian dinglam leh veilama han thut hi chuan, an rilru chhungril tak pawha tha an tih em em, thutna a hran avanga support-na pek theih loh pawh hi a awm tawh thinin ka lo hria a. Vawiinah erawh chuan thil tha lamah, kan awmna rawng inang lo mahse lungrual taka kan thawhho zel hi kan ram hmasawn nan a pawimawh tak zet a ni.

Tin, Mizoram sorkar kal leh zel turte pawhin, kan Chief Minister-in sorkarin ni 100 chhunga tih tur hmachhawp a puan ang hi rawn puang ve zel se, sorkar tan pawh mipui tana hnathawhna tur kawngah chona tha tak insiamna leh, hmachhawp mumal neihna, thil tha leh entawn tlak tak neihna niin ka hria a ni. Kan sorkar tan pawh hian chhonzawm tlak, mumal neia inkaihhraina tha tak leh, inthlahdah lova sorkar tan-mar tir zelna a ni a, Mizoram tan thil chhinchhiah tlak tak leh ram, awmze neia hmasawwna lama a hawitirna niin ka hria. Pu Speaker, he sorkar, *kalphung-thar, mipui-sorkar*-in ni 100 chhunga a tih tur a tih te a ti hlawhtling chho zel hi a lawmawm ka ti hle a, hetiang kan tih theihna chhan hi Pathian leh kan Chief Minister Pu Lalduhoma bakah, ram hruaitute leh mipuite tawiamna vang a ni.

Chuvangin, Pu Speaker, ka private resolution lo put luh, “*Ni 100 chhunga tih hlawhtlin tur sorkar-in a lo duan lawk tih hlawhtlin a lo ni chho zel hi lawmawm ka ti hle*” tih hi, he House zahawm taka min adopt sak turin ka ngen a che.

HON. SPEAKER : Adopt a rawn dil a; ka adopt hmian, kan Deputy Speaker-in sawi tur a nei ve a, ilo sawm ang.

HON. DEPUTY SPEAKER : Pu Speaker, ka lawm e. Helaiha hian, i sawi ang deuh khan khawhar takin kan thu a. Ka bula mi hi a ding a, a duh tawh hian a sawi bawk si a. Ka lo nghak a, mut hi a chhuak a; han men deuh hian House chhunga light te hi kan han chhiar leh ringawt thin a. Hei, hun tawite sawina hun tha min han pe a. Sawi angin, Lal nu khawi angin kan lo hawi ve vak vak a ni.

Vawiin resolution te kan han pass chho dawn a ni a, lawmawm ka ti tak zet zet a. An han sawi khawma ngawi renga ka lo ngaihthlak chuan, kan sorkar chuan inchibai vel nan hun an hmang ve miah lo a ni maw, ka lo ti deuh a. Chuvangin, kan Chief Minister kal ta in Bawngpui insi a sawi ang deuhin, ‘warm-up awm lovin an ri nghal deuh phat a nih dawn hi, heti zat an han thawk hman hi’ ka ti a.

In sawi tha hlawm viau mai a. Kha, hmunphiah chungchang te pawh kha in han sawi a, Governor thusawi te pawh kha an han quote nawk nawk a, a lawmawm ka ti a. Kha, hmunphiah chungchanga an la inpeih hmanloh thu kha an han sawi pawh khan, an rawn sawi ve reng bawk a, Governor thusawi nen khan. Chuvangin, Governor thusawiah khan engtin nge a rawn tih kha - *“I may be cruel to you, so that I can be kind to you”* tih ang deuh khan, tun tum chu han hreawm rih phawt ula, nakina in thatna tur a ni. Tunah dan mumal awm mang lova kan lei pawp pawp chuan, ‘a hlawk lo em mai’ an ti ang a an sim palh te kha a hlauhawm a. Chuvangin, a lei dan tur tha tak society nena an tih hunah khan tunah hrehawm deuh rih mah ila, nakinah kan tan lawmna tur a ni, tih kha hmunphiah neitute pawh khan an hriatthiam tho ka ring a. Chuvangin, kan sawi ang khan, kan sorkar hi a tir atangin a ri nghal phat mai em maw ni chu aw, tih kha niin a hriat a, a lawmawm ka ti takzet a.

Tichuan, wawiinah inlungual takin House-ah te kan han sawi khawm dial dial a, inhnialna atthlakah te inhnial buai lova in hrethiam tlang takin, thuhnairawlhna leh tlawmna nena kan han rel tlang hi a lawmawm ka ti takzet a ni. Ka lawm e.

HON. SPEAKER : A lawmawm e. Kan Dy. Speaker zahawm tak. Aw le, resolution neitu in adopt a rawn dil a, kan buk ang a.

“Ni 100 chhunga tihhlawhtlin tur sorkarin a lo duan lawk tihhlawhtlin a ni chho zel hi lawmawm kan ti hle” tih hi remti apiangin, ‘remti’ ti rawh ule. Remti lo kan awm chuan remti lo ti ula. (*House-in a remti a.*) A thum zawk lam chu a hriat deuh e.

Awle, Pu Jeje Lalpekhlua resolution – *“Ni 100 chhunga tihhlawhtlin tur sorkarin a lo duan lawk tihhlawhtlin a ni chho zel hi lawmawm kan ti hle”* tih chu House in a adopt ta a ni. (**Pu Jeje Lalpekhlua:** Pu Speaker, ka lawm e.)

Awle, wawiin atana kan business chu kan zo ta a, kan chawl tawh ang a. Kar leh Ni 11, March, 2024 (Thawhtanni) zing dar 10:30 ah kan thukhawm leh dawn nia.

Sitting is adjourned. (4:31 PM)